

NATIONAL ASSEMBLY OF SEYCHELLES

Tuesday 30th May, 2023

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour Manm Onorab. Bonzour nou bann zofisyé Lasanble e nou piblik ki a lekout ozordi. Byenveni pou nou travay lasemenn. Mon pou demann Lasanble pou nou pran en moman an memwar, e an omaz en personnalite ki'n zwe en gran rol dan lavi nasyonal Sesel, e ki'n kit nou semenn pase, e sa se Larsevek French Chang-Him. Mon pou donn laparol Onorab Bernard Georges pour detrwa mo.

HON BERNARD GEORGES

Mersi Mr Speaker. Bonzour Mr Speaker. Bonzour tou bann Manm Onorab, tou bann dimoun ki pe swiv nou dan lakour, e en bonzour partikilye pou bann zanfan Lekol Anse Boileau Segonder ki la bomaten pe swiv nou deliberasyon, e zot bann ansennyen.

Mr Speaker, mersi pou donn mwan laparol bomaten pou dir detrwa mo lo sa dimoun ki nou tou nou ti konn li koman *Bishop*. *Monseigneur* French Chang-Him - *L'archevêque Émérite* French Chang-Him, parey ou'n dir, i ti en dimoun ki'n kit en gran vid dan nou pei swivan son lanmor semenn pase. Set en dimoun ki personnelman mon konn tre byen, e mon'n travay a son kote koman son Sanselye Dyosezen e Provensyal pou plis ki 20an.

Lo non, Mr Speaker, nou *Caucus* dan sa Lasanble, mon ti a kontan anmenn nou pli senser kondoleans a son 2 fiy Frances ek Michelle, tou son fanmir, e a la kominote *Anglican*. Me osi a tou Sesel ann antye akoz *Bishop* French ti pli gran ki zis Legliz *Anglican*. Malgre ki i ti en Anglikan, i ti en Pret Anglikan, i ti en Levek Anglikan, i ti en *L'archevêque* Anglikan, i ti osi en zanfan e en *leader* pour Sesel ann antye.

E sa nou'n vvar li, non selman pandan son Minister, me osi, e partikilyerman apre son lafen son manda koman Levek ek *L'archevêque*, ler *Bishop* ti re envant son lekor lo lasenn nasyonal, e i ti pran bann rol enportan, prensipalman dan *SIFCO*, dan *Cancer Concern*, dan *Friends of*

Prison e dan bokou, bokou lezot lorganizasyon, trankilman dan en fason très humble parey i ti son natir. San pouz son lekor devan, i ti la parey nou'n tann Prezidan Ramkalawan dir lo SBC, pou donn son zepol ler dimoun ti bezwen apiy lo li.

Donk, non selman avek en gran latristes ki nou dir li orevwar, me set avek osi en gran lazwa ki nou tou isi Sesel nou'n ganny privilegez pou travay o bor li, e pou vin dan en serten fason, son zanmi.

Alor Mr Speaker, mon remersye ou pou donn mwan laparol bomaten, e mon demann avek tou Sesel ann antye pou kontinyen akonpanny Bishop French dan zot lapriyer, ziska ler ki nou met li dan son dernyen repo, e sa i pou le 9 Juin, Vandredi prosen. Mersi Mr Speaker.

MR SPEAKER

Mersi Onorab Georges lo sa bann parol. E mersi pou port nou latansyon lo nou bann viziter ki mon ti'n oubliye. Mon swet zot labyenveni. Mon a donn laparol Onorab Leader Lopozisyon - Onorab Pillay.

HON SEBASTIEN PILLAY

Mersi Mr Speaker. Bonzour Mr Speaker. Bonzour tou koleg Onorab. Bonzour tou dimoun ki

a lekout, e byensir en bonzour spesyal pou nou bann etidyan ki anler dan Galeri sorti Lekol Anse Boileau Segonder avek zot bann ansennyan, e mon swete ki zot pas en bon moman dan Lasanble Nasyonal ozordi bomaten.

Mr Speaker, souvandfwa i annan bann personnalite ki listwar petet in deside pou donn zot serten fonksyon spesyal dan devlopman, oubyen dan lagrandisman zot pei, zot kominote, kot zot ete. E i pa tou dimoun ki ganny sa mark sengilye pou fer en diferans dan lavi bokou dimoun. E Bishop French ti enn sa dimoun.

Personnelman zanmen mon'n... Malgre i ti en Levek Anglikan, mon pa'n zanmen asosye Bishop French koman en Levek Anglikan. Mon'n konn li kot toultan koman en dimoun ki annan en konpasyon enkrwayab, en karakter formidab, e en dimoun ki pare pou fer en konversasyon e koz ek nenport ki.

E mon'n ganny sans koz avek Bishop French plizyer fwa. Souvandfwa ler mon'n vwar li Glacis, me osi dan bann lezot aktivite, e toultan in annan bann mo lankourazman, e bann mo tre senser.

Mwan osi, Mr Speaker, personnelman konn son 2

zanfan, vi ki nou'n lekol ansanm *Polytechnic*. E mon rapel tre byen son madanm ki ti en zanmi pou mon manman li menm, akoz tou lede dimoun ti pas atraver menm difikilte avek menm kondisyon lasante. E sa ki mon kapab dir Mr Speaker se ki, pou mwan *Bishop French* ti en dimoun ki ti ekstrememan for.

E ozordi bomaten mon pa pou zis eksprim mon serser senpati avek son fanmir lo lapar mon *Caucus*, akoz sa pou pa anliny avek sa ki i ti *stand for*. E mon pou eksprim mon senser senpati pa zis lo lapar mon *Caucus*, pa zis lo lapar *Caucus LDS*, pa zis lo lapar Lasanble, me lo lapar tou Seselwa.

Akoz mon krwar sa i enn personnalite ki parfwa nou dir *was larger than life itself*, e ki i enportan nou met lanfaz lo sa rol ki'n zwe koman en Seselwa ki'n deservi son pei, son kominote, pa zis lo en nivo lokal, lo en nivo enternasyonal.

Mon remersi ou bomaten Mr Speaker, pou donn mon loportinite pou dir sa de mo *in memoriam of Bishop French*, e mon swete ki nou sesyon Lasanble bomaten i a pas dan lespri ki *Bishop* ti anvi war, e ki nou tou nou viv ver en Sesel kot nou anmenn tou sa ki byen, tou

sa ki meyer pou nou tou. Mersi Mr Speaker.

MR SPEAKER

Mersi Onorab, e mersi le 2 Dirizan pou zot parol ki mon partaze antyerman. Mon a zis azout mon apresyasyon personnel pou kado lavi *Bishop French* ki'n en kado pou Lepep Seselwa, e mon krwar son sans devouman pou servis piblik in egzanpler, e admirab.

Sa ki mon admire avek *Bishop French* se ki non selman i ti annan en rol *leader*, en rol dirizan koman Larsevek, me osi i ti kapab zwenn tou dimoun endividyezman avek en parol sipor, lankourazman, konfor, e dan sa sans i ti en vre Paster.

Mon eksprim nou kondoleans pour lafanmir, sirtou son zanfan, e son bann lezot fanmir, e son zanmi pros, me osi pou tou Lepep Seselwa ki'n fer fas avek sa pert. Mersi bokou bann Manm Lasanble pou zot omaz pou *Bishop French Chang-Him*.

Nou a prosede avek *Order Paper*, e mon apel Madanm Clerk. Nou annan prezantasyon dokiman.

MADAM CLERK

Mersi Mr Speaker. Bonzour Mr Speaker. Bonzour tou bann Manm, nou bann *staff*, bann

dimoun a lekout. E en bonzour spesyal nou bann etidyan Lekol Anse Boileau Segonder, ki anler dan Galeri. Bann papye ki pe ganny prezante *ce matin i*; *The Seychelles Planning Authority – Annual Report 2022* *Seychelles Pension Fund – Board of Trustees' Report and Audited Financial Statements for the year ended December 31st, 2022*

National Information Services Agency – Financial Statements for the Year ended December 31st, 2022

Seychelles Fishing Authority – Directors' Report & Audited Financial Statements for the Year ended December 31st, 2022

Public Utilities Corporation – Financial Statements for the Year ended December 31st, 2022

Seychelles Public Transport Corporation – Directors' Report for the Year ended December 31st, 2022. Mersi Mr Speaker.

MR SPEAKER

Mersi Madamm Clerk. Nou a kapab prosed pou *Private Notice Question* prezan. Mon a demann reporter pou apel Minis e zofisyè ki la pou sa kestyion.

Bonzour Minis Marie-Celine Zialor Minis pour

Lazenès, Spor e Lafanmir, e bann zofisyè ki akonpanny li Mr Ralph Jean-Louis *Principal Secretary* pour Lazenès e Spor, e Mr Marc Arrisol *CEO National Sports Council*. Zot pe zwenn nou pou *Private Notice Question*, e mon ava apel *Leader Lopozisyon* pou met son kestyion silvouple. Onorab Pillay?

HON SEBASTIEN PILLAY

Mersi Mr Speaker. Bonzour Minis avek ou delegasyon. Mon kestyion i lir koumsa; Eski Minis i kapab dir Lasanble si *ex-biro Foutbol NSC* ki sitye kot Stad Popiler, pe al ganny lwe pou fer en *pub oubyen bar*, e eski Minis i kapab dir nou lekel ki pe antreprann sa kalite devlopman? Mersi Mr Speaker.

MR SPEAKER

Mersi Onorab Pillay. Minis ou repons silvouple?

MINISTER MARIE-CELINE ZIALOR

Mersi Mr Speaker. Bonzour Mr Speaker ek ou lekip. Bonzour sa 2 Dirizan dan Lasanble, tou Onorab e tou Seselwa ki a lekout. Mr Speaker, larepons i senp. Non, sa landrwa pa pe al ganny lwe pou fer en *bar*, e napa okenn devlopman ki pe al ganny fer laba. Mon ava donn

en leklersisman lo ki pe al arive avek sa landrwa.

Mr Speaker, lannen pase presizeman le 13 Oktob, mon lofis ti ganny en demann ofisyel an form en let ekrir par Lasosyasyon *Rugby* pou zot ganny lwe sa landrwa kot Stad Popiler ki nou apel *club house*. Zot propozisyon ti annan lobzektif pou mentenir sa landrwa pou zot servi pou zot bann seminar, lantrennman e rankont avek zot bann Manm. E osi pou deservi lezot kominote sportif apart ki *rugby*. E swivan sa demann nou ti zwenn avek sa bann manm Federasyon, son *Chairperson*, son Vis-Chair avek son *treasurer*.

Sa *meeting* ti ganny fer le 15 Novanm 2022, e apre sa *meeting*, negosyasyon ti ganny fer avek Federasyon *Rugby*, pou ki NSC i donn Federasyon en *lease* ki date le 1er May, 2023. E, Mr Speaker, dan sa *lease* napa okenn referans avek okenn aktivite biznes, tel ki en bar.

Annefe i annan en *clause* dan sa *lease* ki anpes fer okenn biznes, okenn nwizans, okenn aktivite ilegal, e okenn aktivite ki kree *disturbance*, e domaz dan sa landrwa. Mersi Mr Speaker.

MR SPEAKER

Mersi Minis. Parey labitud nou a pran kestyon siplemanter ki letan i permet, e Onorab Vidot ou kapab poz ou kestyon?

HON AUDREY VIDOT

Mersi Minister pou ou larepons. Bonzour Mr Speaker. Bonzour Minis ek ou delegasyon. Bonzour tou Manm Onorab ek bann zanfan Anse-Boileau ki dan Galeri, e tou dimoun ki a lekout. Minister, eski NSC in fini pran en desizyon final lo sa let?

E, eski sa landrwa prenon kont ki i ti en landrwa kot bann Fondasyon ti abitye servi pou fer bann *meeting*, bann rankont, mon lenformasyon ki mon okouran apard sa 4 zafer travayer NSC... si desizyon ki zot pou pran pa pou afekte loportinite pou bann lezot Federasyon itiliz sa landrwa?

E osi mon konpran ki osi sa facilite i annan en listwar kot in deza ganny servi oparavan, letan i annan bann konpetisyon enternasyonal kot zot servi li parey bann *call room*. Prenon kont ki i annan serten servis esansyel ki ti pou benefisyen bann Federasyon, eski desizyon ki zot pou pran oubyen zot in fini, pran pa pou annan en lenpak pou sa bann Federasyon? Mersi.

MR SPEAKER

Mersi. Manm a note ki Minis in dir pou dir fasilite pou la pou lezot Federasyon, me nou a permet Minis ekliersi, e mon demann bann Manm pou gard pou 2 kestyon silvouple. Minis?

MINISTER MARIE-CELINE ZIALOR

Mersi Mr Speaker. Mr Speaker, mon krwar ou'n fini reponn sa kestyon pou mwan. Mon'n fini dir pou dir non, i pa pou afekte, e sa i enn bann negosyasyon ki'n ganny fer avek Federasyon *Rugby*. Mersi.

MR SPEAKER

Eski ti annan lezot pwen ki ou anvi adrese Minis lo sa?

MINISTER MARIE-CELINE ZIALOR

Non, Mr Speaker.

MR SPEAKER

Mersi. Nou a kontinyen avek kestyon Onorab Uranie.

HON ROCKY URANIE

Mersi Mr Speaker. Bonzour Minis ek ou delegasyon. Bonzour tou koleg Onorab. En bonzour spesyal pou bann zanfan Lekol Anse Boileau Segonder avek zot ansennyan. Minis, eski ou pe dir nou poudir ti napa okenn, okenn klib sportif oubyen bann NGO ki ti'n

apros zot avan konsernan sa landrwa, pou anmenn en servis dan sa landrwa ki pou benefisyé pei? Mersi.

MR SPEAKER

Mon pa'n tro konpran ou kestyon, me selman petet Minis i a kapab dan pli bon pozisyon. Minis, si ou kapab donn en repons.

MINISTER MARIE-CELINE ZIALOR

Wi, Mr Speaker, mersi bokou. Mon'n konpran son kestyon byen. Mr Speaker, sel demann ofisyel ki nou'n gannyen i sorti kot Federasyon *Rugby*. Mersi.

MR SPEAKER

Mersi. Onorab Cosgrow?

HON WALLACE COSGROW

Mersi Mr Speaker. Mr Speaker, ou'n mank Onorab Loze, selman mon ava pran sa kestyon apre ou a pas kot li.

MR SPEAKER

Mon'n note li.

HON WALLACE COSGROW

Wi. Bonzour Mr Speaker. Bonzour Minis. Bonzour CEO ek PS, bonzour tou Manm. Bonzour tou zelev Lekol Anse Boileau ki dan Galeri anler. Mr

Speaker, mon kestyon i *straight forward* avek Minis.

Eski Minis i kapab konfirmen si in annan lakonpannyen lalkol ki'n fer vizit dan sa landrwa, pou devlop sa landrwa koman en *bar ouswa* en *pub*, parey kestyon in ganny demande? Silvouple, zis konfirm sa silvouple avek mwan. Mersi.

MR SPEAKER

Silvouple, permet mwan adres sa. Minis in donn en larepons. Mon pa kapab war ki bann Manm i devret pouz dan direksyon, si in annan lalkol oubyen non. In dir, non! Selman, mon krwar Minis i annan plis lotorite ki mwan la, pou ekliersi sa sityasyon. So, Minis, kantmenm i en pe repetisyon, silvouple adresse.

MINISTER MARIE-CELINE ZIALOR

Mersi Mr Speaker. Mr Speaker, *lease* avek Federasyon *Rugby* in ganny donnen le 1er *May*. E si i annan okenn vizit par okenn lakonpannyen lalkol, sa i depan lo sa Federasyon Lasosyasyon.

Mon pa konnen si i annan *sponsor* akoz nou'n fini parey dan *Cabinet*, dir ki bann lakonpannyen lalkol ki pe *sponsor* bann aktivite sportif, si i pou fer son *meeting*, nenport

ki *meeting* ki'n fer la anndan, Mr Speaker, nou, nou pa okouran son *meeting*, nou okouran nou *lease* e ki i sipoze fer dan sa landrwa. Mersi.

MR SPEAKER

Mersi. Onorab ou pe lev ou lanmen pou klarifikasyon? Ou konnen mon problem avek klarifikasyon, se ki klarifikasyon mon'n remarke souvan i anmenn lezot kestyon, i al lo lezot size. Mon a silvouple demann ou pou reste lo klarifikasyon. Onorab?

HON WALLACE COSGROW

Mersi Mr Speaker. Mr Speaker, *au faite* ki Minis pa neseserman okouran lo lekel ki vizit fasilité spor, fasilité NSC, mon pe met dan son latansyon ki mon lenformasyon se ki i annan lakonpannyen lalkol ki'n vizit sa landrwa, e annefe anvi ki...

MR SPEAKER

Onorab, sa i pa en klarifikasyon, i en largiman.

HON WALLACE COSGROW

Non, non. Be...

MR SPEAKER

I en largiman!

HON WALLACE COSGROW

Mon pa konnen Mr Speaker.
Mon pe dir li.

MR SPEAKER

Silvouple, silvouple si ou annan klarifikasyon?

HON WALLACE COSGROW

Ok, Mr Speaker. So, eski Minis i kapab rod sa lenformasyon e donn Lasanble, kantmenm pa deswit Minis, fer Lasanble konnen si Federasyon *Rugby*, petet atraver NSC, in apres lakonpannyen lalkol? Akoz Prezidan i dir nou lalkol i adiksyon numero 1, e la ou pe dir *sport* i kapab *sponsor* lalkol. Be, Mr Speaker, kote lalkol i kapab *sponsor sports*?

MR SPEAKER

Mersi.

HON WALLACE COSGROW

So, Mr Speaker, so kote nou pe ale ek tou sa bann zafer? So, Minis i bezwen dir nou klerman. Mersi.

MR SPEAKER

Mersi. Les mon a dir ou kote nou kestyon pe ale. Kestyon i sipoze en demann pou lenformasyon. I pa en demann pou fer largiman, e pou fer... Mon pa kapab dir lakizasyon oubyen alegasyon, lo bann keksoz an deor ki sa ki Minis in

dir. Mon annan Onorab Loze, e Onorab Loze, wi?

HON JOHAN LOZE

Mersi Mr Speaker. Bonzour Mr Speaker. Bonzour *tout le monde* a lekout. Bonzour Minis avek ou delegasyon. Minis, mwan, mon zis anvi konnen lekel egzakteman ki'n apres zot, akoz nou deza annan lenformasyon nou, ki pe al fer en *rugby club* laba, e sa i en *projet* ki pe ganny *fronted* par garson Minis Fonseka. So, *the question that begs*, eski i nepotizm faver in antre okenn par dan zot *decision-making process*? Mersi Mr Speaker.

MR SPEAKER

I sanble mwan, Onorab Loze pa'n konpran mwan. Kestyon i en demann pour lenformasyon. I pa en demann pou fer lakizasyon e alegasyon. Mon pe dir mon'n fini war poudir napa materyo pou sa kestyon, e mon pou permet... Mon annan ankor en dimoun lo mon lalis, mon pou permet sa kestyon, me selman mon pou terminen akoz evidaman mon pa war okenn resers pou demann pou lenformasyon. Onorab Herminie, ki ou kestyon?

HON WILBERT HERMINIE

Mersi, Mr Speaker. Bonzour Mr Speaker, bonzour Minis ek ou delegasyon, e tou koleg Onorab. Minis, dan lespri pou ganny lenformasyon parey Mr Speaker in dir, mon kestyon i koumsa li; dan plizyer ka, plizyer lasosyasyon in met plizyer demann devan ou Minister, e mon kestyon se; Akoz dan sa enn ka sa demann in ganny *meet* sitan vitman? Sa i premye.

E ankor dan lespri pou ganny lenformasyon, eski sa pa pou kree en problemm avek Federasyon Atletik, akoz nou'n ganny serten konsern sorti kot Federasyon, e mon ti a kontan Minis i reponn sa 2 kestyon? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mon pa tro sezi pou konpran sa kestyon, selman mon ava donn lenformasyon Mr Speaker, akoz mon pa okouran ouswa ganny okenn lezot lasosyasyon, lezot Federasyon ki'n fer okenn demann ofisyel pou sa landrwa.

E sa ki ou a pe dir plizyer demann, mon pa konnen kote i vini mwan plizyer demann, akoz plizyer demann i bezwen ariv ofisyelman kot en lofis. Swa

Lofis *Secretariat Minis*, swa NSC, swa Departman Lazenès avek *Sports*. Selman mon garanti, Mr Speaker, tou bann demann ki vini i annan klib ki'n fer demann.

I annan lasosyasyon ki annan demann pou bann gro *projet*, ki sa i bezwen, zot bezwen ofisyelman devlop li parey sa enn Beau Vallon, *Beau Vallon Sports Club* ki *Cabinet* ti aprouve dan en kourt dele letan, parey. I annan bann par egzanp la pou lwe en lasal, parey i annan lezot *lease*, lezot Federasyon Lasosyasyon parey Foutbol. Lasosyasyon Foutbol ti pe lwe sa landrwa. Letan in rann, apre, sel demann ofisyel ki'n vini Mr Speaker, i sorti kot... Par en endividé kot Lasosyasyon *Rugby*, e problemm, si i annan problemm avek Federasyon Atletik, ofisyelman nou pa ankor ganny okenn konplent.

E parey mon pou repet ankor, nenport ki Lasosyasyon Federasyon Sportif i kapab servi sa landrwa, pa anpeste servi sa landrwa.

E si ou permet mwan Mr Speaker, zis pou ekliersi sa pwen lo kote *nepotism* diskriminasyon, ou konnen, bann *Chairperson* bann Lasosyasyon Sportif i anrezistre, i dan domenn piblik,

lekel ki *Chair*, lekel ki trezorye. E mon krwar diskriminasyon i de kote li.

Si, par egzanp nou kot *Sports*, Departman *Secretariat NSC* i pa reakte lo en demann ki kapab ganny fer, ganny negosye avek nenport ki *Chairperson*, *Vis-Chairperson*, trezorye, manm komite lasosyasyon, vi akoz son sinyatir ouswa son paran, ouswa son bann afilyasyon politik, ouswa relizyez, i apel diskriminasyon. Donn li akoz i parante, piti tel, i en labi, i en diskriminasyon. Pa donn li osi tou i vin en diskriminasyon.

Nou, nou pa regarde lekel. Napa okenn Lalwa Sesel ki anpes personn vin en *Chair* ouswa en *Vis-Chair*, trezorye, nenport ki lasosyasyon i drwa tou Seselwa, e nou, nou bezwen respekte sa drwa pou Seselwa asosye. E letan nenport ki... I kapab demen nenport ki zanfan, nenport ki Onorab lo sa kote latab, lo sa kote latab ki pou vini ki *Chairperson* en Lasosyasyon Sportif, i bezwen lasistans Mr Speaker, ofisyelman, nou pou asiste zot. Mersi.

MR SPEAKER

Mersi. Nou a pran kestyon...

MR SPEAKER

Nou a pran kestyon *Leader Lopozisyon*, siplemanter silvouple? Onorab Pillay.

HON SEBASTIEN PILLAY

Mersi Mr Speaker. Mr Speaker, mon ti a kontan ler mon pe demann mon kestyon, ki *at least* mon kestyon i ganny... Ou les mon kestyon ganny reponn par Minis, akoz son louvraz e son travay pou vin reponn kestyon, e i pa ou louvraz pou reponn kestyon dan son plas.

MR SPEAKER

I mon louvraz diriz kestyon dan Lasanble.

HON SEBASTIEN PILLAY

I pa ou louvraz pou reponn kestyon dan son plas, Mr Speaker.

MR SPEAKER

Onorab! Onorab, i mon louvraz diriz kestyon, e mon demann ou pou silvouple gard respe. Prosede avek ou kestyon.

HON SEBASTIEN PILLAY

Non Mr Speaker, mon gard respe...

MR SPEAKER

Prosede.

HON SEBASTIEN PILLAY

... Akoz i enportan ki Minis i kapab reponn bann kestyon ki ganny demande. Premye kestyon ki nou ti a kontan konnen, ok. Ou'n dir nou i annan en *lease* ki'n ganny sinyen avek Federasyon, avek Lasosyasyon *Rugby*, ok?

Eski Lasanble i kapab ganny sa *lease* ki'n ganny sinyen avek Lasosyasyon *Rugby*, ok? E si i annan en kopi avek zot, zot kapab donn nou pou nou kapab war egzakteman ki'n ganny sinyen avek Lasosyasyon *Rugby*?

Dezyenmman Mr Speaker, Minis i dir ek nou koumsa poudir in napa okenn nepotizm lafason ki zot in swazir pou donn sa landrwa Lasosyasyon *Rugby*. Me nou, nou konnen poudir sa dimoun ki pe *front* Lasosyasyon *Rugby* se garson Minis Fonseka, ok?

E i kler pou dir ki ler sa demann in vini, sa demann in ganny *fast-tracked* akoz in al direk kot ou, apre deswit in desann, e desizyon in ganny pran dan en kourt dele letan.

So, kestyon ki nou annan pou ou se; eski lefe ki i garson Minis ki'n fer sa demann, eski se sa rezon ki ou Minister, e non pa NSC ki'n *fast-track* pou ki sa demann in ganny aksepte dan en kourt dele letan? Sa i mon premye kestyon.

Mon dezyenm kestyon, ler ou'n reponn Onorab Cosgrow, ou'n dir nou koumsa poudir ou pa okouran si okenn lakonpannyen lalkol in vizit sa landrwa. Me selman ou dir nou pou dir lalkol pa pe ganny vann dan sa landrwa. Eski ou pe dir nou, eski konfirmen ek nou la ozordi dan Lasanble, si lalkol pa pou ganny vann dan sa landrwa?

Baze lo lefe ki Prezidan li menm in dir dan *meeting* piblik ki lalkol i en adiksyon nimero 1, konfirmen avek nou ki lalkol pa pe ganny vann dan sa landrwa akoz sa ki nou, nou okouran se ki *Seybrew* in vizite sa landrwa ki ou, ou pa okouran. So, either nou, nou mal or ou, ou mal.

Me ki ou bezwen konfirmen koman Minis, konfirmen avek nou si lalkol pe ganny vann, pou ganny vann dan sa landrwa, akoz mannyer nou konpran Lasosyasyon *Rugby* pe al fer en *club house*? Ok. E en *club house*, nou tou nou konn *Reef Golf Club* mannyer son *club house* i ete, se sa fason ki en *club house* i ganny fer. Prezan mon trwazyenm kestyon Mr Speaker.

MR SPEAKER

Eskiz mwan. Eskiz mwan Onorab, konbyen kestyon ou annan?

HON SEBASTIEN PILLAY

Mr Speaker, *PNQ* i ale ziska 10er.

MR SPEAKER

Nou a fer li sa enn dernyen.

HON SEBASTIEN PILLAY

PNQ i ale ziska 10er, Mr Speaker.

MR SPEAKER

Mon a donn ou...Onorab, Onorab, nou a fer li sa enn trwazyenm, dernyen kestyon.

HON SEBASTIEN PILLAY

Mon pa konnen akoz ou pe ankoler ozordi bomaten Mr Speaker, me mon trwazyenm kestyon...

MR SPEAKER

Pa ditou.

HON SEBASTIEN PILLAY

I tre senp. Avan sa, sa landrwa ti pe ganny servi pou *store* bann lekipman osi *as well*, e ti osi annan en dimoun, bann dimoun ki travay avek mon krwar Federasyon Atletik, ki ti pe okip sa landrwa, e ti annan dimoun la, *ok?* Ki pou arive avek sa *storage* lekipman, e ki

pou arive ek sa bann dimoun ki ti sa landrwa?

E lefe ki sa landrwa ti osi ganny servi par bann zofisyen, e lefe ki nou pe *refurbish* Stad Popiler, sa landrwa ti osi ganny servi, eski aprezan bann Federasyon pou bezwen demann permision avek Lasosyasyon *Rugby* pou servi sa landrwa, vi ki ou'n fini *lease* zot sa landrwa, e alors pey kotizasyon Lasosyasyon *Rugby*?

Oubyen eski sa landrwa pou reste pou *NSC*, pou ki tou Federasyon i kapab servi, menm si Lasosyasyon *Rugby* ki pe sipoze *caretaker* pou sa? Mersi Mr Speaker.

MR SPEAKER

Mersi Onorab. Minis, adres bann kestyon.

MINISTER MARIE-CELINE ZIALOR

Mersi, Mr Speaker. In telman demann lakantite, si mon manke i ava kekfwa petet demann pou repete. Premye, kopi *lease*, napa problem, Mr Speaker, nou ava fer ou lofis ganny kopi sa *lease*.

Dezyenm zafer *fast-track*. Ou konnen, nou annan en ta spekilasyon nou zis dir san ganny bon lenformasyon. Napa okenn *fast-track* ki'n arive, Mr

Speaker. Lannen pase letan nenport ki demann ofisyel ti vini dan bann peryod apre Out lannen pase ziske Desanm, i ti vin swa kot mon lofis, swa kot departman akoz senpleman CEO NSC ti bezwen pran en pe konze. I ti'n ganny aepre 60ekek, enkli bann larestan osi ki ti la en pe letan, pa ti'n pran konze.

E i annan bann keksoz ki pou fer avek lenfrastriktir, nou ti partaz louvraz, sa ti vin kot *Secretariat* kot lofis. E parey mon ti vwar Beau Vallon Sports Club pe ekout zot *projet*, parey avek lezot osi bann Federasyon Lasosyasyon Klib ki'n vini, nou'n ekout bann *projet*, regarde, *channel* zot kot zot sipoze ale.

Bann larestan, swa i al kot departman, ouswa in al avek bann lezot dimoun ki nou ti'n idantifye pou desarz responsabilite, akoz NSC napa *Deputy CEO*. E sa 2 koman nouvo *CEO* in antre dan lofis, sa in ganny donnen, e tou negosyasyon, tou keksoz in ganny fer avek son direksyon.

E mon asire, mon garanti ki in napa okenn *fast-track*. Sa i spekilasyon Mr Speaker. E larestan osi tou, i annan en kantite si zot oule - i annan en kantite bann lezot Lasosyasyon

Federasyon Klib Sportif ki annan bann zoli *projet*.

Dayer mon dir ek zot mersi bokou ki zot in rann lapel partenarya, prive, piblik ek Gouvernman, pou vini. En kantite nou'n nobou kapab vwar, Mr Speaker, e i annan osi tou ki son bann *projet* pli, pli gran. Zot pran en pe letan pou zot devlope, bann ki senp i pase Mr Speaker.

Lo kote lalkol pou vann, sa *lease* i pou ganny en kopi. I ava kapab vwar ladan Lasanble ki i annan bann kondisyon i anpes fer *trade*. *Trade* ki savedir biznes ou pa kapab vann.

Lo kote *reallocate*. *Relocate* okenn biro ladan ki ti pe servi, ladan ti annan bann keksoz lofis avek WADA ki Lasosyasyon Anti-Dopaz ki negosyasyon vwala ki ti ganny fer ki zot, zot *still* ganny en landrwa pou zot kapab ganny zot lofis. E wi, tou larestan, mon repet ankor, larestan *sports* pou servi sa landrwa e kapab servi. Mersi bokou Mr Speaker.

MR SPEAKER

Mersi. Onorab Pillay nou a reste lo klarifikasyon silvouple.

HON SEBASTIEN PILLAY

Mersi Mr Speaker. Mr Speaker, lo sa premye pwen, mon pe regard *Verbatim Lasanble from*

letan nou ti annan Bidze pour NSC, e kestyon ki ti ganny demande avek Minis sa letan, *regarding* pozisyon CEO NSC. Si i ti pe al ver *resignation*, e NSC ti pou napa en *CEO*. Minis ti dir nou, non, ti pou napa *resignation*, e pa ti koz nou ki CEO NSC ti pe al dan *long* konze, ok.

MR SPEAKER

Eskiz mwan. Eskiz mwan Onorab! Ou annan en kestyon orizinal devan ou, e ladan i napa referans avek pozisyon CEO NSC. Ki pe arive avek silvouple? Ou pe demann en klarifikasiyon? Ou konpran mwan? Mon pa pe blok kestyon mwan, mon zis anvi ki kestyon i reste annord avek lentansyon *Standing Orders* pou kestyon. Silvouple, korpere Onorab.

HON SEBASTIEN PILLAY

Mersi Mr Speaker. Mr Speaker, an tout korperasyon avek ou, Minis ki'n entrodwir sa eleman dan son kestyon. Mwan mon bezwen, Minis pe dir mon, mon pe fer spekilasyon. Mwan, mon bezwen montre Minis poudir mon pa pe fer spekilasyon, ki se li ki pa pe donn Lasanble lenformasyon ki korek, e i pe servi en leskiz, akoz i pe dir nou CEO NSC ti'n akimil konze *regarding* sa desizyon.

Sa ki nou ti le konnen si se ki desizyon in ganny pran a son nivo, oubyen a nivo *NSC*? E sa ki kler se ki Minis pe *avoid* dir pou dir desizyon in ganny pran a son nivo baze lo en demann ki'n ganny fer par garson en Minis. E se sa nou premye pwen.

Dezyenm kestyon Mr Speaker, an relasyon avek sa kontra an relasyon avek *trade*, Mr Speaker. Minis i dir nou koumsa poudir *there will be no trade* an relasyon avek sa kontra, ok?

Eski Lasosyasyon *Rugby* i konnen sa ki zot pe dir, *there is no trade*, ki zot in dir dan sa kontra. So, kan eski Lasanble i kapab ganny sa kontra ki nou pe koz lo la? Eski zot in vin ek sa kontra ozordi bomaten la? I avek zot? Si zot kapab donn nou sa kontra, Mr Speaker pou nou war.

E mon trwazyenm klarifikasiyon, mon ti annan 3 kestyon, i konsern Lofis *WADA*. Mr Speaker, eski mon kapab ganny aret enteronp... Sa bann Manm lot kote i kapab enteronp mon silvouple? I annan bann zanfan la anler, mon pe koze, aret enteronpe.

MR SPEAKER

Onorab, Onorab! Gard lord!

(laughter)

MR SPEAKER

Onorab, ale, fer ou dernyen pwen.

HON SEBASTIEN PILLAY

Wi, Mr Speaker, annou montre poudir nou konport nou.

MR SPEAKER

Fer ou dernyen pwen!

HON SEBASTIEN PILLAY

Mersi Mr Speaker, mon dernyen pwen. Ou'n dir nou koumsa poudir Lofis *WADA* pou ganny en lot lokasyon, e sa fason ki sa landrwa ti pe ganny servi, i pou ganny *accommodate* sa landrwa. Eski sa desizyon in ganny kominike avek tou bann dimoun, tou bann parti prenan?

MR SPEAKER

Mersi.

HON SEBASTIEN PILLAY

Eski zot tou zot konnen sa?

MR SPEAKER

Nou a permet Minis reponn silvouple. Minis, ou repons?

MINISTER MARIE-CELINE ZIALOR

Mersi bokou Mr Speaker. Mr Speaker, zis pou nou kapab

montre poudir sa bann keksoz ki Onorab pe dir kot mon pe ganny akize, nou a pe fer lapreferans, nou pa pe koz laverite, me mon krwar rikord i a montre poudir vre ti annan konze lannen pase ki ti fer, e sa desizyon kot sa *lease...* pa mwan ki ti fer, napa mon sinyatir lo la.

Desizyon pa ti ganny fer... Desizyon pou vvar, pou ekout Lasosyasyon *Rugby*, en lasosyasyon pa en dimoun, parey desizyon pou ekout tou lasosyasyon ki ti anvoy en formel *request* kot nou lofis, pou nenport ki proze ek lenfrastriktir sportif ki mon'n vvar zot tou, zot tou, lannen pase pandan letan kot *CEO* ti bezwen pran konze. E sa bann negosyasyon pou rod kriter pou *lease*, sa se *NSC* ki'n fer Mr Speaker, pa lofis Minis.

E eski in annan negosyasyon, in fer avek *CEO* ki la o bor mwan, avek sa bann dimoun ki ansarz *WADA*? Sa se bann negosyasyon ki zot in fer antre zot. Mwan mon pa'n ladan mwan. Mon pa'n ladan ditou. E tou bann demann lenfrastriktir ki vini, nou regarde ki zot pe demande lenfrastriktir. Tou bann negosyasyon, swa i al kot *AG's Office* pou *lease* pou bann gran, gran *projet*, ouswa i al dan

Cabinet pou pran bann desizyon.

E kantmenm petet, Mr Speaker, mon pou repet ankor, diskriminasyon i 2 bor, i 2 kote, i zis parey parfwa bann dimoun nou krwar poudir diskriminasyon rasyal lapo, i pa fer bann dimoun serten kouler lapo parey blan, ou krwar zis letan ou fer ek dimoun nwar ki diskriminasyon, tou lede i diskriminasyon. Mersi.

(APPLAUSE)

MR SPEAKER

Mersi Minis. Bon, nou a termin la pou *Private Notice Question*. Mon remersye Minis e son zofisyen pou zot partisipasyon, e mon a envit zot fer zot depar, e bonn kontinyasyon dan zot travay.

Mersi. An menm tan madanm rapporter, mon a demann ou pou apel lot Minis pou kontinyasyon kestyon. Yes, Onorab Pillay?

HON SEBASTIEN PILLAY

Mersi Mr Speaker. Mr Speaker, mon oule *raise en matter of privilege* an relasyon avek lafason ki nou prosede avek *Question Time* sirtou *PNQ*.

Mon le met lo rikord Lasanble ki mon note ki sak fwa en kestyon i *involve* bann

aksyon bann akter ki dan Gouvernman, e kot nou pe demann serten kestyon oubyen leklersisman lo bann size parey nepotizm, mon pa oule krwar e mon pa ti a kontan krwar, me mon santi poudir i annan serten lesey pou anpes sa bann kestyon ganny demande dan Lasanble. E petet i neseser pou Lasanble pran refleksyon sa Mr Speaker.

MR SPEAKER

Mersi.

HON SEBASTIEN PILLAY

Akoz i paret poudir sak fwa nou annan en kestyon kontansye, nou ganny dir degaze demann kestyon, nou ganny dir Minis pa bezwen reponn, nou ganny dir en kantite keksoz. Zanmen Minis i ganny sans, i ganny dir, be fini reponn kestyon. Sa mon le met devan ou Mr Speaker, an toute respe. Mersi.

MR SPEAKER

Mersi Onorab, e mersi pou apel pou sa leklersisman. Mwan mon pwennvi i koumsa; mon krwar sa sesyon ki'n deroule la in montre en keksoz ki arive ase souvan dan Lasanble, se kot en Manm i anmenn en kestyon, e kestyon i ganny deborde par lezot size, ki vin zis en fason pou lapes, pou ganny en

akizasyon, oubyen en alegasyon met lo rikord.

I pa reste lo demann pou lenformasyon. I vin en lesey pou *argue* ki i annan en alegasyon la, e se sa ki mwan mon konsernen avek ki mannyer Lasanble i deroule. Mersi.

E avek sa mon a swet... Bon mon a dir bonzour Minis pou Zafer Etranzer Errol Fonseka e zofisyen avek li pou konmans sa sesyon kestyon; Mr Alain Volcere *Principal Secretary* pou Zafer Entern e Mrs Erica Dufresne *Chief Immigration Officer*. Nou ava al lo kestyon bann Manm. E mon komans avek nimero 51, kestyon Onorab Esparon. Oh, wi, annefe Onorab Esparon ti notifye mwan ki son kestyon pou ganny pran par Onorab Kelly Samynadin.

HON KELLY SAMYNADIN

Mersi Mr Speaker. Bonzour Minis ek ou delegasyon, e tou dimoun a lekout. Kestyon nimero 51 par Onorab Regina Esparon i kir *comme swivan*;

Eski Minis i kapab dir Lasanble, ki bann nouvo mekanizm ki son Minister pe met an plas pou pli byen detekte bann travayer etranze ki zot *GOP* in eksipre, e ki sanksyon ki zot pran ek bann endividou lakonpannyen pou

ki sa bann keksoz pa repete? Mersi.

MR SPEAKER

Mersi Onorab. Minis, ou repons pou sa kestyon?

MINISTER ERROL FONSEKA

Wi, Mr Speaker. *First of all*, bonzour Mr Speaker, Deputy Speaker Onorab Henrie, *Leader of Government Business*, i pa la, *Leader of the Opposition* Onorab Sebastien Pillay, tou Manm Lasanble e tou dimoun a lekout. I fer gran plezir pou vin ek zot ozordi pou koz lo en size tre enportan, e pou osi enform zot sa kantite louvraz ki bann *new staff Immigration* e sa bann zefor enorm ki zot pe met deryer travay tre enportan dan nou pei, dan sa domenn *GOPs* ←plural kot dimoun i vin travay dan Sesel.

I en size ki *Immigration*, nou'n asize depi ler nou'n fer bann reform. Nou annan en *new Chief Immigration Officer* Mrs Dufresne *here o bor* mwan and PS, ki PS overall in *Ministry of Internal Affairs*, Nou'n recruit new dimoun dan *GOP*, dan Imigrasyon an zeneral, *new customer service attitude, new KPIs, new strategic plan*.

E sa i an mars, e mon krwar nou pe ganny bann bon rezulta, e mon pou les sa

dimoun ki ansarz, *the Chief Immigration Officer*, pou eksplik zot sa kantite louvraz ki pe ganny fer dan *Immigration*. Alor mon a pas laparol ek Mrs Dufresne *Chief Immigration Officer*. *Merci, pour instant.*

MR SPEAKER

Mersi Minis. Mrs Dufresne, ou kapab adrese.

CHIEF IMMIGRATION OFFICER ERICA DUFRESNE

Bonzour Mr Speaker. Bonzour tou bann Manm Onorab. Mersi Onorab Espanon pou ou kestyon. Mr Speaker, pou pli byen reponn sa kestyon, i enportan pou konpran akoz, e ki sirkonstans ki anmenn en travayer etranze dan sityasyon kot son permi travay - savedir sa ki nou apel *GOP* - i ekspire.

Tenir kont ki son sityasyon i vin iregilye o moman ki son permi i ekspire, savedir menm 1 zour ki ou permi i ekspire, ou pou tonm dan sa sityasyon iregilye. Letan en *GOP* pe al terminen, sa anplwayer i fer enn ant sa de keksoz. An premye; Swa, i pey sa travayer tou son byen e donn li son tiket avyon pou li retourn dan son pei, oubyen 2; i fer demars pou renouvre sa permi travay.

E, pou ki rezon prezan en *GOP* i ekspire? Laplipar ditan i

annan en retar dan prosesis pou reganny sertifika lanplwa, akoz avan ki en anplwayer ouswa endividé i vin fer son prosedir pou renouvre *GOP*, i pou bezwen ganny sa laprouvasyon kot Departman Lanplwa avan.

An verite, Departman Imigrasyon i touzour enform bann anplwayer ki zot merit depoz zot laplikasyon pou renouvre permi travayer etranze, *at least* 6 semenn avan dat ekspirasyon. Savedir zot bezwen komans zot prosedir byen boner.

Parfwa osi nou bezwen admet, i annan dezakor lo kestyon konpansasyon ek lapey, e sa i okazyonn dispit ant travayer e anplwayer ki, pou fini kont, sa ka i bezwen al ganny rezourd kot Tribunal Lanplwa.

I annan serten lenstans osi ki i annan lanket konsernan labi oubyen i annan alegasyon trafik imen. Me, i annan osi lenstans ki annan move volonte lo lapar sa anplwayer, soutire... Move volonte par sa anplwaye li menm, sa etranze, soutire parfwa par en konplis lokal.

Menm sityasyon lanplwa sa travayer etranze in fini ganny rezourd. In fini ganny son saler avek son anplwayer, me i annan lenstans ki zot menm refize kit pei, sa anplwayer in fer son

prosedir. I annan lenstans ki i anmenn zot *airport*, me *from airport* zot menm zot, zot deside pa kit pei, e la zot al kasyet.

Bon, si nou pe get prezan statistik permi ki'n ekspire, *hmm, i comme swivan;*

Bann ka ki nou apel trafik imen, bann ka sispe trafik imen, an se moman i annan 11 ka ki pe ganny *investigated.*

Bann *grievance* ki'n ganny mete kot Tribunal Lanplwa i annan 51.

I annan an se moman la ozordi, i annan 277 laplikasyon ki'n ganny depoze pou renouleman permi kot Departman Imigrasyon, savedir bann aplikasyon ki nou pe travay lo la, kouraman.

Nou annan nou 4 travayer etranze ki pe esper prosedir pou zot ganny rapatriye. Nou annan 2 travayer etranze ki dan prizon, in ganny enkarsere, e nou annan 2 etranze ki lo rimann.

Savedir ler nou'n pran kont tou sa bann ka, statistik anplwaye ki ankor dan pei, e ki anplwayer pa ankor vin fer prosedir renouleman zot permi kot Imigrasyon, i ozordi i 258. Sa sif, Mr Speaker, pe ganny kontinyelman *monitored de près* e sa i pe ganny fer par nou Seksyon *Enforcement* an *liaison*

avek bann anplwayer konsernen.

Bon, dezyenm vole kestyon ti pe demande, ki mwayen ki nou annan pou deteksyon? Nou annan en sistenm deteksyon an plas, e sa i enkli surveyans elektronik. Sistenm Imigrasyon i kapab fer nou konnen lenstans ki en permi in ekspire, e menm i kapab fer nou konn 1 mwan davans kantite permi ki pe al ekspire.

Par egzanp nou kapab konfirmen ki depi yer, Lendi le 29 May ziska le 31 Desanm 2023, pou annan 7mil517 permi ki pou ekspire. Wi, ziska Desanm 2023 sa, en. Ki mannyer nou ganny nou bann lenformasyon?

Nou lenformasyon parfwa i sorti kot bann anplwayer ki'n ganny afekte, zot permi in ekspire, zot anplwayer pa ankor vin devan pou renouvre. La zot vin kot nou zot vin fer zot konplent.

I annan lenstans nou ganny lenformasyon avek manm piblik, ki zwenn sa bann travayer e zot notifye imigrasyon. E osi par bann *spot checks* ki ganny fer par nou Seksyon *Enforcement*.

Bon, bann mezir prezan ki'n ganny met an plas kont anplwayer koupab ki negliz zot travayer; *premier lieu*, napa

nouvo GOP ki ganny aprouve ziskan aryeraz i ganny peye. Aryeraz i annan 2 vole ki nou track aryeraz. I kapab le moman ki sa anplwaye i pe kit pei. Ler i kit pei la nou, nou fer kalkilasyon kantite ki sa anplwayer i drwa lo sa permi.

Savedir sa kalkilasyon i pou dat ki sa permi in ekspire, ziskan dat ki sa etranze i kit pei. Sa kalkilasyon, le moman sa anplwaye i kit pei, nou notifye sa anplwayer an ekrir, nou fer li konnen, ou travayer in kit pei, i annan tan larzan ki ou sipoze settle kot Departman Imigrasyon.

E dan nou let osi nou fer li... Nou kosyonn li pou dir, ou pa pe ganny okenn nouvo permi kot Imigrasyon tan ki ou pa settle ou bann travayer etranze ki'n ale lo permi ki'n ekspire, e menm si ou annan travayer etranze ki ankor dan pei, ki ou pa ankor fer prosedir pou renouvele zot GOP.

Bon, nou'n osi depi Zanyye, nou'n pran konsiderasyon 2 keksoz ki nou'n met an mars. Bann permi ki'n ekspire pou en peryod mwens ki 2an, e sa bann travayer i ankor dan pei, sa bann anplwayer i ganny akorde strikteman en peryod 1 mwan pou nou renouvele permi sa bann etranze.

Pou bann permi ki'n ekspire pou plis ki 2an, prenon kont ki en *approval* ki ou gannyen kot lanplwa i 2an. Sa permi i ganny konsidere pa renouvlab. Sa bann anplwayer i ganny donnen zis 48erdtan pou tir zot travayer etranze dan pei.

Me an tou lenstans, Departman Imigrasyon pe travay konzwentman avek Departman Lanplwa, pou fer sir ki sa bann travayer i ganny peye zot saler avan zot kit pei, akoz nou pa pe fer li en keksoz arbitrer ki zis nou tir travayer etranze, menm si zot pa ankor ganny peye zot *dues*. So, en keksoz ki nou fer konzwentman avek Departman Lanplwa. Mersi Mr Speaker.

MR SPEAKER

Mersi. Onorab Samynadin, eski ou annan siplemanter pou mete?

HON KELLY SAMYNADIN

Wi, Mr Speaker. Zis en pti klarifikasyon. Mrs Dufresne ou'n mansyonn bann diferan *chiffre* ki *include* 51 ka *grievances*, apre ou'n mansyonn Departman Lanplwa.

Eski i annan lezot *stakeholders* ki zot travay avek pou kapab *come up* avek sa bann diferan *chiffre*, kot ou'n

mansyonn trafik imen, renouvleman permi, repatriyasyon, prizon, rimann, zis pou benefis nou bann dimoun a lekout, ki bann lezot diferan *stakeholders* ki zot travay avek pou zot kapab fer zot travay? Mersi.

MR SPEAKER

Mersi. Mersi Onorab. *Panel*, mon annan en gran lalis kestyon. Silvouple gard repons direkteman lo kestyon ki'n ganny poze. Wi, Mrs Dufresne pou adrese? Wi.

CHIEF IMMIGRATION OFFICER ERICA DUFRESNE

Wi, mersi Mr Speaker, mersi Onorab. Wi, nou travay *conjointement*, premyerman parey mon'n dir avek Departman Lanplwa, byensir, avek *Secretariat pour TIP* - (Trafik Imen), sa i en louvraz ki nou fer toulezour. Nou travay osi avek bann Lazans, akoz Imigrasyon ki nou manda nou? Pou regulariz tou etranze ki dan pei. Savedir tou *stakeholders* ki annan pou fer avek travayer etranze or etranze dan pei, i en konsern pou Imigrasyon.

So, si i neseser, nou pou bezwen al tap laport sa antite an kestyon pou nou konnen bann etranze kwa ki pe arive avek zot, par egzanp, i annan

serten lenstans ki nou menm bezwen kontakte kot *Judiciary* pou bann ka, kantite etranze, ouswa lapolis.

I annan lenstans ki nou bezwen travay *conjointement* avek lapolis osi pou bann etranze ki dan pei ki nou pe rode. La i annan, nou pe travay avek lapolis osi pou bann mezir pou bann etranze ki nou pa vwar, Onorab, akoz i annan lenstans la, i annan anplwayer i fer tou sa ki i merit fer li pou pey son travayer, in met li lo *airport* e li in deside pa ale e i kasyet.

Nou annan anplwaye etranze ki kit Mahe, i al kasyet Praslin, La Digue zis pou li pa ale. E i annan lenstans ki ou pe sey rod li, ou pa pou ganny kontak avek zot, e la ki nou rod lapolis pou kapab asiste nou, pou nou kapab *locate* sa bann travayer etranze. I annan en louvraz la mon kapab dir ou ki *weekend*, Seksyon *Enforcement* in al fer lo Praslin e La Digue pou nou *allocate* serten travayer etranze ki'n kit Mahe in al kasyet lo sa bann zil. Mersi Mr Speaker.

MR SPEAKER

Mersi.

MINISTER ERROL FONSEKA

Mr Speaker, mon kapab zis *sum up* en pti gin?

MR SPEAKER

Wi, Minis.

MINISTER ERROL FONSEKA

Zis mon anvi *sum up*. Mersi CIO pou ou leksplikasyon la. Zis mon le eksplike ki ler nou ti fek komans travay, nou ti a pe *deal* avek bann *chiffre* dan mil, 4, 5, 6mil. La nou pe arive, mon pe get nou'n sorti nou vin 258, e 258 ki nou konnen, ki nou konnen lekel ki la, so nou pe fer en travay enorm.

E mon le osi remersi bann nouvo lelan ki pe pase dan *GOP section especially*, akoz sa louvraz ki met en kantite presyon pou servi publik. E nou annan 6 dimoun dan *GOP*, e zot *KPI*, zot bezwen fer *at least 25 GOPs per day*, e menm dan 4 zour, le 22 ziske, Lendi ziske Vandredi zot in fer... Ti annan en kantite *GOP* apepre... (Oli mon *chiffre* la)?

Ti annan apepre 487 *GOP* ki zot in bezwen fer. Sak fwa nou fini fer sa bann *GOP*, e zot annan sa 7 zour pou fer sa, tousala i vin lo latab sa 2 dimoun ki o bor mwan la, aprezan zot bezwen *proof* sa. I annan en *proof* ki a ganny fer avan i arriv la, zot, zot bezwen *proof* sa. So, lapliparditan nou

war sa bann dimoun, sa tim pe travay, pa zis dan lasemenn, menm Sanmdi, akoz nou la pou servi Lepep, pou servi bann travayer ki bezwen sa servis.

So, an tousala nou bezwen osi fer sa louvraz *expired GOP* pou fer sir ki tou dimoun i ganny regle byen. So, an tou leka, mon *personally* mon tre satisfe mannyer travay pe ale. I en keksoz ki zanmen pou fini, me selman pli tar petet mon a eksplik en pti gin, nou bezwen *new system* akoz en kantite sa bann louvraz i ganny fer *manually*.

En dimoun i bezwen tyek isi, tyek laba, anmar isi, anmar laba pou ganny sa bann larepons. Me nou, nou bezwen bann sistem *automated* la ek sa kantite demann ki annan dan *Immigration*. Mon pa le tro al bokou, be i annan lezot keksoz mon pou azoute pli tar. Mersi Mr Speaker, *pour instant*.

MR SPEAKER

Mersi. Mersi Minis. Nou a pran sipleanter bann lezot Manm. Onorab Pillay?

HON SEBASTIEN PILLAY

Mersi Mr Speaker, e bonzour Minis ek ou delegasyon, mersi pou zot bann larepons. Baze lo larepons ki Mrs Dufresne in donnen, sa 7mil517 *GOP* pou

reprezent apepre R7.5milyon ler zot fer *processing fee*, e i kapab en pe plis larzan. Savedir nou pe koz en sonm konsiderab ki pei i kapab anmase.

Ki zot pe fer pou asire ki zot rewvar sirkonstans ki mannyer zot pe *manage the whole system GOP*, akoz i kler ki nou annan en problemm ler 258 dimoun pa ankor renouvre, *and then zis zot evapore dan lasosyete?*

Napa en mekanizm ki zot kapab met an plas ki zour sa *GOP*... Avan sa *GOP* i ekspire, zot pe pran kontak avek sa anplwaye... sa anplwayer ki'n fer sa dimoun vini, e zot pe *find out* kote sa bann dimoun i ete?

Akoz la nou annan nou en group dimoun ki dan sosyete nou pa konnen ki zot *status*, kot zot ete, e si i annan en krim ki arive, sa bann dimoun i kapab *well* pe fer krim, me ou pa pou konnen se zot ki pe fer akoz zot pa deklare ki zot Sesel, ou pa konnen si zot ankor Sesel. Mersi Mr Speaker.

MR SPEAKER

Mersi Onorab. Minis?

MINISTER ERROL FONSEKA

Wi, mersi Onorab pou ou kestyon. Zis en pti klarifikasyon. Sa 7,517 i zis en *chiffre* ki demontre ki zis an

Desanm, si ou pa fer naryen, sa *is the chiffre* ki ou pou gannyen ki *expired*, i pa vedir i pou *expired*.

I vedir si nou pa fer naryen, *this is the amount* ki nou *expect to be expired*, akoz baze lo dat ki zot in *apply*, zot in ganny zot lo *GOP*. So, i pa vedir sa ... Sa *chiffre* i zis en *indication* pou nou *manage situation*, i pa en *indication* ki keksoz mannyer i ete *in real time*.

Lo kestyon nouveau fason fer keksoz, wi *the immigration system* i vreman *outdated and* dizon par egzanp en dimoun i sorti lo en *GOP* i marye i vin *independent, the system* pa *automatically adjust* son lekor, i reste koman en *expired*.

Dizon en dimoun, savedir si i al lo en lot permi, ki *totally legal*, i bezwen sa bann diferan departman pou *inform the others, as apposed to* sa *computerised system* pou *flag* en pti gin pou *adjust* son lekor. E menm si par egzanp dan *Civil Status* si en dimoun i mor lo en *GOP*, i pa otomatikman, si *Civil Status* pa enform *the other side*, i menm, menm *building*, selman si sa dimoun pa enformen ou pou ganny en *expired GOP*.

So, nou bezwen en *new system* definitivman, ki *modernised*. *Unfortunately*, sa

bann *new system* konmela zot deal ek *gainful occupation permit* dan bann pei.

Nou, nou anvi en sistenm ki *deal* avek tou *immigrant* ki antre dan Sesel ki la lefe ki nou annan *the Seychelles Electronic Border System*, ki permet nou tyek tou dimoun ki antre dan pei *upstream*, la i en souris ki mon krwar ler nou get nou novo sistenm nou bezwen *marry* sa, ki nenport dimoun ki antre, menm i pa lo en *GOP*, e ki nou kapab kontrol tou nou bann *permits* nou bann zafer koumsa.

So, there is a need for that, e nou pou bezwen... Nou pe regard sa akoz parey zot konnen Gouvernman pe al digitalize nou bann service, so, this is part and parcel of this digitalized program.

En lot keksoz, Onorab, zis pou enform ou pou fer keksoz pli fasil is *online GOP*, wi ki o moman ki *Immigration* in resevwar, premyerman *approval from employment*, apre zot, zot in fini konpran ki tou bann papye neseser sorti kot sa dimoun, in fini an plas, nou kapab avan nou al fer en *GOP*, nou kapab donn en *approval straight away* e *online* tret sa sityasyon ki pou *facilitate* sa kantite louvraz ki enpakte sa 6 staff ki pe fer sa louvraz.

Lo ou dernyen kestyon 258; 258 in the biggest scheme of thing i en pimple. Ok? Natirelman si ou annan en sistenm efikas, ou pou pli fasil pou fer sa, me zanmen ou pou ganny en zero situation dan immigration situation.

So, mwan, mon *krwar in terms of letan ou compare* mannyer i ti ete *from* avan e mannyer i ete ozordi, sa en *gro achievement* e mon pa enterese pou *strike at zero, because* dan lavi keksoz pa arive *zero. It just doesn't happen*. Nou kapab *dream*, me selman i pa pou arive, so mwan mon krwar nou pe *hit really a good mark e well done to the team. Thank you.*

MR SPEAKER

Mersi. Ou pou? Klarifikasyon Onorab? Silvouple, zis lo klarifikasyon. Go ahead. Ale.

HON SEBASTIEN PILLAY

Non, Mr Speaker. Mon le zis press pou en larepons kler. Ok? Nou annan sa bann dimoun ki zot *GOP* in eksipre, e zot somewhere dan pei, ok? Mon ava demann li pli direk. Ki Departman Imigrasyon e Minister Zafer Entern pe fer pou al anmas sa bann dimoun ki zot *GOP* in eksipre, e determinen si zot status i in marye, in mor, in

isi, in laba? Sa ki nou anvi konnen Mr Speaker.

MR SPEAKER

Minis, gard ou repons lo sa kestyon silvouple. Mersi.

MINISTER ERROL FONSEKA

Yes, napa problemm ek sa. Egzakteman sa ki nou pe fer. *In fact, si i annan okenn dout, nou send out en be on the lookout warning.* Konmela which we post out of en face of a dimoun si vreman in sap nou. So, nou anba kontrol lo la.

Enforcement... One of the problems ki Onorab ou bezwen konpran, enforcement nou annan... Konbyen zot krwar dimoun pe al lo enforcement, nou annan lo enforcement? 3! Nou annan 3 dimoun lo enforcement, nou bezwen...Ou annan 4? I annan 4, in ganny en lot la, enn in ganny ...

So, we got 4 people. To be honest with you, 4 dimoun ler zot pe al Praslin, La Digue, lo bato, lo bann yacht pou gete, marine, bann dimoun maren ki par ler, you know, tousala. So, en kantite louvraz. So, nou kontan ler dimoun i enform nou serten keksoz. Par ler ou kapab annan en dimoun ki loose selman i pa'n vin through the system, nou annan en open

border isi, drog i antre partou parey zot konnen.

So, this is the challenge ki nou annan. Me selman on the whole the figures ki nou annan la, mwan mon satisfe avek, me selman of course, Onorab, it's something ki nou toultan nou bezwen pa relaxed lo la because it's an important part. So, mersi pou ou sipor lo nou louvraz ki nou pe fer. Mersi

MR SPEAKER

Mersi. Kestyon Onorab Vidot.

HON AUDREY VIDOT

Mersi Mr Speaker. Minis mon kestyon; Apart ki bann ka endividé ki zot bezwen liaison avek serten Lazans pou rod lenformasyon lo sa etranze, eski i annan en striktir an plas ki zot Departman kot Imigrasyon i ganny averti par lapolis, kot i annan bann etranze ki pe travay dan pei, ki si in fer kek lofans, oubyen i annan kek soupsyon, pou zot kapab annan serten lobzervasyon pou pli byen monitor?

Akoz nou pa anvi demen kot i annan etranze, espesyalman ki nou konnen poudir ek nou bann zanfan, bann etranze ki annan sa bann lespri tord la, ki harass nou bann zanfan, ler bann ka i vin pli agrave ki nou apre nou

konmans deside ki pou fer. Sa i enn.

Apre dezyenmman, dan zot bann sinksyon, dan bann ka parey, si parey zot annan lenformasyon oubyen levidans ki sa bann etranze pe fer bann aksyon parey, eski zot kit li la ziske ler son GOP i ekspir net, oubyen zot fer le neseser pou deport li? Mersi.

MR SPEAKER

Mersi. Minis, ou repons?

MINISTER ERROL FONSEKA

Mersi Mr Speaker. Mersi Onorab pou ou kestyon, 2 bon kestyon. Ou premye kestyon i *relate a lot with TIP*, prevwar sa bann lenformasyon. *Luckily* dimoun i anmennen kot nou, diferan fason, i kapab lapolis, me selman piblik menm i enform nou akoz dan louvraz travay dimoun i war ki pe arive.

So, nou pran sa serye, me ou kestyon lo sinksyon; *normally* ler in ariv lo sa bann sityasyon, *it's a police matter, a police matter*, e i kapab 2 keksoz. I kapab *unemployment issue* ki dan sa moman i reste ek *employment*, *Ministry of Employment* pou *deal* avek, e zot a servi zot bann lareg *employment*. Si i ariv lo sa ki ou ti pe koze *on the criminal side*, *then it's a police matter*, e nou

met *CID* lo la, *and then* nou pa pou les li ale, menm son *GOP* i *expire* nou pa pou les li ale akoz nou bezwen met lord lo li.

So, nou pa pou neseserman zis *get rid of li*, nou pou amenn li Ankour, nou pou fer Lalwa *point scores*. Mon pa konnen si *CIO* i anvi azout lo la *please?*

CHIEF IMMIGRATION OFFICER ERICA DUFRESNE

Mersi Mr Speaker. Zis pou azout lo sa ki Minis in dir, wi, nou annan bann sityasyon kot manm piblik, i annan menm anplwayer ki vin averti nou lo en etranze spesifik ki possibleman i kapab in komet en lofans ler i ti dan pei, in ale, ouswa in komet en lofans dan pei.

Parey Minis in elabore, si in komet en lofans dan pei, la i pou vin en ka lapolis. E tan ki lapolis pa ankor fini *investigate* sa ka, nou pa pou kapab tir sa etranze dan pei. Si i pou bezwen al fer fas avek lazistis, nou pou donn li sans al fer fas ek lazistis. Le moman si in ganny anprizonnen, son santans i fini, la i pou ganny en deportasyon.

Nou annan lenstans ki anplwayer etranze in fer par egzanp, malelve ek anplwayer. Nou annan lenstans ki travayer etranze in bat zot anplwayer, sa

le moman sa anplwayer i met sa ka dan lanmen lapolis, si i en ka ki nou vvar napa bokou pou *investigate*, la nou, nou pran en desizyon, swa nou pou fer sa etranze kit pei ale.

Byensir nou bezwen fer sir poudir sa anplwayer in fini *settle* tou son bann *dues* ki i drwa sa etranze, la nou pou fer li kit pei. I annan lenstans osi ki nou bezwen *barred* en etranze pou ganny en lot permi. Savedir la nou bezwen fer li antre dan nou sistem alert, kot nou mete, *for instance* ki i pa sipoze ganny en lot permi, me selman nou kapab fer li pou en pti dele letan sa, *at least* 6 mwan pou nou etidye sityasyon.

Si sa etranze apre ki nou'n fer nou *investigation*, nou vvar i napa okenn *cause*, akoz nou bezwen pran kont i annan lenstans anplwayer i fer sa malisyezman, en, zis akoz zot anvi tir en etranze dan pei, me i annan lenstans ki vre sa etranze in komet en lofans, la nou pran, la nou get sityasyon, nou kapab tir sa *alert* ler in ariv moman pou fer li. Mersi Mr Speaker.

MR SPEAKER

Mersi CIO. Wi, fer klarifikasiyon vit Onorab.

HON AUDREY VIDOT

Mon le zis en klarifikasiyon. Eski baze lo repons ki mon'n gannyen, eski Minis i kapab konfirmen poudir napa okenn pliferans dan ka i bezwen ganny zize apre la ki desizyon pou deporte? Zis klarifye sa.

MR SPEAKER

Mersi. Minis?

MINISTER ERROL FONSEKA

Korek. Si en keksoz, nou pa Lakour nou, so nou bezwen depan lo Lakour e zizman. Apre i annan, par ler i annan *human rights issues involved*, tousala i ganny pran par Lakour. Mersi Mr Speaker.

MR SPEAKER

Mersi. Kestyon Onorab Adelaide?

HON FRANCOIS ADELAIDE

Mersi Mr Speaker. Bonzour Minis ek ou delegasyon. Minis en pti kestyon. Vi ki nou okouran poudir i annan bann msye ek bann madanm ki vini, zot msye i annan i ganny GOP e i travay pou serten letan, e la mon annan en *case* ki son madanm osi in fer en pti biznes lo *internet* ki li osi in ganny GOP, mon pa konnen mannyer i posib, e ler GOP sa msye i fini, sa madanm i *endorse* sa msye. So ki mannyer sa i posib?

E petet dezyenm pti pwen Minis, eski i annan en nimo, i annan en platform ki Seselwa...mon pe dir lapolis, be Seselwa i osi konn bokou sa bann ka, ki nou kapab rapote menm fer swivi pou ki sa pratik kot nou kapab rapote bann dimoun ki napa *GOP*, i kapab ganny *deal* avek? Mersi.

MR SPEAKER

Mersi Onorab. Minis?

MINISTER ERROL FONSEKA

Mr Speaker, mersi. Mersi Onorab pou ou kestyon. Sa ka ki ou pe koz lo la mon konn tre byen. Mon pou les *CIO* kouver sa, e me pa neseserman devwal non dimoun, silvouple, e ou konn zistwar deryer sa. Mersi.

MR SPEAKER

Mersi, wi *Madam*?

CHIEF IMMIGRATION OFFICER ERICA DUFRESNE

Mersi Mr Speaker, mersi Onorab pou ou kestyon. Wi Onorab, i en ka ki nou pe *currently* nou pe *deal* avek sa. Ki arive normalman, Onorab, i annan lenstans ki en koup i antre dan pei, par egzamp, sa dimoun nou annan en travayer etranze spesifik ki li i sa *permit holder*, e Lalwa i *allow* sa *permit*

holder pou li met son depandan lo son permi.

Lalwa i dir ou *legally married spouse* ouswa son bann zanfan ki anba laz. Sa spouse preznan li, ler i dan pei i annan lenstans ki, swa i pou ganny en anplwayer vi ki i dan pei, en anplwayer i idantifye li pou li donn li en plas travay, la i pou ganny en permi. Ouswa li menm li i vvar lanvironnman Sesel i ase bon pou li *start* en biznes, i pou *start* en biznes.

Be ki Departman Imigrasyon i fer dan sa bann lenstans, nou fer sa 2 permi mars ansanm, savedir akoz ou'n ganny permi lokalman ou, akoz ou ti la dan pei, so nou'n fer sa 2 permi mars ansanm. E le moman ki permi sa premye etranze i fini, sa dimoun ki'n anmenn ou, son permi i fini, ou permi osi i sipoze fini tonbe.

Savedir ler zot pou ale zot tou lede zot pou al ansanm. Nou pa pou kapab ler enn son permi i tonbe, lot i sot lo permi sa spouse pou li reste dan pei. Sa ka ki ou'n met devan, wi Onorab, i en ka ki nou pe etidye pou nou kapab pran en desizyon lo la. Mersi Speaker.

MINISTER ERROL FONSEKA

Mr Speaker, mon ti a kontan zis azout en pti keksoz lo la?

MR SPEAKER

Wi, Minis?

MINISTER ERROL FONSEKA

Zis pou elabore. Pa Imigrasyon ki deside, parey dan sa ka, si sa dimoun i anvi fer en louvraz, i ti bezwen al *SIB* pou ganny son permi, son *license and all that*. So, pa *Immigration* ...Imigrasyon pa donn *license* li, en? Ok, zis nou *implement the regulations* si en dimoun in ganny drwa *through SIB*. Mersi Mr Speaker.

MR SPEAKER

Klarifikasyon Onorab, wi?

HON FRANCOIS ADELAIDE

Wi, Mr Speaker. Mersi Minis. Mon annan en dezyenm bout kestyon ki pa'n ganny reponn, e zis petet Minis, eski zot annan fason pou zot, parey zot in... *anyway* ou dir pou dir i annan, e mon, mon aprann sa dimoun pe ale ozordi. Eski zot annan fason pou zot kapab fer sir, ki sa dimoun i kit pei ozordi, mannyer zot pou *monitor*? Mersi.

MR SPEAKER

Panel?

CHIEF IMMIGRATION OFFICER ERICA DUFRESNE

Mersi Mr Speaker. Wi, sa msye i pou bezwen definitivman kit pei, akoz i nepli annan en permi pou li reste dan pei. E nou'n donn li en dele letan ki i pou bezwen kit pei. So si i pou ale, nou pou konnen si i ale, akoz nou *system border control* lo *airport* i pou aviz nou pou dir sa etranze in sorti dan pei. So, wi nou annan en sistem an plas. Mersi Mr Speaker.

MR SPEAKER

Mersi CIO. Kestyon Onorab Hoareau?

HON JOHN HOAREAU

Mersi Mr Speaker. Bonzour Mr Speaker, bonzour Minis ek ou delegasyon, bonzour tou dimoun a lekout. Mr Speaker, dabor mon le salye travay ki Departman Imigrasyon pe fer ki mon krwar poudir zot pe met bokou keksoz anba kontrol, bon travay. *Chapeau!* Me mon kestyon i baze en pti pe lo lefe ki, lo en klarifikasyon lefe ki nou'n dir ki bann konsekans ki arive ler bann dimoun i *overstay*. Parmi bann konsekans se ki osi ler zot *overstay*, si zot *GOP* in *expire* zot ganny en *PI status* ler zot *exit* pei. Mon ti a kontan konnen, Minis, eski zot pe travay lo en sistem - par egzanp pou bann ki sa rezon ki

zot pe kit pei, i napa naryen pou fer ek zot, zot?

Sa rezon i annan pou fer avek Gouvernman, petet zot in ganny *hold back* pou serten rezon parey ou'n dekrir avan. Eski zot pe travay lo en *mechanism* pou pa donn sa bann dimoun ki koumsa, okenn *PI status?* Mersi.

MR SPEAKER

Mersi.

MINISTER ERROL FONSEKA

Mersi Onorab pou ou kestyon. Mersi Mr Speaker. *Basically, o moman ki ou GOP i expired, ou en prohibited immigrant, simple as that.* Pa vedir ou'n fer en gran krim, i kapab menm ou pa dan fot akoz sa *employer* pa'n pey ou isi laba, selman i vin en otomatik sa. E ler en dimoun i *PI* i pou depan sirkonstans si i pou kapab retourn dan pei *or not, and so* sa en diskresyon ki nou bezwen servi *common sense* lo la, me i annan dimoun ki isi, i annan klerman dimoun ki'n ganny *PI* akoz ler i ti pe travay i ti a pe fer keksoz mal, nou pa pou les li antre ankor. Definitivman sa.

So I think it's a situation ki nou bezwen fer en desizyon depending on the case. Mon pa konnen si mon'n reponn ou

kestyon, me petet ou'n konpran en lot keksoz la?

HON JOHN HOAREAU

Partly ou'n reponn, selman pou bann ki pa neseserman zot lafot, alor pou al dan sa process of appeal and whatnot konmsi pou kapab smoothen out sa process ki zot antre, zot kapab re antre pei san bezwen fer okenn lezot demann. Mersi.

MR SPEAKER

Mersi. *Panel i annan okenn keksoz pou azoute la?*

CHIEF IMMIGRATION OFFICER ERICA DUFRESNE

Wi, Mr Speaker, mon a zis azout lo sa ki Minis in dir. Wi, i annan sa bann sirkonstans Onorab, me lapliparditan, swa *Secretariat Trafik Imen*, ouswa i annan lenstans Departman Lanplwa i fer nou konnen poudir sa dimoun pe ale, sirtou si i en ka sispe trafik imen, ouswa ki in pran en pe letan devan Tribunal Lanplwa pou li kapab ganny son saler. Zot notifeye Departman Imigrasyon, e nou, nou fer sir nou *forward* zot non kot *Border Control* pou fer sir ler zot ale zot ganny sa *safe exit clearance* ki zot pa ganny sa deportasyon. Sa i eggiste. Mersi Mr Speaker.

MR SPEAKER

Mersi. Onorab Woodcock.

HON WAVEL WOODCOCK

Mersi Mr Speaker. Mr Speaker, permet mwan de lapar zabitan Grand Anse Praslin pou prezant mon senser kondoleans pou lafanmir Mr Hans Hackl ki'n kit nou dan en fason trazik Dimans pase. I en zanmi personnel, i en dimoun ki'n fer bokou pou lakominote Grand Anse Praslin, sirtou Legliz, e toultan son lotel ti ouver pou atitre saritab e kominoter dan distrik.

Mon fer lapel avek tou dimoun ki annan lenformasyon lo sa lensidan pou vin devan e donn lapolis lenformasyon pou ed zot dan zot lenvestigasyon. Ankor en fwa mon kondoleans pou lafanmir Hackl, sirtou son garson Roland ki en zanmi.

Mon kestyon i, eski i annan okenn *fine* ouswa sanksyon pou bann biznes ouswa lakonpannyen, ki zot annan travayer ki pe travay dan zot lakonpannyen, ki zot permi in *expire*? Konmsi ki bann aksyon ki aktyelman la Imigrasyon pe pran kont sa bann lakonpannyen, ki zot annan bann travayer ki zot permi in *expire* ki ankor pe travay dan zot lakonpannyen?

E eski Imigrasyon i annan ouswa pe konsider pou annan

en *unit* spesyalize ki zot louvraz i pou zis *follow up* lo bann GOP ki'n *expire*, e ki rod sa bann imigran ilegal, parey i annan bann pei aletranze zot annan sa *unit* spesyalize ki zot louvraz i konsantre lo zis rod sa bann imigran ilegal, ouswa sa bann travayer etranze ki zot permi in *expire* ki pe reste dan pei? Mersi.

MR SPEAKER

Mersi. Minis?

CHIEF IMMIGRATION OFFICER ERICA DUFRESNE

Mersi Mr Speaker. Mersi Onorab pou ou kestyon. An sa ki konsern *fines*, Onorab, an se moman anba Lalwa Imigrasyon nou pa kapab *fine* okenn anplwayer. Ki nou kapab fer? E sanmenm sa ki mon'n koz avan lo bann mezir ki nou'n met an plas. Nou tenir okenn nouvo laplikasyon permi travay pou zot.

Savedir zot pou zis kapab renouvle permi zot travayer etranze ki dan pei, zot pa pou ganny nouvo travayer etranze, tan ki zot pa *settle* aryeraz.

Sanmenm sa ki an se moman nou kapab fer.

E a tou moman nou sey nou mye pou nou travay avek sa bann anplwayer pou zot kapab *settle* zot aryeraz, me

selman nou fer sir nou blok zot, zot ganny *blacklisted* - mannyer ou anvi apel li - me selman zot pa gannyen nouvo travayer tan ki zot pa *settle* sa ki zot drwa Gouvernman. Mersi Mr Speaker.

MINISTER ERROL FONSEKA

Mr Speaker, zis pou *reenforce* en pti gin sa ki *CIO* in dir. Parkont kantmenm nou pa kapab *fine*, Lakour i kapab fer sa, Lakour i kapab. E osi si i annan en keksoz ki zot in *breach about Ministry of Employment, then the employment regulations will take place*. So, i annan lezot mechanism ki vin an plas ki kapab met en sanksyon lo sa dimoun. Mersi Mr Speaker.

MR SPEAKER

Mersi. Onorab Arissol? Sorry.
Ok.

CHIEF IMMIGRATION OFFICER ERICA DUFRESNE

Mersi Mr Speaker. Onorab in demann 2 kestyion. Konsernan en tim spesifik, sanmenm sa ki Seksyon *Enforcement* i fer. Malerezman nou seksyon i pa gran, i annan zis 4 *staff*, me selman nou sey nou mye. Akoz an prenon kont nou napa zis travayer etranze pou nou *deal* avek Seksyon *Enforcement*, i

annan etranze ki'n vin vakans lo permi viziter ki annandler zot *overstay*, zot osi nou bezwen pran kont avek.

Ouswa bann ki *breach* kondisyon zot permi travay. Bann etranze ki in ganny en permi, akoz permi travay Imigrasyon i spesifik li. Si in dir ou, ou pou fer sarpantye avek sa lakonpannyen ou bezwen travay sarpantye ek sa lakonpannyen. Si annandler ou al travay dan lakwizin, ou'n *breach* kondisyon ou permi. Savedir Seksyon *Enforcement* ki pou bezwen *deal* avek ou.

Savedir Seksyon *Enforcement* i annan bokou louvraz pou li fer, e i annan zis 4 dimoun, me zot sey zot mye pou zot travay e *tackle* tou sityasyon ki etranze i iregilye dan pei. Mersi Mr Speaker.

MR SPEAKER

Mersi. Mon'n aktyelman pe *run out of time*, selman mon'n fer sa *move* rekonnet Onorab Arissol, alor mon pa kapab...Onorab Arissol ou kestyion?

HON SANDY ARISSOL

Mersi Mr Speaker. Mr Speaker mersi pou sa pti *move* ki ou'n fer pou mwan, selman, mon bezwen dir pou dir tou sa ki nou pe koz lo la i konsern mwan - Mr Speaker, bann sif ki'n

donnen e bann larepons, bann kestyon ki pe ganny demande.

Mon ti a kontan, letan Minis in koz an relasyon avek... Mrs Dufresne in koz an relasyon avek bann etranze ki parfwa zot sove zot al Praslin, zot al en pe partou, partou, Mr Speaker, sa ki nou bezwen pran kont se ki i annan plizyer bann etranze antre dan nou pei, zot kree bann lasosyasyon, zot ouver bann Legliz, oubyen zot marye parey Minis in dir, alor mon annan 2 kestyon.

Mon kestyon mon anvi retourn ankor met lanfaz lo sa ki Onorab Woodcock in demande. An vi ki Minis i dir i annan zis 4 dimoun dan Seksyon *Enforcement*, eski ou Minister Minis, pe mazin ogmant son finans an relasyon avek *enforcement?* Parey mon'n deza demande, parey letan i annan eleksyon dan pei kot bann *teachers*, lezot dimoun dan lasosyete i vin devan, pou nou donn en pti koudmen pou nou ede ek sa *enforcement*.

Mon ti a kontan form parti sa lekip osi pou donn en koudmen imigrasyon, pou nou al Praslin, pou nou al La Digue, pou nou antre dan tou kwen Mahe pou nou rode lekel bann dimoun ilegal dan nou pei. Mon premye kestyon.

Dezyenmman, an relasyon avek bann kontrakter - parey Minis in dir Mr Speaker, zot pa kapab fine bann kontrakter, be eski i annan en travay ki pe ganny fer ant Imigrasyon, Lanplwa, mon pa konnen si *Licensing*, pou nou get osi bann kontrakter. Ler zot anvoy zot aplikasyon pe rod-

Ozordi Sesel tou dimoun i kontrakter. Tou dimoun i kapab krwar i kapab fer vin 2 Endyen, 2 etranze pou fer serten travay kot li. Eski i annan en travay ki pe ganny fer pou nou asire, bann dimoun ki pe anvoy zot aplikasyon pou 4, 5, 10 dimoun pou vin travay Sesel, zot labank i annord, zot annan landrwa dormi, zis parey bann dimoun ki fer aplikasyon pou fer en pti *guest house*, *Planning* i monte, sanniter i vini, lapolis i vini, Lanvironnman i vini, pou nou kapab fer sa travay byen ki zot anvi nou fer? Mersi bokou.

MR SPEAKER

Mersi. Minis nou a sey fini avek sa silvouple.

MINISTER ERROL FONSEKA

Mr Speaker, mersi. E Onorab Arissol mersi pou ou kestyon. Sa louvraz vreman i ganny fer, sanmem parfwa ler dimoun... *I mean Minister of Employment* i fer sa louvraz seryezman sa ki

ou'n fek dekrir la, sa bann kontrakter ki'n pa *respect* zot bann... abiz zot bann travayer, pa *respect*, isi laba, pa'n pey zot travayer, *TIP*.

E nou *obviously*... I pa pou ganny *approval*, i zis pa pou ganny *approval*, me selman i pou kriye i pou fer tapaz.

Me selman nou bezwen ankouraz en serten *corporate governance* dan nou *industry* travay. Sa i enportan en kantite pou en pei ler nou avans devan, ki nou bann *standard corporate governance* within bann lakonpannyen i *part of* sa lavansman ki nou anvi ammennen dan pei.

Dimoun pa...I pa en *herd* li. I pa en kantite mouton, en kantite isi ki ou zis bouz li, bouz li laba. So, sa respe. E mon kontan ki ou'n fer sa pwen resorti akoz nou'n tandé dan *News* mannyer dimoun in maltret travayer *and all that*. So, *very important* ki tou dimoun i kondann sa.

Lo kestyon *enforcement*, nou ti a *welcome* ou Onorab, mon konnen ou kontan al dan bann distrik partou *and all that, but selman on a serious note*, nou bezwen plis *enforcement*. E zis pou *remind* zot ler nou vin dan Lasanble *next time, immigration income*, nou fer plis *income* ki nou

depans dan nou *budget by the way, just to remind you of that*. Mersi Mr Speaker.

MR SPEAKER

Mersi, eskiz mwan bann Manm, mon'n *run out of time* pou sa kestyon. Mon regrete ki mon pa'n kapab ariv lo tou kestyon, me zot bezwen konpran nou lareg. Nou pran kestyon pou...Mon'n donn 40minit sa kestyon, ki bokou plis ki nou kapab *afford*, e mon oule notifye Lasanble ki nou bann kestyon ki reste ki ler mon tournen, nou pou bezwen donn *limit* 20minit lo la. Mersi. Nou ava pran poz. Nou ava pran poz la e nou a repran travay 11er.

(BREAK)

MR SPEAKER

Bon nou'n ariv lo kestyon 52 dan non Onorab Sandy Arissol, bann Manm silvouple, *panel* note nou annan aepre 20 minit pou sa kestyon. Onorab Arissol.

HON SANDY ARISSOL

Mersi Mr Speaker. Mr Speaker permet mwan letan mon pe demann mon kestyon lo non zabitan Bel Ombre pou mwan prezant mon senpati avek lafanmir *Bishop* parey nou tou nou ti konn li Bel Ombre anvi ki

i ti en zabitan Bel Ombre. Lo lapar zabitan Bel Ombre e osi lo lapar mon *DA* prezant avek son fanmir nou senser kondoleans e senpati. Mersi.

Mon kestyon pou Minis i lir,

Eski Minis i kapab eksplik Lasanble si son Minister i annan okenn plan pou konstri en sant *SFRSA* pou deservi rezyon nor, an vi lakantite letablisman touristik ek bann lakour rezidansyel prive dan sa rezyon? Mersi Mr Speaker.

MR SPEAKER

Mersi Onorab. Minis ou repons silvouple.

MINISTER ERROL FONSEKA

Mersi Mr Speaker. Mersi Onorab pou ou kestyon. Mon a pas laparol toudswit akoz mon konnen nou en pti pe *tight time*, toudswit ek *CFO* Tally Domingue pou reponn sa kestyon apre mon a kouver pli tar. Mersi Mr Speaker.

MR SPEAKER

Mersi. Mersi *CFO*, ou annan laparol.

CFO TALLY DOMINGUE

Mersi Mr speaker. Mersi Onorab. Stasyon Tenny Dife dan rezyon nor in touzour en priyorite pou nou lazans e osi

en demann kontinyel par lakominote Manm Lasanble sa rezyon. *Assessment* ki'n ganny fer dan sa rezyon, nou'n war poudir vre nivo risk i o ler ou pran konsiderasyon lakantite devlopman touristik ek sa bann gro popilasyon sa bann distrik.

E nou stasyon ki deservi sa rezyon pou le moman i stasyon *New Port main station*, en masin sorti *New Port* i bezwen pas anpasan Victoria e dan *peak hours* nou ganny retar dan trafik e sa retar i naturelman agrandi risk pou bann facilite dan nor. Me si non pa dan *peak hours* i pran nou masin 6 minit pou ariv Beau Vallon.

Dan plan stratezi lazans 2012, 2016 anba nou programm desantralizasyon, nou pou anmenn servis pli pre avek lakominote, proze pou stasyon Beau Vallon ti ganny propoze.

Demann ti ganny fer an 2013 avek Minister pou later pou alokasyon en parsel 2500 met kare pou konstrir en Stasyon Servis Tenny Dife, plas adekwa pou fer lantrennman e langar kouver pou masin.

Sa proze ti osi determin lekipman personnel ki ti bezwen i ti'n estimen pou anviron R24 milyon. Sa ti ganny mete anba Bidze 2014 koman en proze kapital. Nou ti ganny

enformen par Minister pou later sa letan, ki stasyon pou ganny konsidere dan plan redevolpman distrik Beau Vallon e alokasyon parsel ti pou ganny konsidere Beau Vallon lo site *Regatta*. Ti pou ganny konfirmen enn fwa negosyasyon ki ti pe ganny fer avek bann propriyeter prive ti ganny konplete.

E nou'n kontinyen *request* later pou ganny sa stasyon. An 2020 nou ti ganny propoze en later kot-Khashoggi-Bel Ombre, me i pa ti en landrwa ideal pou fer en stasyon ki pou efektivman kouver rezyon nor.

Pou efektivman kouver rezyon nor, Mahe landrwa stratezi ki nou ti pe mazinen pou met en stasyon ti kot *Regatta site*, oubyen dan en landrwa lo sa plato Beau Vallon. Dernyen lenformasyon ki nou'n gannyen avek Minister *Planning* sa lannen, se ki *master plan* Beau Vallon in fini ganny finalize e Stasyon Servis Tenny Dife pa'n ganny kouver dan sa *master plan*.

Me sa proze i reste touzour en priyrite pou nou, me pou le moman nou'n priyoritiz bann proze lenfrastruktir ban proze nouveau stasyon lo bann landrwa kot nou'n fini ganny alokasyon later. Mersi.

MR SPEAKER

Mersi. Minis ou pou azout la?

MINISTER ERROL FONSEKA

Wi, zis pou azout en pti pwen pou *reinforce* sa ki *CFO* in dir, byensir Beau Vallon en landrwa stratezik, en landrwa enportan devlopman pe arive, en sant tenny dife i enportan en kantite. Me zis keksoz ki nou bezwen i 2500 kare met kare.

So, sa en keksoz ti a bon mon lans en lapel la pou bann *private sector* okenn dimoun ki annan later dan sa *area* ki nou kapab servi nou pe mazin landrwa kot nou kapab *approach* ki nou pa ganny *bottleneck* parey dan bout Bel Ombre pa pou bon akoz pou *bottleneck* nou.

Me byensir la obor sant *area* kot *police station* apre ann alan gran lotel la sa ti pou ideal bann landrwa koumsa. So, sa nou pe lans en lapel i nou plan stratezi pou fer sa ed nou ek sa e nou a bezwen fer li akoz keksoz i a risk bor laba pou enstan. Mersi Mr Speaker.

MR SPEAKER

Mersi. Donk, avan ou siplemanter Onorab Arissol dan pe prese mon'n bliy en letap kourtwazi e sa se pou swet labyenveni Mrs Tally Domingue *Chief Fire Officer* e Mr Jones

Madeleine son *Deputy*. Mersi, eskiz mwan pou sa. Onorab Arissol ou siplemanter.

HON SANDY ARISSOL

Mersi Mr Speaker. Mon ti a kontan dir Mrs Domingue avek Minis mersi pou zot larepons e mersi pou mazin nou dan nor an relasyon avek en stasyon. Mon ti a kontan demann Minis Mr Speaker, anvi ki teren ankor pe ganny negosye ankor pe rode en lapel in ganny fer atraver Minis, mon ti a kontan demann avek Mrs Domingue atraver Minis atraver Speaker, si i annan en travay ki pe ganny fer avek bann letablisman touristik enkli bann lekol; anvi ki Bel Ombre, Beau Vallon nou annan plizyer bann lekol primer, segonder e osi bann *daycares* ek lakres, pou ki i annan bann travay ki pe ganny fer pou ki si zanmen i annan en ka dife zot konnen kote pou ale.

Sa ki nou apel bann *fire rescue*, sa mo pa vini...

MR SPEAKER

Assembly point.

HON SANDY ARISSOL

Assembly point ki lekol i donnen si zanmen i annan en evantyalite ki zot pou fer, eski i annan sa travay ant zot ek SFRSA pou kontinyen siport

bann lekol sirtou kot i annan zanfan ek bann letablisman touristik, zis par tyek zot bann lekipman par egzanp, ed zot an relasyon kote pou sorti e ki bann demars zot fer si zanmen i ariv en evantyalite ki nou pa pe swete. Mersi Mr Speaker.

MR SPEAKER

Mersi Mrs Domingue. Minis ou permet Mrs Domingue pran laparol?

MINISTER ERROL FONSEKA

Certainly, Mr Speaker, Mrs Domingue a reponn sa. Mersi.

CFO TALLY DOMINGUE

Mersi Mr Speaker, Mersi Onorab. Dan *fire service* i annan en seksyon ki apel *fire prevention and training section*, e zot louvraz se pou enspekte sa bann landrwa fer sir zot nivo *fire safety* i alaoter premyerman. E pou rekemann bann lekipman ki neseser. E son *unit training* ladan i fer en *training* avek sa bann landrwa edikasyonnel, touristik, pou fer sir ki zot in met an plas zot plan evakyasyon, zot plan *preparedness*. E nou annan en *unit risk* osi ki fer sir ki sa bann dimoun osi i annan zot *contingency plan* i an plas, zot fer sa bann preparasyon e form par dan zot *preparedness plan*

se idantifikasyon zot *assembly point*.

E sa i ganny mete dan zot plan e lafason nou fer zot fer *fire drill*, nou vini nou asiste zot dan lafason zot pou fer zot *fire drills* e nou donn zot rekomandasyon ki mannyer zot pou *improve* lo la.

MR SPEAKER

Mersi Mrs Domingue. Nou a pran kestyon siplemanter bann Manm, Onorab Labonte.

HON ANDY LABONTE

Mersi Mr Speaker. Bonzour Mr Speaker, bonzour Minis avek ou *panel* e tou dimoun ki a lekout. Mr Speaker an relasyon avek kestyon ki'n ganny demande pou konstriksyon en sant *SFRSA* dan rezyon nor, ti annan en komunikasyon ki i annan en *plot* kot Ile du Port, ki sipoze annan en konstriksyon, eski sa i et oubyen i pa dan zot programm?

E mon ti a osi pran lokazyon pou mwan felisit tou bann travayer ki zot pe fer en travay vreman eksepsyonnal e kontinyen sa bon travay ki zot pe fer. Mersi.

MR SPEAKER

Mersi, Ile du Port mon pa konnen si i dan nor. Minis? *Panel?*

MINISTER ERROL FONSEKA

Mr Speaker mon a les *CFO* reponn sa kestyon silvouple.

MR SPEAKER

Wi, *CFO*?

CFO TALLY DOIMINGUE

Ile du Port i dan santral, selman nou ti'n ganny *allocate* en later wi, Ile du Port me ti dan en lokasyon ki i ti obor *SHELL*, i ti obor en depo ammonia, i ti en lokasyon ki ti an risk. Nou ti fer negosyasyon avek Minister *Planning*, Minister Rangasamy e nou ti ganny *relocate* lo en lot *site Perseverance* e sa i ankor dan bann prosedir.

Selman nou pe *relocate* sa *area* nou sipoze *relocate* nou *main station* ki New Port pou al laba Perseverance.

MR SPEAKER

Mersi *CFO*. Onorab Hoareau.

HON JOHN HOAREAU

Mersi Mr Speaker. Mr Speaker i en kestyon ki mon'n deza table osi. Mon ti ganny fer konpran poudir i annan sa morso teren obor ladministrasyon distrik, ki souvandfwa ennler zot servi pou zot stasyonnen en *fire tender* la, ki zot pe konsider sa teren, eski sa propoze in tonm

dan delo oubyen i pa pe ganny pran? Mersi.

MR SPEAKER

Mersi silvouple *panel*, nou ava al lo la brefman.

CFO TALLY DOMINGUE

Sa teren vre Mr Speaker *thank you*. Sa teren vre nou ti pe servi li, nou servi li pou nou *standby*, akoz nou ganny fasilite avek ladministrasyon distrik ler nou met masin la pou bann personnel servi, me selman sa teren i tro pti pou nou met en stasyon *per se*.

MR SPEAKER

Thank you.

MINISTER TALLY FONSEKA

Mr Speaker zis pou eksplike, nou'n dir 2500 par met kare, *basically* ou bezwen 2 *fire tender* apere en *team of 10*. So, ou kapab ganny en konpran ki nou bezwen, e nou kapab *build* anba, par lao. Nou pa bezwen gran, gran lespas selman nou bezwen kapab *house* sa. E parey mon dir mont anler nou napa problemm. So, *as long* ki nou'n ganny 2 *hangard for 2 spaces*. Mersi Mr Speaker.

MR SPEAKER

Mersi Onorab Henrie.

HON GERVAIS HENRIE

Mersi Mr Speaker. Bonzour tou dimoun, an sa ki konsern sa grander later ki zot pe rode 2500 met kare, so mon anvi konnen *what is the plan B other than Beau Vallon?* Akoz osi ler ou pou kalkil osi zeografi Mahe Beau Vallon i tant pou vin pli dan lapwent.

Me Glacis i en pe pli dan milye ant Anse Etoile, Beau Vallon *plus* avek son proksimite avek Aurore e Perseverance. So, ki *plan B* ki zot pe osi regarde, akoz Glacis par egzanp mon pe mazin dan plato la kot ti annan ansyen ladministrasyon distrik avek en *court*.

Wi, i en later prive me negosye pou en keksoz koumsa akoz i en *national project*, sa i mon premye kestyon.

Dezyenmman sa sonm ki zot bezwen R24milyon, e la mon anvi demann Minis preski 2014 i ti dan Bidze apre larzan in disparet akoz pa'n materyalize, ki mannyer ou pou kapab garanti ki pei pou pran lenportans sa proze e met sa dan Bidze? Akoz ou pe osi *compete* avek bann lezot proze nasyonal. Pou nou i enportan akoz si napa larzan *we might not as well talk about the project*. Mersi.

MR SPEAKER

Mersi.

MINISTER ERROL FONSEKA

Mersi Mr Speaker. Mersi Onorab Henrie pou ou kestyon. Byensir ou pa kapab *the cart before the horse*. Nou bezwen idantifye en landrwa avan. apre ki nou a rod sa larzan *otherwise it defeat the purpose. E this is the point - the point i nou bezwen idantifye en landrwa, napa en plan A, plan B*. Nou bezwen en landrwa ki ava vin nou *plan A*. I pa nou *plan B* pou vin nou *plan A* la, e so basically i really en keksoz... pardon?

MR SPEAKER

Kontinyen Minis.

MINISTER ERROL FONSEKA

Erit en keksoz ki nou bezwen *go to the private sector* pou ganny en bout la. E vizavi, vizavi *Kempinski* (ki mannyer i apel sa lotel la?) *SAVOY*? Vizavi *SAVOY* sa semen ki mont en pti pe anler, kote drwat nou pe get lo *map*, mon pa konnen pou lekel selman en landrwa ki nou kapab *explore*.

Akoz nou pa bezwen en gran bout, nou *plan B* i annou pa rod 100poursan ki nou bezwen, nou bezwen zis ase pou met 2 *fire tender* laba e se *the rest* napa problem akoz parey mon dir nou kapab mont anler.

So, se tou ki nou bezwen. I pa en gran proze, annou pa rod bann gran, gran *fancy thing about it just purpose build* pou *deal* ek sa bann sityasyon ki nou annan. Mersi Mr Speaker.

MR SPEAKER

Mersi. Onorab Aglae?

HON EGBERT AGLAE

Mersi Mr Speaker. Bonzour Minis ek tou bann zofisyen *SFRSA* e *CEO PUC*. Minis avek bi petet pou osi kapab anmenn sipor dan trouv en landrwa, pou kapab met en stasyon sitan enportan pou sa rezyon. Eski zot osi zot in mazin *explore* i annan sa *ex-SIT - STB* apre *NISTIE* ti bouz laba. Eski zot pa'n osi petet eksplor si kapab servi sa landrwa, anvi ki laba mon krwar i annan serten aktivite gouvernmantal laba, sirtou pou lofis i kapab bouz dan en lot landrwa - menm dan rezyon lavil ouswa rezyon bann lezot landrwa e ki petet i ava kapab servi.

Akoz sa landrwa i *equip*, i annan ase bataz osi, eski sa osi zot pe mazin eksplor pou gete ant Gouvernman ek lazans? Mersi.

MR SPEAKER

Mersi. Minis ou respons?

MINISTER ERROL FONSEKA

Mersi Mr Speaker. Mersi Onorab. En keksoz ki nou kapab nou devret *explore*, mersi pou sa.

MR SPEAKER

Thank you. Onorab Pillay?

HON SEBASTIEN PILLAY

Mersi Mr Speaker. Mr Speaker mon ti a kontan demann Minis *let say* par egzanp en dife i arive kot dan en lakour Pascal Village ozordi - pa Pascal Village me zis par lao *SHELL* ok? Kote ki deplasman pou ganny fer pou anvoy en *fire tender* pou attend sa dife? E eski prenan kont tou sa bann diskisyon lo annan en proper teren, eski zot pou mentenir en prezans dan sa rezyon Beau Vallon, ki ava fer ki si i annan *heavy traffic* ki tender i bezwen sorti anvil, i ava kapab *response* dan sa rezyon.

Akoz ou pa pou ganny sa problemm trafik *along the stretch of road to respond*, pou Glacis *and all the way to Anse Etoile* e North East Point, prenan kont ki en problemm trafik pou kre en problemm pou *respond time* ki SFRSA i kapab donnen pou en sityasyon dife. Mersi.

MR SPEAKER

Mersi. Minis?

MINISTER ERROL FONSEKA

Mersi Mr Speaker. Mersi Onorab. *Basically*, ki ou pe suggest i en *standby location* dan bann *busy area*, *consideration for that*. Mon krwar sanmenm sa ki ou pe dir nou, non?

HON SEBASTIEN PILLAY

Yes, Mr Speaker se sa ki mon pe dir, akoz mon pe zis mazinen sa rezyon avek son *high residential density* e avek son *high value* - bann *high value properties* ki annan sirtou lotel, *loss of life* i kapab ganny *avoided* si nou pran aksyon, me *loss of property* i *very costly* pou dimoun *rebuilt*, i pou kout bokou pli ser.

So, eski zot annan zot pe met en *standby*, en *standby presence*, dan sa *area* ki a fer li pli fasil pou annan en *response* si i annan en evantyalite dife dan sa rezyon *let say* demen ou apredmen? Mersi.

MR SPEAKER

Mersi. Minis?

MINISTER ERROL FONSEKA

Yes, Mr Speaker. Mon krwar annou ekout *professional advice from the experts*. CFO?

MR SPEAKER

CFO.

CFO TALLY DOMINGUE

Ti annan en lepok mon krwar nou tou nou rapel, nou ti met en masin *standby* Beau Vallon dan *peak hours*. E sa lepok nou pe koze nou ti napa stasyon Praslin, La Digue, e nou ti napa stasyon Anse Boileau osi. Me avek lakantite *staff* ki nou annan konmela, nou pli gran problemm se *staff* premyerman.

Nou napa ase *staff* pou nou *assure* en *standby* Beau Vallon toulezour. Nou fer li en priyорite nou *pull marmay from* seksyon prevansyon, *planning* dan bann lepok *festive seasons* mon krwar dan Nwel, Lannen zot war nou ankor *still standby*, akoz nou konnen dan sa bann lepok trafik i bloke depi bomaten ziska 4er.

So, nou fer li en priyорite pou nou tir sa bann dimoun. Apre osi dan sa bann lepok Desanm zot louvraz i pe *run down* napa bokou lenspeksyon. So, nou kapab servi zot dan sa bann *standby* dan sa bann lepok, me nou pa kapab fer li tou dilon lannen. Akoz sinon nou louvraz prevansyon i soufer e louvraz prevansyon i en priyорite pou *fire service* akoz *prevention is better than cure anyway*.

So nou bezwen fer sa louvraz prevansyon marse akoz sa i anpes dife pran. So, nou pa pou kapab - Tan ki nou napa ase *staff* dan loperasyon pou *boost up* nou pa pou kapab *ensure* en *standby* Beau Vallon.

MR SPEAKER

Thank you. Terminen silvouple Onorab.

HON SEBASTIEN PILLAY

Mersi Mr Speaker, *straight forward*, eski zot annan en lendikasyon *the cost wise* ki ava enkli lekipman *and zofisyе* pou *standby*, ki sa pou koute par rapor asir konstri parey ou'n dir en gro stasyon ki *will be much further down the line rather than*, en keksoz ki nou kapab akonplir dan en *short* dele letan. Eski ou annan okenn lenformasyon lo la? Mersi Mr Speaker.

MR SPEAKER

Mersi. Minis.

MINISTER ERROL FONSEKA

Mersi Mr Speaker. Mersi Onorab pou ou kestyion.

Mon krwar ou kestyion i anliny ek sa ki Onorab Henrie in dir *approved a plan B, now we got a plan A* e nou pou stick to the plan A pou akoz *this is really* ki nou bezwen fer. So,

otherwise we are fooling ourselves by thinking nou annan en solisyon ki vreman pa en real solisyon.

So, really is to push pou sey ganny sa pti landrwa parey mon pe dir. Thank you Mr Speaker.

MR SPEAKER

Thank you. Nou a bouz lo prosen kestyon, 53 ankor dan non Onorab Arissol.

HON SANDY ARISSOL

Mersi Mr Speaker, mon kestyon i lir, eski Minis i kapab eksplik Lasamble si i annan en travay ki'n ganny fer dan distrik Bel Ombre pou idantifye, ouswa met an plas bann *fire hydrant* kot bann *housing estate*, ouswa dan bann landrwa stratezik? Mersi Mr Speaker.

MR SPEAKER

Mersi Onorab. Minis repons.

MINISTER ERROL FONSEKA

Mr Speaker yes i annan en gro louvraz - i annan. Mon a les CFO donn detay. Mersi Mr Speaker.

MR SPEAKER

Eskiz mwan ankor enn fwa, kestyon limero 53 i demann en sanzman zofisy e mon...

MINISTER ERROL FONSEKA

Mr Speaker, i la.

MR SPEAKER

Ou la deza?

MINISTER ERROL FONSEKA

I la, i la

MR SPEAKER

Mr Valmont e Mr Bacco?

MINISTER ERROL FONSEKA

Mr Valmont.

MR SPEAKER

Mr Valmont, ok. E bon nou a kapab kontinyen alors, lo latab a kote. Wi.

CFO TALLY DOMINGUE

Mr Speaker mersi. Mersi Mr Onorab, kot i konsern distrik Bel Ombre SFRSA ti fer legzersis idantifikasyon ki enkli, teste netwaye bann *fire hydrant* an Novanm 2022. Nou obzervasyon i demonstre ki an total i annan 15 *hydrant* enstale dan bann landrwa stratezi.

Tel ki 2 dan Beau Belle Estate, 2 dan Fisherman's Cove Estate, enn obor Legliz St Roch, 2 dan Mount Simpson, 1 kot Lekol Bel Ombre lo *main road*, 2 dan rezyon Marie Laure, 1 kot lofis DA, 1 kot Vilaz Delo Ladal e 1 kot *bus stop* pre avek La Scala e 1 Anse Major.

Pandan sa bann legzersis nou osi demark sa bann *hydrant* avek lapentir kouler zonn, me nou dernyen vizit dan distrik Bel Ombre, nou'n apersi ki sa bann landrwa ki nou ti'n demarke an Novanm in pali. Nou osi travay ansanm avek *PUC* pou fer sa bann legzersis. Sa legzersis i ganny fer 2 fwa par an dan sak distrik e bann *hydrant* dan distrik Bel Ombre pou re ganny kouver an Zen 2023.

Mr Speaker i enportan pou fer resorti ki *SFRSA* i kontinyelman angaze dan bann legzersis pou teste e idantifye bann *hydrant* lo Mahe, Praslin, La Digue. Par zofisyé ki ganny *allocate* pou fer sa louvraz e osi par bann *staff* dan loperasyon, avek bi pou familyariz zot lekor ek lokasyon sa bann *hydrant* pou fasilit zot louvraz ler *emergency*.

Tou resaman nou'n konplet en tel legzersis dan distrik Perseverance, kot nou'n idantifye lokasyon 44 *hydrant* e fer demann pou fer pou remet 7 dan bann landrwa kot ti napa. Nou'n osi idantifye bann problemm kot lenfrastruktir ki'n ganny mete an plas in fer ki serten sa bann *hydrant* i difisil pou ganny servi. Mersi.

MR SPEAKER

Mersi CFO. Ou siplemanter Onorab Arissol.

HON SANDY ARISSOL

Mersi Mr Speaker. Mon ti a kontan dir CFO mersi pou sa travay avek ou lekip ki zot in fer dan distrik Bel Ombre pou idantifye bann *fire hydrant* e pou fer sa netwayaz. Mon ti a kontan demann ou en pti kestyon, an vi ki lalis ki ou'n donnen i baze dan Bel Ombre santral parey nou dir, me Le Niole pa'n ganny touse;- an vi ki Le Niole nou annan osi plizyer bann lakaz kekfwa ki an *age* bann lakaz ki en pe lwen avek semen,

eski pou annan en travay osi ki pou ganny fer pou asire ki nou annan en laliny apropriye oubyen en *fire hydrant* kelkonk, ki kapab rezourd serten problemm vitman an relasyon avek bout Le Niole? Sirtou apre stasyon tretman delo letan nou koup pon pou al vizavi kot Mr Philo i reste pli lwen posib dan zil Bel Ombre? Mersi bokou Mr Speaker.

MR SPEAKER

Mersi Onorab.

MINISTER ERROL FONSEKA

Yes, Mr Speaker, mon a pas sa ek CFO ankor, me mon pe get lo *map* lo sa bann *hydrant* mon

krwar i ganny kouver byen, byen soz. Selman mon a pas sa avek ek CFO.

MR SPEAKER

CFO ou annan laparol.

CFO TALLY DOMINGUE

Mr Speaker mersi. Onorab sa bann *hydrant* ki mon'n nonmen i dan parey ou dir i dan santral Bel Ombre, e parey mon'n dir ou sa legzersis i fer dan sak distrik. Le Niole osi ti ganny kouver lannen pase e sa lannen osi pou ganny rekouver dan son lenspeksyon.

MR SPEAKER

Thank you. Siplementer Onorab Pillay.

HON SEBASTIEN PILLAY

Mersi Mr Speaker. Mr Speaker prenan kont ki kontinyelman annan devlopman e i annan bann konstriksyon bann novo *housing estate*, e Bel Ombre pa en eksepsyon in annan bann devlopman in annan konstriksyon novo lakaz. Eski zot fer en travay pou zot mazin lo sa lalis *hydrant*, nou'n fer en travay pou ogmant lakantite *hydrants* ki annan, pou met li pli pre avek bann *housing estates* pou fer ki i ava annan en abilite pou zot *respond to* en dife.

E dezyenmman, eski zot lyez ek *Land Transport*, pou asire ki a okenn moman bann *hydrants* ki ganny trouve lo *main road* pa *end up* ganny kouver pandan travay ki pe ganny fer, sirtou bann travay re sifas semen? Mersi Mr Speaker.

MR SPEAKER

Mersi.

MINISTER ERROL FONSEKA

Wi Mr Speaker. *In fact*, ki mon a fer la, mon a *introduce* Mr Valmont ki osi *from PUC* ki ansarz sa bann zafer, apre travay ek *Land Transport* ou a kapab kouver sa. Mersi Mr Speaker.

MR SPEAKER

Mersi Mr Valmont, e pran laparol. Silvouple lev lanmen lekel ki pou adres kestyon? Mersi CFO.

CFO TALLY DOMINGUE

Mersi Mr Speaker, Onorab. Dan bann proze *housing estate* ki ganny fer nou annan nou *unit Planning* anba Prevansyon ki kouver sa bann proze lo nivo konsepsyon. E si i annan bezwen pou enstal novo *hydrant*, nou met sa lo nou rekomandasyon *at this time* e nou lyez avek *PUC* pou fer

lenstalasyon sa bann *hydrant* a, a bann moman.

Lo kote *SLTA* nou travay pre avek zot. Bann *hydrant* ki ler nou pe fer vizit nou war in ganny kouver, nou lyez ek *PUC* avek *SLTA* pou fer sir zot ganny met an operasyonnel ankor.

MINISTER ERROL FONSEKA

Mr Speaker zis pou azout en pti bout lo la, en keksoz ki nou ti a kontan nou bann *MNA* i pran kont lo la, i sa bann *hydrant* ki egziste apre zot fer konstriksyon ki anpes ou kapab servi li. Perseverance i klasik pou sa. So, sa i en keksoz ki ler zot pe pase, *especially with* sa bann devlopman nouvo ki pe vini kantite *housing estate* mon pe tann Minister Rangasamy pe averti.

Nou bezwen fer sir ki sa bann keksoz i pa arive, so, *keep a sharp eye* lo sa bann zafer prevansyon dan zot distrik. Mersi Mr Speaker.

MR SPEAKER

Mersi Minis. Kestyon Onorab Aglae.

HON EGBERT AGLAE

Mersi Mr Speaker. Minis sa size *fire hydrant* in en size osi ki'n leve dan lepase. Petet mon ti a kontan demann ou Minister e Departman *SFRSA* an vi ki - la

mon pou koz tou distrik mon en. I annan en plan devlopman, en plan devlopman ki pe ganny aprouve, eski zot pran kont osi sa laspe petet 5an, 10an avek bann devlopman sirtou avek *MIHLT*, pou pran kont laspe letan fer sa bann plan ki annan sa bann lokasyon ki ganny *earmarked* boner davans, avan ki bann lezot devlopman i pran plas pou plas sa bann *fire hydrant* sirtou kot i konsern semen?

E osi, eski zot annan ase parey akoz i annan fire *hydrant* ki *needs to be replaced* osi. I annan ki letan lensidan in arive nou'n war poudir i pa *conducive*, i pa pe fonksyonnen eski zot annan osi pou *replace* osi sa bann *fire hydrant*? Mersi.

MR SPEAKER

Thank you. Panel, lekel ki pou reponn?

MINISTER ERROL FONSEKA

CFO will response.

MR SPEAKER

CFO.

CFO TALLY DOMINGUE

Mersi Mr Speaker. Onorab lo kote devlopman nou parey mon dir nou annan sa bann dimoun, i annan 2 zofisyen ki ganny *assigned* sa louvraz, nou apel

zot *fire hydrant officers*, ki zot louvraz se lenspeksyon *hydrant*. E dan okenn landrwa ki zot war *hydrant* i manke oubyen *hydrant* i annan en *issue*, zot fer zot rapor e rapor nou anvoy kot *PUC*, si i konsern *SLTA* nou anvoy kot *SLTA*.

E parey mon'n dir ou lo sa *assessment* ki nou ti fer Perseverance, ti annan en *issue* lo kote *planning*, ki devlopman in ganny fer parey ou'n dir apre ki striktir ti'n ganny met an plas. Akoz lo kote *housing estate* zot *pipeline* zot bann zafer i met avan, e ki nou'n war se ki sa bann dimoun ki'n vin fer personnelman son lakaz in fer son miray *boundary wall* in blok *fire hydrant*.

E apre sa louvraz ki nou'n ganny fer sa *report* ki nou'n met avek *PMC*, sa pe ganny adrese ki zot pou pran li an kont *for the next estate*, ki zot pou fer sir ki sa bann lenfrastriktir pa ganny bloke ankor.

I en keksoz ki nou fek fer, nou pa ti pe fer li avan me selman nou pa ti pe fer li avek *PMC* avan, me selman nou'n war i annan en i pou benefisyé nou tou ki sa bann *hydrant* i reste a laporte *fire service* ler i bezwen li.

Akoz zot ti pe met li tro pre avek bann *building* ki vreman menm si i ti *accessible*, i pa ti

pou vreman itil si sa dife pe pran dan sa lakaz li menm. Lo kote *PUC*, Mr Valmont i asir mwan poudir zot annan ase hydrant pou ranplas bann ki pa bon, e pou nou ler nou enspekte sa ki nou war pa bon nou enform zot, zot enstale.

MINISTER ERROL FONSEKA

Mersi Mr Speaker. Zis mon azout en pti gin, an diskisyon avek *CFO* i ti pe enform mwan ki avan dan bann konstriksyon Gouvernman, zot pa ti ganny enkli dan sa bann diskisyon. Sa mon krwar in arete definitivman *now*.

Me selman ki rezulta sa, i ti annan en kantite bann vye *building* ki'n ganny konstrir lontan ki i mank sa *prevention* ki sipoze ek sa *building*. Mersi Mr Speaker.

MR SPEAKER

Mersi, nou a pran kestyon Onorab Roucou.

HON MICHEL ROUCOU

Mersi Mr Speaker. Mr Speaker Mrs Domingue in reponn en pti pe mon kestyon, me selman an vi ki nou war dan bann laplipar *housing estates* espesyalman bann vye, laplipar sa bann facilite pou tenny dife zot pe ganny abize. I annan ki pe ganny servi pou aroz fler, lav

loto. Eski i annan en legzersis ki zot pe fer ansanm avek *PMC*, pou fer sir ki bann rezidans sa bann *housing estate* i respekte sa bann soz ki'n ganny mete la?

MR SPEAKER

Mersi. Panel? CFO?

CFO TALLY DOMINGUE

Mersi Mr Speaker. Mersi Onorab. Pou lo kote *housing estate* nou'n fer plizyer *assessment* lo *housing estate*, Perseverance nou'n kouver li lo kote *hydrant* e nou'n kouver li en fwa avek Departman Risk lo kote bann *issues* ki bann dimoun ti pe gannyen lo kote elektrik akoz sa en koz dife.

E lo kote lekipman li pou *housing estate*, nou'n ganny sa bann plan parey mon dir ou lo nivo devlopman e nou fer rekomandasyon pou met sa bann lekipman. E avan ler sa bann *housing estate* i ganny *occupancy*, nou *unit Planning* i pase pou asire ki sa bann lekipman in ganny met an plas. E *PMC* i tonm anba son responsabilite pou li kontinyen *maintain* sa bann lekipman. E nou seksyon Prevansyon i pase lo bann landrwa Gouvernman ki annan lekipman pou fer sir poudir i ankor varyab pou servi.

E nou fer rekomandasyon avek sa lotorite konsernen pou li fer aranze. Mersi.

MR SPEAKER

Mersi.

MINISTER ERROL FONSEKA

Mr Speaker zis pou azout en pti gin, mon an diskisyon avek Minis Rangasamy lo bann *housing block*, mon'n remarke en kantite bann *housing block* i petet mank sa *supervision* e osi *cleanliness*. Me sa pou *maintain* sa bann landrwa dimoun parler pa pran sa swen avek.

E en keksoz ki mon ti a pe sizer avek li petet get bann *law enforcement* parey *SFRSA*, lapolis and all that ki dan tou *block* si i donn en fanmir rezerv enn pou sa bann *Law Enforcement Agencies* sa dimoun i kapab akt koman en *warden*, pou ed sa bann sityasyon ki nou pe koz lo la.

Ki nou annan *at least* en dimoun ki en pti pe disiplinen pou ed sa kominate. Mersi Mr Speaker. Mon *hope* ki sa i marse pou nou. Mersi.

MR SPEAKER

Mersi Minis. Bon, nou'n termin la avek sa kestyon e an se moman mon bezwen remersi tou bann zofisye avek Servis Tenny Dife pou zot

partisipasyon; - Mrs Domingue, Mr Madeleine e osi PUC Mr Valmont e Mr Bacco mersi pou zot prezans e mon swet zot bonn kontinyasyon.

(*The SFRSA and PUC delegation were excused from the House*)

MR SPEAKER

Mersi. Madanm reporter i ava osi apel prosen zofisyen delegasyon pou nou kontinyen kestyon.

Bonzour, e byenveni. Nou annan 5 zofisyen o grade lapolis la, nou asire ki napa naryen ilegal ki pou pase dan Lasanble an se moman. Byenveni Mr Francis Songoire *Deputy Commissioner*, Mr Antoine Denousse *Assistant Commissioner*, Mr Ned Wirtz *Assistant Commissioner* e lo latab a kote Asistan Sirentandan Joseph Bibi ki Direkter *Human Resources* e osi Assistant Sirentandan Mike Monthy. Mersi e byenveni pou pran par dan sa kestyon.

Mon annan 3 kestyon, mon'n akord Onorab Bastienne labsans dan Lasanble si i posib pou li asiste en *meeting* avek Minis konsernan son louvraz. So, ki nou pou fer nou pou pran sa 2 kestyon 55 ek 56 avan e nou a permet li ganny posibilite pou li retournen, e si i pa

retournen i annan en lot Manm ki pou poz son kestyon.

Nou a pran kestyon 55, Onorab Esparon me se Onorab Samynadin ki pou poz son kestyon pou li. Onorab Samynadin.

HON KELLY SAMYNADIN

Mersi Mr Speaker. Bonzour Minis ankor enn fwa avek ou delegasyon, kestyon limero 55 pou Onorab Regina Esparon i lir konm swivan; Eski Minis i kapab dir avek Lasanble premyerman ki plan son Minister pou ogmant *camera* sirveyans, dan lavil e son lantouraz, avek bi sirvey plis bann aktivite ilegal ki deroule?

E dezyenmman, si a lavenir zot anvizaze, enstal *camera* sirveyans dan bann distrik, sirtou dan bann *black spots*? Mersi.

MR SPEAKER

Mersi. Minis ou repons?

MINISTER ERROL FONSEKA

Mr Speaker mersi, me i paret ki nou larepons i kapab kouver tou lede kestyon si ou permet nou.

MR SPEAKER

Be ok, i dan sa ka wi. Dan sa ka i ava pli konvenab pou Onorab Loizeau poz kestyon Onorab

Bastienne a se moman, pou nou kapab kouver tou lede kestyon. Onorab Loizeau.

HON NORBERT LOIZEAU
(Off-mic)

MINISTER ERROL FONSEKA
Pa tande.

HON NORBERT LOIZEAU
(Off-mic)

MR SPEAKER

Carry on Onorab mon tann ou mwan, byen. Tre byen, Minis ou kapab prosede avek, avek repons preznan.

HON NORBERT LOIZEAU
(Off-mic)

MINISTER ERROL FONSEKA
Mersi Mr Speaker. Mr Speaker, kestyon i pe koz lo *camera*, me zis mon anvi fer referans ek krim dan pei ki en keksoz ki pe ogmante. Si lapolis pe fer en kantite *arrest*, en kantite zefor lo zot bout, selman sa i en keksoz ki nou bezwen vreman en zefor kolektiv pou atak sa bann sityasyon. E *focus* ki dan nou bann *housing area* dan nou bann distrik ki finalman dimoun i kapab viv en lavi anpe.

E osi Mr Speaker lo kestyon nou bann touris, i en

keksoz konsernen ki nou bezwen fer sir ki lapolis i pe kouver sa bann *area*, akoz sa osi parey zot konnen i en keksoz ki presye pou nou dan nou lekonomi.

Me zis avan mon kontinyen Mr Speaker, mon le pran en pti moman pou pas mon kondoleans lo lafanmir Hans Hackle ek son garson Roland ek son bann fanmir, lo sa lensidan ki'n arive e i tous nou en kantite ler en lensidan koumsa i arive.

E alor lanmenm ler nou bezwen tou zefor ansanm pou nou travay kont sa sityasyon. Avek sa Mr Speaker mon a pas laparol ek *ACP Denousse* pou koz en pti gin lo *the CCTV coverage* apre zot plan lo la. Mersi Mr Speaker.

MR SPEAKER

Mersi. Mersi Minis. Mr Denousse kontinyen *please*.

ACP ANTOINE DENOUSSE

Mersi Minister, mersi Mr Speaker. Bonzour Mr Speaker, bonzour tou Manm e bonzour tou dimoun a lekout.

MR SPEAKER

Un instant s'il vous plait. Mon war zofisyte teknik Lasamble la, e mon pe demande si i annan en problemm son oubyen keksoz

koumsa? E si i annan nesesite pou fer entervenir?

HON NORBERT LOIZEAU

Mr Speaker, mon a reponn sa. Dapre zofisyen i dir mwan mon pou bezwen repet kestyon akoz i pa'n antre lo rikord, akoz menm si mikro ti *on* - la prezan in *ok*, mon krwar.

MR SPEAKER

La prezan i *ok*? permet nou repet kestyon e zis pou fer li antre lo rikord. Onorab Loizeau, wi?

HON NORBERT LOIZEAU

Mersi ankor enn fwa Mr Speaker. Kestyon Onorab Bastienne i lir koumsa, vi ki tou sord kalite krim ek vol pe kontinyen arive dan plizyer landrwa dan Sesel; Eski Minis pou Zafer Entern i kapab donn Lasanble en kontrandi lo sityasyon ek leta bann kamera ki ganny plase dan visinite lavil e osi bann distrik ki bord avek Victoria ki sours levidans konkret pou detekte krim ek vol?

Dezyenm parti son kestyon i lir koumsa; Ki kantite parmi sa bann kamera ki pa pe marse pou le moman e eski ou Minister i annan plan enstal nouvo kamera dan landrwa kot i neseser? Mersi Mr Speaker.

MR SPEAKER

Mersi bon, preznan wi Depite Komisyoner Denousse i ava kontinyen avek son repons.

ACP ANTOINE DENOUSSE

Mersi Mr Speaker. Ankor enn fwa bonzour tou Manm. Mr Speaker lapolis i kapab konfirmen ki i annan 123 *camera* ki'n ganny plase dan plizyer landrwa stratezik dan lavil e an deor. Mr Speaker nou tou nou konnen poudir *camera* i ganny plase pou rezon sirveyans ede dan deteksyon letan en krim i ganny komet.

Sa bann *camera* i enn bann sours ki lapolis i servi dan son loperasyon toulezour pou lalit kont krim. Par kont Mr Speaker nou konn sensibilite ekspoz an piblik lenformasyon vizavi sekirite e pou sa rezon ki Mr Speaker ek nou lapolis pa krwar ki nou dan en pozisyon pou devwal lenformasyon, ki lapolis i krwar i kapab poz en risk pou sekirite entern parey kot demann ki kantite *camera* ki pa pe fonksyonnen.

Sa ki mon kapab partaz avek nou Lasanble, se ki nou annan 65poursan nou bann *camera* ki pe fonksyonnen a plen tan. Sa Mr Speaker i kapab pa devwal bann tel lenformasyon ki kapab vin en

lavantaz pou bann kriminel. Par kont Mr Speaker sa i pa vedir ki lapolis pa pe port latansyon lo leta ek kondisyon aktyel sa bann *camera*.

Annefe Mr Speaker, nou byen kontan pou anonse ki prosedir i an mars pou ki lapolis i ganny en novo kontrakter ki pou fer travay mentenans lo tou *camera* lapolis, e sa pe ganny fer atraver prosedir *tender procurement Limited Tender* pou la senp rezon ki en tel kontra i ase sansib.

Mr Speaker parey mon repons pou lannen pase pou kestyon Onorab Larivyer Anglaise lapolis in kapab aste plizyer lekipman ki annan pou fer avek ranplasman serten *camera* ki an operasyon. Bann sistenm *camera* ki pe ganny ranplase, i bann ki bokou pli modern e pli efektiv, vedir son bann kalite i pli bon ki sa bann avan.

Fodore note Mr Speaker, parey mon'n dir ranplas bann *camera* i en proze kontinyel depandan lo Bidze ki pou sa lannen e nou dir mersi ki Lasamble in aprouv en Bidze e nou'n resevwar en sonm R9mil anplis pou sa proz, vi ki nou anvi etablir en sistenm *camera* nasyonal ek konpreansiv.

Mon oule atraver ou Mr Speaker, donn serten detay lo ki mon pe dir par en sistenm konpreansiv. Nou le *link* tou nou bann *camera* lo en platform nimerik ki kapab ganny kontrole e sirveye dan nou sant komann, ki sa i a kapab ed nou ek nou sistenm komann e kontrol. Nou le osi konnekte bann *camera* ki pe ganny enstale e servi par tou lezot lazans dan Gouvernman e parastatal lo sa platform.

Mr Speaker i enportan note ki tim *drone* lapolis i osi zwe en rol tre enportan dan sirveyans dan Victoria, otour lavil e menm dan bann lezot distrik. Mersi Mr Speaker.

MR SPEAKER.

Mersi *Deputy Commissioner* pou sa repons. Nou a komans avek bann siplemanter. Mon a pran premye lo lapar Onorab Esparon.

HON KELLY SAMYNADIN

Mersi Mr Speaker. Minis bann levidans ki zot anmase lo sa bann *camera* sirveyans, eski zot pe servi sa bann levidans, pou ede dan zot travay deteksyon kont bann krim, tranzaksyon ilegal e osi koman bann deterrents pou sekirite popilasyon?

E dezyenmman mon ti a kontan konnen, vi ki i annan distrik ki napa en stasyon lapolis parey Au Cap, mon pe demann avek zot si zot pe konsider pou enstal servis *camera* dan sa bann distrik avek - parey dan distrik Au Cap nou pe ganny kantite ka krim, ka vol ki pe kontinyelman ogmante. So, as a means of deterring sa bann krim, eski zot pe mazin konsider enstalasyon bann *camera* dan bann distrik ki napa en stasyon lapolis? Mersi.

MR SPEAKER

Mersi. Minis ou a pran sa bann kestyon.

MINISTER ERROL FONSEKA

Premye bout. Mr Speaker, mersi pou sa kestyon. Mersi Onorab pou kestyon. Premye bout lo kestyon *evidence* mon a les *DCP Songoire* reponn lo la. Mersi.

MR SPEAKER

Mersi, yes *DC Songoire*.

DCP FRANCIS SONGOIRE

Bonzour Mr Speaker. Bonzour tou Onorab prezan. Wi, Onorab annefe i sa ki nou fer touzour ler i annan bann *case* ki ganny rapporte e par servi levidans *camera* i en fason egzakt e direk

pou anmenn levidans kont serten bann sispe ki ganny arete dan bann *case* krim. Mersi Mr Speaker.

MR SPEAKER

Thank you. Next point.

MINISTER ERROL FONSEKA

Yeah. Mersi *DCP* pou ou larepons and Onorab pou ou kestyon Au Cap tou sa bann *area*, nou anvi en sistem - en *national system* me bann pozisyon kot lapolis in bezwen kouver, akoz nou bezwen konn rikord avek sa, nou bezwen kouver bann landrwa stratezik dan tou *areas* ki nou, nou konn mannyer krim i marse dan sa tel landrwa.

Me an menm tan pou nou redwir kou pou fer tousala lo en *national basis*, mon pe koz lo *national basis including* Praslin and La Digue. Bann lenstitisyon ki annan zot prop *camera* Eden Island, *SEYPEC* bann landrwa koumsa, nou anvi en sistem ki kapab *interface* sa bann *camera*.

E dan rezon Au Cap si i annan *investment* - mon konnen Anse Royale i annan en proze ki pe deroule ki sa bann sistem ki ganny etablir par bann *private sector* e si zot bann *perimeter camera*, pa bann lezot *camera* anndan dan zot bann

landrwa me zot bann *camera* ki kouver zot *perimeter*, nou kapab *clone* sa i pou ed nou plis dan sa depans.

Akoz sekirite i nou responsabilite nou tou, e nou bezwen ankouraz *private sector* to ankouraz zot pou annan sa bann *area* kouver zot bann *approaches*, zot bann *entrance* e nou, nou tap on lo la e nou kapab annan en sistenm byen efikas lo Mahe, lo Praslin, lo La Digue.

E pou bann zafer loperasyon la nou annan en gran lavantaz - *obviously drone* i donn nou sa fleksibilite *to have live stream* lo en serten loperasyon ki pe arive.

Me selman *recording events, investigations, tousala* i enportan pou anmas levidans lo ler keksoz in fini devwale lekel ki'n pas la eksetera, eksetera. So, sa *static continuous recording* i enportan lo la. Mersi Mr Speaker.

MR SPEAKER

Mersi Minis pou sa, nou a pran kestyon lo lapar Onorab Bastienne. Onorab Loizeau?

HON NORBERT LOIZEAU

Mersi Mr Speaker. Mr Speaker Onorab Bastienne i annan zis en siplemanter, e mwan mon

annan 2 mon pou fer li tou ansanm.

Kestyon siplemanter Onorab Bastienne i lir koumsa; dan lenstans kot en krim ou en vol in arive dan sa landrwa, i annan en *camera* lo zis en propriete prive, eski se lapolis ki apres sa propriete pou kapab demann *footage* ouswa sa viktim ki sipoze fer sa demars pou ganny *footage*? Sa i kestyon Onorab Bastienne.

E mwan mon lot kestyon siplemanter pou mwan azout avek, eski sa prive i oblige donn sa *footage* lapolis, e si wi ki proteksyon lapolis i donn sa dimoun dan prive?

E osi lo kote *monitoring*, eski tou sa bann *camera* dan lavil, eski *monitoring* lo sa bann *footage* ti ganny anmase lo sa bann *camera* i ganny fer lo en sistenm 24 lo 24, ouswa zot *review* kan i annan en krim ki'n arive? Mersi.

MR SPEAKER

Mersi. Onorab in profit en pti pe lo prosedir la, me selman omwen, omwen ou bann kestyon i dan menm laliny. Minis nou ava adres sa bann.

MINISTER ERROL FONSEKA

Mersi Mr Speaker, mersi Onorab pou kestyon. Mon a demann *DCP* pou kouver sa

bout lo krim ki arive dan landrwa prive e osi lobligasyon tou lede kote, e apre nou a koz lo sa *monitoring bait*. Mersi Mr Speaker.

MR SPEAKER

Mersi. *Deputy Commissioner* ou ava adrese.

DCP FRANCIS SONGOIRE

Mersi Mr Speaker. Mersi Onorab. Annefe sa i ganny fer souvan dan konteks kot *camera* i ganny trouve lo propriete prive. I swa ki sa dimoun lapolis i apres li, i deside pou donn li volonterman. Me si non nou toultan kapab fer li atraver en warant ki lakour i donn nou permision pou nou al *extract* sa levidans kot sa, lo sa propriete. Mersi Mr Speaker.

MR SPEAKER

Mersi.

MINISTER ERROL FONSEKA

Ok, Mr Speaker mon a kontinyen lo kestyon *monitoring* en pti gin, petet lapolis i a re anfors sa. Me selman *basically* bann *static cameras* i *24-hour recording*, e i depan lo ki kantite letan ou kapab *store* sa. E sa i vreman depan lo ou *bites* ki lo ou *control unit*.

Me selman oule *maximum* letan e i pa en bon sizesyon pou

mwan dir ou *what is the maximum* ki lapolis i travay lo la, *because* sa *duration* i *override* apre en serten moman. So, annou kit sa la. Me pou loperasyon - *monitoring* loperasyon si i annan en loperasyon pe arive dan en serten landrwa kot i annan *cameras obviously* ou pou annan en *visual monitoring*.

Otherwise, ou pa kapab vreman other than key points, bann choke points, bann special areas, ki ou kapab pran en seksyon, en douzyenm camera met lo en landrwa pou monitor li, akoz ou konnen sa bann landrwa sansib.

Me selman ou pa pou kapab *monitor 100 percent* ou sistenm *unless* ou annan en *live operation* ki pe arive dan sa landrwa. I *humanly impossible* pou fer sa. Si ou get bann *match football* sa i *great* pou *monitor*. Ou kapab *zoom in and all that* akoz i pou en *period of time*. *Otherwise, ou pou bezwen annan ou en gran group tim, en gran group tim pou fer sa live monitoring.* Mersi Mr Speaker.

MR SPEAKER

Mersi, mersi Minis. Nou a pran kestyon Onorab Roucou.

HON MICHEL ROUCOU

Mersi Mr Speaker. Minis mon kestyon i koumsa mwan en, eski zot pe apres osi nou bann pei zanmi ouswa bann *partner* ki lapolis i annan, pou kapab ed zot avek *camera* li menm li pou kapab deservi dan plizyer distrik? E osi lo kote bann dimoun ki pe *operate* sa bann *camera*, eski i annan en *training* spesifik ki zot pe gannyen pou kapab detekte bann krim? Mersi.

MR SPEAKER

Mersi. Minis lekel ki pou adresé?

MINISTER ERROL FONSEKA

ACP Denousse i kouver.

MR SPEAKER

Yes Deputy.

ACP ANTOINE DENOUSSE

Mersi Minister. Mersi Mr Speaker. Nou bann zofisyé ki pe *monitor* bann *camera* i bann dimoun ki'n ganny *train* Onorab e zot bann dimoun ki kapab. I annan bann *training* ki toulezour si oule nou pe ganny bann *training* lo nou sistèm *camera*. Mersi.

MR SPEAKER

Wi, i annan lot pwen? Ok nou a... i annan en pwen ki pa'n

ganny reponn? silvouple zis repet li vitman.

HON MICHEL ROUCOU

Si an ka lapolis li menm li, i annan bann pei zanmi ouswa bann *partner* ki lapolis si annan, si zot annan serten diskisyon pou zot kapab ganny ede avek bann *camera*.

MR SPEAKER

Mersi. Minis, ou ava al direk lo la.

MINISTER ERROL FONSEKA

Non, Mr Speaker. Akoz ler nou *procure* sa bann zafer i bezwen *compatible* ou pa kapab pran en bout isi, en bout laba *you need to become compatible* ek sa. Selman *camera* is normally son *camera itself*, konmela i *broad* ti annan en lepok ti vreman en problem. *Nowadays* i pli *more fleksib* me selman *at the same time* ou bezwen tyeke. Mersi Mr Speaker.

MR SPEAKER

Mersi. Onorab Woodcock.

HON WAVEL WOODCOCK

Mersi Mr Speaker, Mr Speaker napa zis move nouvel lo Praslin. Pou ozordi nou ganny nou en nouveau santener dan distrik Grand Anse Praslin. Mr

Raymond Hoareau i ganny 100an ozordi.

(APPLAUSE)

HON WAVEL WOODCOCK

Mon pran sa lokazyon pou swet li Bonn Anniverser. Minis mon kestyon i baze lo kestyon Onorab Espanon kot i konsern *camera* sirveyans dan distrik, depi lensidan *break in* resaman dan bann *cable kiosk* Grand Anse Praslin dan sant Grand Anse, i annan plizyer konsern par bann zabitam dan distrik.

Akoz i en landrwa kot i annan plizyer bann biznes labank, ladministrasyon distrik i lanmenm, petrol station, biro SRC e plizyer bann biznes. Alor mon kestyon i en pti pe lo sa *well*, kestyon, propozisyon an menm tan ki eski zot pe anvizaze sirtou bann landrwa bann sant dan bann distrik parey sant Grand Anse i parey en pti lavil lo li menm?

Nou annan lo kote Baie Ste Anne, Cote d'Or osi lezot landrwa lo Mahe dan bann sant kot i annan bokou bann biznes. E si zot pe konsidere ouswa zot in fer en *sort of survey* resansman, pou idantifye bann landrwa kot i annan sa bann biznes kot pe *operate* kot i annan bann risk kot i kapab

annan bann *break in* pou zot enstal bann *camera* dan sa bann rezyon, ki annan en *high volume* trafik, biznes, eksetera? Mersi.

MR SPEAKER

Mersi. Minis.

MINISTER ERROL FONSEKA

Mr Speaker, mersi pou sa kestyon, Onorab mersi pou sa kestyon. *Advisory from the police* toultan i ankouraz sa bann *business area* e *advise* zot lo bann *areas* kot zot bezwen met *camera*, pou ed zot apre pou ed lapolis. Me mon krwar DCP Denousse i annan en keksoz spesifik i anvi *report* lo la.

MR SPEAKER

Tre byen. *Deputy?*

ACP ANTOINE DENOUSSE

Mersi Mr Speaker. Mersi Minis. Mr Speaker i enportan pou note ki kot tou bann *Cable kiosk* tou sa bann landrwa tou bann kase, tou sa bann landrwa i annan bann *camera* e bann biznes lo Praslin bann batiman ki'n fer sirtou parey lo Grand Anse e bann landrwa kot i annan *camera CCTV*.

E tousala parey pli boner DCP Songoire in fer referans, i

bann *footage* ki'n ed nou pou nou dekouver bann dimoun ki ti pe kas fer sa bann sabotaz, ki sa bann dimoun ozordi zot pe rimann Montagne Posse. Mersi Mr Speaker.

MR SPEAKER

Mersi, kestyon Onorab Cosgrow.

HON WALLACE COSGROW

Mersi Mr Speaker. Bonzour Minis ankor enn fwa avek delegasyon sorti kot lapolis.

Mr Speaker mon premye kestyon se ki anvi taler Minis in dir nou, petet Mr Denousse in dir nou poudir i annan aepre 35poursan bann *camera* dan lavil ki pa pe neseserman pe fonksyonnen e i zistifye irzans pou fer *procurement limited bidding* ouswa *closed bidding* pou servis met *camera* dan lavil.

Eski Minis i kapab dir nou lekel sa lakonpannyen e eski i krwar i pou ganny bon *value for money*, akoz vi ki in fer *limited bidding?* E dezyenm eski Minis i kapab dir nou si tou *camera* ki dan bann landrwa piblik sirtou dan Victoria, i ganny *operate* par lapolis ouswa i annan *camera* prive dan bann landrwa piblik Victoria.

E mon trwazyenm i en lobzervasyon Mr Speaker baze

lo sa ki Minis in dir, mon en pti pe enkyete ler Minis i dir i le fer bann *camera* lapolis *interface* avek bann *camera* dan bann landrwa lenstans prive.

Pou mwan sa pou mwan i *border lo privacy citizen* kot i konsern zot drwa mouvman bann keksoz koumsa, e mon vreman enkyete ler mon tann Minis dir en keksoz koumsa. Akoz demen bomaten lapolis i kapab tap in dan nenport ki *camera* e mon konpran sityasyon krim me selman nou bezwen osi vey lo laliberte mouvman nou sitwayen osi. Mersi bokou Mr Speaker.

MR SPEAKER

Mersi Minis.

MINISTER ERROL FONSEKA

Mersi Mr Speaker. Mon a pran ou dernyen kestyon. Konsern premye annou pa kri dife ler napa dife, si nou al kot en *private sector* nou dir li si nou kapab servi son bann *perimeter camera* pou *clone* ek pou nou, i kapab dir nou non, me selman i war poudir i pou ed li si nou kapab fer sa.

Akoz nou kapab ed li, so napa okenn *restriction of right* ki sa pou arive akoz nou dan en demokrasi ozordi nou kapab koze, nou kapab diskite, nou kapab negosye, nou kapab

kolabore. E nou bezwen kolabor plis e pa war tou keksoz ki nou bezwen lev tou *carpet* avan nou fer keksoz.

Nou bezwen annan *trust* parmi nou menm e travay ansanm. Akoz sa problem krim dan pei en keksoz ki nou tou nou bezwen travay ansanm en kestyon kolektiv nou bezwen fer. So, biznes i tonbe sa *private sector* osi son biznes pou tonbe so nou bezwen kalkil sa.

Dezyenm keksoz Victoria lapolis ki napa *private sector* ki vey *camera* ki annan lapolis e parey mon dir kolaborasyon ek bann sistenm prive i kapab marse. Me selman nou, nou pa pe lapolis pa pe vey *camera* okenn prive dan Victoria.

Lo kestyon ki lakonpannyen in gannyen, *procurement* mon pa *aware of it*, *procurement* i ganny fer par *procurement area* e menm si mon ti konnen mon pa ti pou vin la devan Lasanble pou nonm okenn lezot lakonpannyen. Me selman tyek lo la e son bann *source* ozordi zot donn *access and you can get that question*. Mersi Mr Speaker.

MR SPEAKER

Mersi Minis. Klarifikasyon Onorab? Ou'n bezwen deza fer 3 pwen. Mersi.

HON WALLACE COSGROW

Mr Speaker mersi pou les mwan klarifye, nou pa pe kri dife kot napa dife, me selman parey nou'n deza dir pou dir nou annan mefyans avek ki mannyer Gouvernman i fer serten travay. E nou lo sa kote latab nou anvi

(Interruption)

MR SPEAKER

Order!

HON WALLACE COSGROW

...war keksoz i mars drwat.

(Interruption)

MR SPEAKER

Order!

HON WALLACE COSGROW

E si ou pe koz lo dwa *privacy* sitwayen nou pe koz lo drwa *privacy* sitwayen, Minis i annan en *duty*...

(Interruption)

MR SPEAKER

Mersi.

HON WALLACE COSGROW

...pou li reponn e pa koz Manm Lasanble mirak. Mersi bokou Mr Speaker.

MR SPEAKER

Mersi Onorab ou'n al dan en largiman, mersi. Nou a pas lo kestyon Onorab Vidot.

HON AUDREY VIDOT

Mersi Mr Speaker. Minis mwan mon pou siport sa 2 kestyon ki'n vin lo *Order Paper* lo sa size krim dan pei, e ler ou pe dir nou travay ansanm nou bezwen onnet e fran Minis.

Pa kapab dir nou travay ansanm ki ler nou lo sa kote latab i anmenn kestyon nou demann ou lo size krim, ou dir avek nou poudir krim i anba kontrol, *ok?* Me selman nou vvar poudir i annan problem.

Alors Minis ler zot dir avek nou poudir *camera* i kapab vin devan koman levidans - e ki zot annan anba kontrol krim Sesel - akoz ki ozordi sitwayen ki anmenn devan levidans lo *camera*, sa bann menm dimoun i ganny large zot kontinyelman vole dan sa menm kominate e dimoun pe komans pran aksyon - sivilyen pe komans pran aksyon lo zot menm.

Alors Minis i annan problem, alors pa kapab dir nou poudir zot annan kontrol e dir nou poudir levidans i kapab ganny *camera* i kapab ganny servi koman levidans, koman i pa leka.

E dan rezyon Roche Caiman i regretab ki i annan serten lenstitisyon skoler ki zot, zot annan *camera*, zot annan sekirite, ki zot kontinyelman ganny vole. Me *still* i annan keksoz ki zanmen nou kapab konnen kote in ale? Ni ganny konnen lekel ki'n kondannen pou vol lenstitisyon lekol, alors pa dir nou ankor poudir keksoz pe marse i anba kontrol. Mersi Minis.

MR SPEAKER

Wi *ok*, Onorab. Ou'n fer en largiman, Minis silvouple si ou kapab adres son pwen brefman.

MINISTER ERROL FONSEKA

Yeah. Mersi Mr Speaker, Mersi Onorab pou ou lentervansyon. Lo kestyon levidans mon a pas avek *DCP* pou eksplik en pti gin mannyer sa i marse.

MR SPEAKER

Mersi. *DCP?*

DCP FRANCIS SONGOIRE

Mr Speaker, Onorab wi en dimoun i anmenn son levidans dan ki en fason *digitalized* parey ou'n dir. Me selman i pou tou depan, akoz sa *investigating officer* pou li egzamin levidans pou li fer li vin antre koman en levidans konkret i en lot zafer.

Anplis ki sa si levidans i kler i korek e ou kapab siport en sarz, i pa responsabilite lapolis si - sa dimoun i kapab ganny sarze i pa neseserman ki i bezwen reste anndan, ouswa rimann ouswa kondannen. So, sa i dan ziridiksyon lazistis, lakour pou deside ki arive ek sa boug.

Me otan ki en levidans *camera digital* i kler i kapab siporte pou ou *convict* sa dimoun, ouswa pou sarz li, lapolis wi i pou fer li e sa lot bout si sa dimoun i al deor ouswa i rimann i reste avek lakour. Mersi Mr Speaker.

MR SPEAKER

Mersi. Kestyon Onorab Pillay.

HON SEBASTIEN PILLAY

Mersi Mr Speaker. Mr Speaker lo komansman larepons nou'n ganny dir poudir i annan 123 *camera* e si mon pa tronpe en pti pe plis ki 79 poursan bann *camera* pa pe marse, savedir i fasil pou fer kalkil pou dimoun konnen konbyen *camera* ki pe marse, konbyen *camera* ki pa pe marse, menm si zot pa'n dir nou konbyen *camera* ki pe marse, konbyen ki pa pe marse.

Mon kestyon pou Minis *ok*, si sa bann *camera* pe marse e zot sipoze pe *act koman en deterrent*, akoz alors nou pe *still*

war lensidan krim dan sa bann rezyon kot i menm annan *camera*. Si *unless* sa bann camera pa pe marse lapolis pa pe dir nou.

Se sa mon problem la, so, eski ou kapab donn nou en lesplikasyon lo kwa ki ou pe fer pou fer *monitoring* pou regarde bann landrwa kot nou annan *camera* si zot pe marse, si pa pe marse san ki ou pe devwal okenn lenformasyon ki sipoze par son natir sekre pou nou konnen si relman *camera* lenvestisman ki nou pe fer ladan pe anmenn sa *deterrent* ki sipoze anmennen an relasyon avek kriminalite.

Dezyenmman Mr Speaker mon demann sa kestyon avek tou respe, Minis li menm i enn bann operator e *owner* enn bann pli gran lakonpannyen sekirite dan nou pei, *ok?* Eski Minis i kapab garanti nou ki napa okenn konfli lentere dan travay ki son lakonpannyen pe fer, ki mon'n regarde lo televizyon felisitasyon pou zot progre, travay ki zot in fer.

Me lefe i reste ki mon pa ti a kontan war ki Servis Lapolis pou li son standar i desann, me servis konpannyen sekirite ki *own by the very Minister* ki li i sipoze ansarz lapolis son standar i monte. Mon pe zis dir sa pa ki Minis pe fer desann

standar lapolis mon pe zis dir, la, la realite ki nou pe fer fas avek dan nou pei e ki nou tou nou pe aksepte.

Konpannyen sekirite *owned by* Minis i fer bon performans, lapolis ki tonm anba responsabilite Minis pa kapab fer menm performans. Sa ki mon bezwen met devan dimoun e en realite ki nou bezwen fer fas avek.

E mon dernyen pwen Mr Speaker, ankor enn fwa sa kestyion i bezwen ganny demande akoz se nou ki Lasanble Nasyonal. E fodre nou aret per pou demann sa bann kestyion, ki mannyer publik pou annan konfyans dan sistenm sekirite lapolis e son servis *deterrent* atraver *camera* kan levidans ki lapolis i anmase tel koman drog ki'n sezi i *end up* ganny revann e Prezidan in konfirmen yer swar ki i annan zofisyen ki'n vol e pran sa bann drog. Pa mwan, Prezidan ki'n konfirmen!

So, eski Mr Speaker sa kestyion i bezwen ganny reponn akoz *it goes right into the heart of* sa kestyion ki devan nou, se ki, ki lenpak sa bann *camera* i kapab fer? E ki mwan mon ti a kontan letan nou pe diskrit Bidze demen nou pe donn lapolis resours ki neseser pou li

kapab fer son travay. Mersi Mr Speaker.

MR SPEAKER

Mersi. Minis i ava adres kestyion.

MINISTER ERROL FONSEKA

Mersi Mr Speaker. Premyerman, sa zafer ki ou pe *insinuate* dan en fason i drol ki sa Gouvernman ozordi, sa Gouvernman ozordi i annan pli gran oter *honesty* ki okenn Gouvernman Sesel in deza egziste.

(APPLAUSE)

MINISTER ERROL FONSEKA

Menm si bann lavantaz ki oparavan pa ti pou gete, zot ti pou zis pran lavantaz. Ozordi egzakteman sa ki ou pe dir i ki nou pe fer ki nou pa pou antre dan bann *favorable contract*, ler ou annan en lentere ladan. Nou pa pou fer sa ditou.

E mwan koman Minister Entern ou, ou panse mon pou al pran en pti bout kontra avek lapolis? Be Onorab, Onorab nou pa koumsa nou, nou pa koumsa zis nou pa pou fer li nou me nou pa koumsa.

E mon krwar akoz, akoz nou pa koumsa ki zot war i drol ki nou pa koumsa.

(APPLAUSE)

MINISTER ERROL FONSEKA

Zot santi li drol zot krwar nou pa fer, me nou pa pou fer li. So, lapolis mon pa ni konnen lekel ki zot *tender* akoz zot servi zot prop - *in fact* mwan *keep away from* sa bann *area* koumsa pou rezon ki dimoun pou sey met 2 ek 3 ek 4 ansanm. So, annou pa al laba nou pe gat letan la, letan Mr Speaker ki serye nou pe al lo bann *area* koumsa.

Deterrents mon pou dakor ek ou, *deterrents* i pran par tou aksyon lapolis e Prezidan in kondann sa sityasyon - *quite rightly so*. In kondannen e sa ki bon avek sa Prezidan i pa'n per pou kasyet, i pa'n met anba karpet in dir sa i mal i mal, *ok?*

(APPLAUSE)

MINISTER ERROL FONSEKA

E nou konnen e i vre sa ki ou dir i pa bon pou *deterrence*, because ou bezwen *open* - ou bezwen ouver kapab ouver ou lanmen. So, *basically* lo sa *area* ki ou'n koz lo la, mon krwar mon'n ase fer *explanation* lo la. Mersi Mr Speaker.

MR SPEAKER

Mersi. Onorab Pillay mon pe prese akoz mon anvi donn Onorab Gabriel en sans,

silvouple en klarifikasyon pou nou terminen.

HON SEBASTIEN PILLAY

Mersi, mersi Mr Speaker. Mon note anba sa ki Minis in dir sa ki mon'n dir i vre i enportan pou Seselwa tann sa. Mr Speaker mon oule zis met lo rikord ki nou ti etablir ki Minis Derjaques, son *firm* ti pe fer en travay avek *Travizory* e li i ti dan Gouvernman. Mon kestyion pou Minis Mr Speaker ki enportan ki Minis i reponn, *going back to* sa 123 *camera* ki sipoze dan bann landrwa piblik e i pe fer en louvraz *deterrent*, kestyion ki pa'n ganny reponn ziska la, se ki i annan serten *camera* mwan mon'n fer sa kalkil mon pa pou dir lakantite *camera*, me tou dimoun ki la deor i konnen prezan akoz ou'n dir poursantaz sa bann *camera* ki pe marse, ki pa pe marse.

Kestyion pou Departman Lapolis eski tou sa bann *camera* - e la mon le ganny lasirans Mr Speaker akoz mon ti a kontan Komite Defans i verifye, eski tou sa bann *camera* ki lapolis i dir nou pe marse sa 70 poursan pa pe marse -pe marse e pe rikord bann lensidan aktivite ki arive dan bann landrwa piblik, ki kapab ganny servi koman levidans dan bann *case* Ankour. Mersi Mr Speaker.

MR SPEAKER

Mersi. Klarifye Minis silvouple.

MINISTER ERROL FONSEKA

Yeah, Mr Speaker mon a donn ACP Denousse pou reponn.

ACP ANTOINE DENOUSSE

Mersi Mr Speaker, mersi Onorab pou ou kestyon. Mon ti a kontan asir sa Lasanble bann *camera* ki nou'n dir pe marse, i pe marse e i pe rikorde parey nou'n fer resorti. E i annan bann lenstans ki son bann *footage* in ganny servi koman levidans devan Lakour. Mersi Mr Speaker.

MR SPEAKER

Mersi, mon pre pou *run out of time*. Selman mon a donn Onorab Gabriel sans pou en kestyon *akoz* i fer dezyenm fwa i lev son lanmen. Onorab.

HON CONRAD GABRIEL

Mersi Mr Speaker *bonjour a tous, welcome* Minis ek ou delegasyon, mon dir bonzour tou bann dimoun Pointe Larue ki a lekout. Mr Speaker mon ti a kontan konnen petet ek Minis, konbyen i kout pei an zeneral pou *maintenance* tou sa bann *camera* avek sa 9 milyon anplis ki nou'n gannyen pou sa proze?

Apre eski i annan bann ka oubyen lenstans kot *camera* in ede pou rezourd bann problem kriminalite, so *whatever*. Kantite ka ki'n kapab ganny rezourd *so far* avek sa kantite larzan osi ki nou pe depanse avek sa bann *camera*? Mersi.

MR SPEAKER

Mersi. Minis ou repons.

MINISTER ERROL FONSEKA

Mon a pas avek Mr Denousse, Mr Speaker.

MR SPEAKER

Tre byen, Mr Denousse.

ACP ANTOINE DENOUSSE

Mersi Minister. Mersi Mr Speaker. Mersi Onorab Gabriel pou ou kestyon. Onorab parey ou'n fer resorti nou annan R900mil dan Bidze sa lannen pou *camera*, e nou napa sif konbyen i koute pou... *DG* i ava annan sif avek li e parey mon'n dir i annan bokou lenstans ki *footage* sa bann *camera* in ganny servi devan Lakour koman levidans, dan bann *case* ki'n anrezistre dan pei sirtou dan lavil. Mersi.

MR SPEAKER

Mersi. Eski ou dir ki *DG* i annan en sif ki i kapab donne? Yes, *go ahead please*.

DG JOSEPH BIBI

Mersi Mr Speaker. Mersi Onorab pou ou kestyon. I kout nou environ R80mil zis pou *maintenance* en? Zis pou *maintenance* e la mon pa pe koz lo aste *whatever*, zis pou *maintenance*. Mersi Mr Speaker.

MR SPEAKER

Mersi. Bon mon pou avans lo nou dernyen kestyon 56 ki dan non Onorab Churchill Gill.

HON CHURCHILL GILL

Mersi Mr Speaker. Bonzour Minis avek ou delegasyon e tou Manm. Kestyon i lir koumsa;

Eski Minis i kapab eksplik sa Lasanble pou benefis zabitan Baie Ste Anne: -

Kan ki konstriksyon nouveau Kordgard Baie Ste Anne pou komanse, parey nouveau plan ki ti'n fini ganny fer?

Ki kalite travay renovasyon ki pou ganny fer lo sa batiman kot proprieter magazen Meyer i'n fer lesanz avek Gouvernman? Mersi.

MR SPEAKER

Mersi. Minis.

MINISTER ERROL FONSEKA

Mersi Mr Speaker, mersi Onorab pou ou kestyon. Mon a

pas over to DG pou donn en total account lo la. Mersi Mr Speaker.

MR SPEAKER

Tre byen, DG ou annan laparol.

DG JOSEPH BIBI

Mersi Mr Speaker. Mersi Onorab pou ou kestyon. Mr Speaker nouveau kordgard pou ganny fer an servan sa magazén, e dapre konesans ekonomik e osi nou dan *policing* i en bon landrwa e son lespas in permet nou, i permet nou met tou bann fasilité operasyonné tel koman landrwa kot nou resevwar manm piblik ki pou enkli en *waiting area*, landrwa pou nou pran *statement* avek en konplen an e osi lofis pou *station commander*.

I fer osi provizyon pou *open plan space* pou *CID* ek zot *interview room* pou adilt e osi en *child friendly interview room*. I pou osi annan fasilité pou servis syantifik ki pou osi asiste La Digue. Pou osi annan fasilité kaso separe *Juvenile* ek adilt ki osi separ zonm e fanm. Nou pou osi met en *ring force fencing* pou permet bann ki lo rimann zot drwa pou ganny akse ek fasilité deor pou egzerse e osi landrwa kot zot kapab zwenn zot avoka.

Bann fasilité ki otour sa magazén, ki pe ganny servi

aktyelman avek par bann zofisyen SFA pou ganny transformen pou vin bann *barrack* pou nou bann zofisyen lapolis. Sa landrwa in osi ed nou idantifye facilite pou nou *store* nou bann egzibit fizik e biologik.

Mr Speaker, nou pou osi fer renovasyon mazer lo sa kord gard egzistan e met bann facilite administrativ e osi gard li koman en par nou listwar. Par deryer kord gard nou pou fer renovasyon lo sa pti lakaz an ros e fer li vin en facilite akomodasyon pou nou polisye.

Inisyalman nou ti pou depans 26milyon pou sa nouveau kord gard e la nou depans an itilizan sa magazen i pou kout nou environ 12milyon ki reprezent en *savings* 14 milyon, ki nou pou servi pou realiz lezot proze osi enportan pou amelyor lanvironnman travay nou bann zofisyen lapolis.

Sa *building* aktyel, savedir sa magazen i pou permet nou pou komans sa travay sa lannen e si tou i al dapre plan, nou pou kapab komans nou loperasyon sanmenm sa lannen. Mersi Mr Speaker.

MR SPEAKER

Mersi, siplemanter Onorab Gill wi.

HON CHURCHILL GILL

Mersi Mr Speaker. Mersi pou ou leksplikasyon. Kwa ki pou annan dan sa facilite ki ou dir pe al fer renovasyon, ki dan sa facilite nef ki ti pou fer ki pa dan sa enn ki ou pe al fer renovasyon, si i annan lekel?

Dezyenm ou dir si tou keksoz i mars byen sa pou komans sa lannen e konbyen letan ki zot in donn zot lekor pou kapab konplet sa travay?

E mon dernyen kestyon pou bann facilite mon krwar sa ou bezwen e pou sa *savings* ki ou'n dir 14 milyon eski pou met facilite dan sa *building* ler in fini larzan pou ganny servi ladan pou kapab met tou e nouveau lekipman pou kapab fer son loperasyon fonksyonnell? Mersi.

MR SPEAKER

Mersi Mr Speaker, mon a kouver enn de pti pwen apre mon pa konnen nou a kapab re donn detay. Me selman an tou leka, ler nou pe koz lo facilite ki nou ti pou annan si pou annan mwens; - *in fact* pou annan plis facilite la, e sa ki bon nou pe *deal* ek *Juvenile* nou pe koz ek *remand* ki pa ti ganny planifie avek.

Nou pe koz *accommodation*, so vreman en lavantaz enorm e sa i vreman en *godsent* pou nou. Akoz son

renovasyon pou nou komans servi li i pa vreman bokou, i pa vreman bokou. So mon kapab panse ki definitivman sa lannen me menm avan, avan *December* nou'n fini kapab antre.

Selman pou enstan mon pa le komet mon lekor koz i kot SIA *right now*, so petet dan 2 semenn, 3 semenn nou a kapab komet nou lekor egzakteman. E i pa pou bezwen sa *saving*, sa *saving* pou ganny servi *elsewhere* dan lezot bezwen lapolis ki nou pe planifye. Mersi Mr Speaker. Mon pa konnen si i annan okenn lezot facilite ou anvi koz lo la. Mersi Mr Speaker.

MR SPEAKER

Mersi Minis. Bon ou annan klarifikasyon? Wi?

HON CHURCHILL GILL

Mon ti'n demande akoz ler ou'n fini fer renovasyon sa kord gard ki ozordi Baie Ste Anne i napa facilite pou kapab met dan sa ki ou pe fer renovasyon, se pou sa rezon ki mon'n demande si dan sa 14 milyon pou osi servi pou akoz ou pou bezwen met lekipman facilite. So, ki bor pou sorti sa larzan vi ki sa Bidze in deza la? Mersi.

MR SPEAKER

Mersi. facilite ki bor pou sorti? Minis ou le zis klarifye?

MINISTER ERROL FONSEKA

Wi, Mr Speaker i pou ganny kouver dan sa 12milyon li, i pou ganny kouver dan sa 12milyon. Mersi Mr Speaker.

MR SPEAKER

Mersi avek la nou'n arriv a lafen sesyon kestyon. Mon remersye Minis e son delegasyon bann zofisyen lapolis ki'n pran zot letan pou vin avek nou isi e mon swet zot bonn kontinyasyon. Nou ava pran poz pou dezennen la e nou a repran travay 2er apre midi.

Mon krwar mon pa konnen si in vin a latansyon bann Manm ki apre midi nou pe komans avek Mosyon, e sa se akoz rezon laranzman ki Madanm Clerk in nobou fer pou delegasyon pou *Bills* demen. So, nou pou pran mosyon apre midi, nou pou al lo *Bills* demen. Onorab Hoareau i oule klarifye sa?

HON JOHN HOAREAU

Mr Speaker nou kapab fer li atraver en Mosyon ki mon ava anmennen taler.

MR SPEAKER

Wi, byensir si i an relasyon avek soz wi, taler. Mersi, nou a pran poz nou a rezwenn 2er.

(BREAK)

(Mr Deputy Speaker in the Chair)

MR DEPUTY SPEAKER

Bonn apre midi tou Manm Lasanble bann Manm *staff* e piblik ki pe swiv nou travay pou sa Mardi 30 Me. Mon ava dir zot *welcome* pou nou sesyon apre midi.

Nou kontinyen avek nou *Order Paper*. Me parey Speaker ti'n endike avan *break* nou pou fer en sanzman avek nou plan travay pou ozordi, donk nou pou bezwen pran en Mosyon pou nou fer sa. Onorab Hoareau.

HON JOHN HOAREAU

Mersi Mr Speaker. Mr Speaker anba *Order 36(c)* mon pe demann ou pou nou sanz *l'ordre du jour* pou nou suspend *Order 25* pou nou sanz *l'ordre du jour* ki nou ava pran *Bills* demen bomaten e nou a pran sa premye Mosyon par Onorab Kelly Samynadin apre midi.

Rezon pou sa i se ki nou fek zwenn avek *sponsors of the Bill*, nou ti pe fer prosedir pou zwenn zot semenn pase me nou pa'n zwenn zot akoz *PS* pa ti

dan pei. Me in vini ozordi in asiste nou avek *Bill* e pou donn letan *SLO* pou li fer rapor avek bann lezot travay Sekretarya ki ganny neseser, alor mon pe demann ou pou ou sanz *l'ordre du jour*. Mersi.

MR DEPUTY SPEAKER

Mersi Onorab Hoareau. Selman mon krwar ou *order is not in order*.

HON JOHN HOAREAU

Ok. Order 97 pou nou *suspend Order 25*.

MR DEPUTY SPEAKER

Ok. Order 97 suspension of Standing Orders. Ok very good. Mon panse krwar nou bezwen en vot, savedir nou bezwen en *secondment on the motion*. Onorab Naidu.

HON SATHYA NAIDU

Mosyon i ganny segonde.

MR DEPUTY SPEAKER

Mersi. E tou Manm ki an faver mon demann zot pou endike silvouple. *Hold on*, avan nou pran vot, Onorab Aglae ou annan en *point*?

HON EGBERT AGLAE

Mr Speaker mon anvi en *point of clarification*.

MR DEPUTY SPEAKER

Ok, proceed.

HON EGBERT AGLAE

An vi ki ABC ki *deal* avek *laws* biznes Lasanble *ok*, mon ti a swete ki lavenir si Gouvernman pa ankor pare, ouswa *Bills Committee* pa ankor zwenn, *please convey the message* ki nou osi nou konnen pou met-akoz nou Manm in prepare pou sa *Bill* la apre midi ou konpran? Prezan nou pe fer evalyasyon *l'ordre du jour*. Mon napa problem - *Standing Orders* i permet pou fer sa arive.

Me selman annou fer keksoz annakor sirtou komunikasyon ki bezwen vini pou nou osi kapab enform nou *Caucus* ase boner, si pou annan sa bann sanzman. Si Gouvernman pa ankor pare nou, nou napa problem, be selman komunikasyon i enportan. Mersi.

MR DEPUTY SPEAKER

Mersi. *Point noted.* E mon repete mon pa ti la, me mon'n antann Speaker lo radyo ti'n anons avek Lasanble ki *this would be the case e then zot ti annan osi loportinite pou lev sa pwen*, me selman ou pwen i note e i rikorde. Onorab *Leader Lopozisyon*.

HON SEBASTIEN PILLAY

Mersi Mr Speaker. Bonn apre midi tou koleg Onorab. Bonn apre mdi tou dimoun ki a lekout.

Mr Speaker mon ti a kontan ki ou met lo rikord nou protestasyon an relasyon avek sanzman kontinyel ki arive an relasyon avek *either Bill* pe vin *Second Reading or* pou nou pran en *Bill* a letan ki Lasanble in agree pou pran li.

Onorab Aglae in koz lo lenformasyon ki nou bezwen gannyen, akoz Manm in fini prepare. E mwan mon koz lo etik e travay Lasanble akoz nou'n fini komunik avek piblik ki vwala lord travay ki nou fer.

Malgre ki nou annan drwa pou varye nou lo lord travay, nou bezwen osi konsidere ki nou, nou bezwen fer sir ki nou gard nou *timetable* baze lo sa ki nou gannyen.

E mon dezyenm pwen Mr Speaker, mon ti a kontan osi ki Gouvernman e la i pa lafot bann Manm Lasanble, me i Gouvernman, i pran li o serye ki i bezwen annan en dimoun ki *available* ki *sponsor* son *Bill* ler son *Bill* pe vin dan Lasanble pe ganny pran for *Second Reading*.

E si- akoz i ganny enformen atraver ou *Order Paper* ki son *Bill* pe vini. E si kelkonk zofisyen ki sipoze la -

mon pa pe blanm sa zofisyé ki pa'n la akoz i ti'n *plan* son programm travay byensir. Me si sa zofisyé ki sipoze la i sipoze la, *then* i bezwen la akoz *Bills Committee* i bezwen e tou *Bills* i bezwen pas atraver *Bills Committee* avan ki nou fer en deba lo la.

So mon ti a kontan ki sa i ganny rezourd o pli vot posib atraver kote Gouvernman e mon ti a demann mon koleg *Leader Zafer Gouvernman*, pou ed mwan dan sa prosesis. Mersi Mr Speaker.

MR DEPUTY SPEAKER

Mersi Onorab. Ou pwen nou'n note. Me mon repete ki avan Lasanble ti *rise taler* pou al *lunch break*, Speaker in komunik sa e in mansyonnen poudir *Clerk osi* ti komunik avek *sponsors of the Bill*.

E par lefe ki Lopozisyon i annan bann Manm dan *Bills Committee* zot ti okouran poudir *the meeting was this afternoon* e Speaker in eksplike.

So si ti annan rezervasyon, *then* i ti merit ganny leve. Me solman mon krwar poudir i donn ankor plis letan pou bann Manm fer en bon prezantasyon lo sa *Bill* demen bomaten, nou annan en Mosyon ki'n ganny segonde la aprezan nou bezwen en vot.

Mon a demann tou bann Manm ki an faver pou endike silvouple? Mersi. Okenn Manm ki kont? Mersi. Donk rezulta lo Mosyon pou *change Order of Business as per Order 97 to suspend the Standing Orders*;

I annan 19 Manm ki'n vot an faver, okenn Manm pa'n vot kont e i annan 10 Manm k ki'n *abstain*. Donk sa vot in pase. Mersi.

Donk savedir nou prosen *item se Mosyon e sa i Mosyon ki dan non Manm Elekte pou distrik Au Cap Onorab Kelly Samynadin*. Mon ava envit ou pou prezant ou Mosyon, i a ganny segonde avan ki nou retourn lo ou prezantasyon. Mersi.

HON KELLY SAMYNADIN

Mersi Mr Speaker. Bonn apre midi tou dimoun a lekout. Mosyon i lir *comme swivan*;

Sa Lasanble pe lans en lapel avek tou paran pou angaz seryezman dan konversasyon avek zot zanfan, konsernan zot konportman avek bi pou amelyor e anrisir konteks lansennyman ek laprantisaz dan bann lenstitisyon skoler e pou asire ki zot zanfan i benefisyé o maksimonm pandan zot letan kot lekol. Mersi Mr Speaker.

MR DEPUTY SPEAKER

Mersi Onorab. E lekel ki segonn Mosyon? Onorab Hoareau.

HON JOHN HOAREAU

Mersi Mr Speaker. Mon oule segonn sa Mosyon. Mersi.

MR DEPUTY SPEAKER

Mersi Onorab Hoareau. E aprezan mon ava envit loter Mosyon pou fer son lentrodiksyon. Mersi.

HON KELLY SAMYNADIN

Mersi Mr Speaker. Mr Speaker, mon pou konmans mon lenthervansyon lo sa Mosyon an sitan parol manifesto *LDS* pou eleksyon zeneral an 2020.

“Tou nou bann zefor Nasional i depaan lo lakonplisman en o standar dan ledikasyon, ki pou fer nou bann zenn vin bann partisipan konpetan dan en sistem ekonomik modern e bann sitwayen responsab”. Fen sitasyon.

En pep ki edike i kre louvertir pour plis loportinite lanplwa, sekiriz en reveni adekwa, permet en sitwayen pou kapab fer bann desizyon endepandan, amelyor performans lekonomi, provizyon en lavi ki ere e prospere.

I osi ed en sitwayen pou ed sa kominate dan ki in grandi e benefisy, ede dan transformasyon en sisyete pli modern, sirmont bann defi lemonn nimerik, kreasyon bann loportinite egal e osi ed sitwayen pou travay an ekip e an retour annan en lafors travayer ki pli abil e konpetan.

Dapre Konstitusyon nou pei, pli spesifikman Lartik 33 e mon site: -

“Leta i rekonnet drwa sak sitwayen a ledikasyon e avek bi pou asir realizasyon efektiv sa drwa, antreprann premyerman;- provizyonnman ledikasyon obligatwar ki ava pou nanryen dan bann Lekol Leta pou en peryod minim, ki pa ava mwens ki 10an parey i kapab ganny preskri anba Lalwa.

Pou asire ki bann programm edikasyonnel dan tou lekol i ganny vize ver devlopman konplet sa dimoun.

Pou permet sak sitwayen, lo baz kapabilite entelektyel pou annan akse egal lo bann loportinite edikasyonnel ek fasilitate o dela bann peryod ledikasyon obligatwar.

E finalman pou respe drwa bann paran pou swazir si zot pour anvoy zot zanfan dan en Lekol Leta oubyen prive.

Konvansyon pou drwa bann zanfan i afirmen ki sak zanfan i annan drwa a ledikasyon, kot en zanfan i ganny permet pou develop dan tou son potansyel e pou aprann respe pou drwa imen ensi ki bann laliberte fondamantal.

Mr Speaker, konman reprezantan pou distrik Au Cap, konman en Lezislater, konman en ansyen edikater e pli spesifikman konman en paran, mon'n santi li neseser pour anmenn en tel Mosyon. Prenon kont bann diferan sityasyon kot konportman en etidyan i ganny met an kestyon akoz in azir kont regilasyon lekol.

Lafanmir i pilye lasosyete e lo en baz kotidyen, mon war mwan pe edik mon zanfan lo ki mannyer i devret konport li, ki swa kot lekol, dan semen ou nenport ou. Sa i mon rol, i mon responsabilite e mon pran li tre serye. I annan en dikton ki dir “elve ou zanfan pou lasosyete, me non pa zis pou ou”.

Sa i vre Mr Speaker, e mon personnelman esey mon mye pou mwan enkilke sa dan mon zanfan. Akoz konman en adolesan, i pa parfe, tanzantan i deroute e mon vwar mwan pe asiz avek li avek bi pou redres li lo bon semen.

Si fodre, mon lev en kou lavwa, aplik pinisyon, pou li konpran ki sak aksyon negativ i annan en konsekans ki vin avek e ki i enportan pou sanz fason fer.

Mr Speaker, parey mon'n mansyonnen pli boner, pou en lenstitisyon skoler kapab fonksyonnen, ki swa prive ou piblik, i neseser ki i annan bann norm ek regilasyon ki an plas pour bann zanfan swiv pour mentenir lord ek stabilite.

Sa i osi aplik pou kot lakour, kot en zanfan i bezwen obeir lo bann lareg ki son paran i met devan li pou ki i osi annan lord dan sa lakour. Rezon pou sa Mr Speaker, se pa pour abriti zanfan, me plito pou ed li pou vin en bon sitwayen onnet e respektab.

Granmoun i dir ki laprantisaz i konmans dan lakour e se sa paran ki merit pe enkilke sa dan son zanfan. Disiplin, lansennyman lo moralite ek bann valer osi i sipoze konmans dan lakour e pli tar i kontinyen dan son parkour skoler e anfen dan son parkour profesyonnel.

Pandan ki mon ti pe travay lo sa Mosyon, mon'n konvok plizyer mon bann ansyen koleg ansennyan e zot in dir mwan ki wi, langazman paran dan ledikasyon zanfan i

enn ki primordyal me i reste
enn bann pli gran defi ki nou
bann lenstitisyon skoler i
bezwen fer fas avek ozordi.

Byen evidaman, paran se
pli gran partner lekol, anvi ki se
zot zanfan ki kliyan prensipal
dan sa prosedir lansennyman
laprantisaz. San zot lekol pou
perdi son fonksyon.

En mis ti dir mwan e mon
sit li, "bann zanfan avek ki nou
pe rankontre bann problemm
disiplin mazer kot lekol, se
bann ki zot paran i plizoumwen
pa enterese oubyen absan
anver zot letid, e se zot menm ki
performans pa bon ditou".

En lot ansennyan ti dir
mwan, ki persepsyon ki zot pe
gannyen se ki serten paran i
pran lekol konman en
Childminding Scheme.

I menm annan ki'n sizere
ki Minister Ledikasyon i revwar
pass mark legzanmen IGCSE ki
ozordi i 40poursan pou nivo
Core, 70poursan pou nivo
Extended e DELF ki 50 poursan.

Rezon pou sa se ki bokou
etidyan i tant pou *slack* e zot pa
vremen vwar nesesite pou
etidye, oubyen konsider
lenportans sa bann legzanmen.
Vi ki *pass mark* i
konsiderableman ba,
motivasyon e lentere pou etidye
pour sorti avek en bon grad, i
pratikman inevidan.

Mr Speaker, an retournan
ver manifesto, enn bann pwen
kle ki'n ganny sertifye klerman,
se realizasyon bann meyer
kondisyon laprantisaz dan
laklas.

Nou bann lotorite
edikasyonnel i bezwen angaz
avek ladministrasyon lekol,
ansennyan ek paran pou
renouvle nesesite pour
konportman pli apropriye ek
disiplin parmi bann etidyan.

I neseser ki sak partner
ledikasyon i re afirm zot
langazman, anvi ki sityasyon
disiplin dan nou bann
lenstitisyon skoler i enn ki tre
alarman e paran ki la baz pou
ki bann etidyan i vin lekol, i
bezwen primordyalman enkilke
dan zot zanfan *raison d'être* pou
ki son zanfan i al lekol.

Me kwa ki vremen rol e
responsabilite en paran vizavi
ledikasyon son zanfan Mr
Speaker?

I annan plizyer
karakteristik ki nou kapab
asosye avek rol en paran, me
mon pou liste serten ki mon
santi i endispansab, ki kapab
en model pou zanfan swiv letan
ki zot kit lakour pou al dan
lekol.

Premyerman, en paran i
devret kapab provizyonn sipor
pour son zanfan dan son bann
aktivite skoler, par asiste bann

levennman ki lekol i demande, ed zot avek zot *homework* e etidye pour bann evalyasyon ou legzanmen.

Dezyenmman, paran i devret etablir bann lenstriksyon e lareg ki anliny avek zot bann valer e *raison d'être* pou kapab *deal* avek bann *issues* disipliner ki zot rankontre avek zot zanfan.

Trwazyenmman, en paran ki konsistan dan son bann aksyon, i montre sa zanfan ki mannyer pou viv dan bann kondisyon stab e i osi promouwar son devlopman sen e pozitiv.

Mr Speaker, en bon paran i merit toultan reste angaze dan lavi son zanfan. Tou paran i devret pe fer letan pou aktivman partisip dan letid zot zanfan, afen ki i pa ava perdi perspektiv pou kwa i bezwen al lekol.

Paran i bezwen fer sir ki i toultan pe gid son zanfan lo bon semen lavi pou ki i arive kapab konn sikse dan son lavi e obzerv bon rezulta dan son performans skoler.

Dan sak letap son lavi, en zanfan i merit pe toultan ganny byen enformen lo son bann responsabilite. Mazin byen ki i enportan ki letan nou pe edik zanfan lo zot bann drwa, zot bann diferan drwa. I egalman

enportan ki zot osi zot ganny montre ki mannyer pou egzers zot responsabilite a sak fwa ki zot al kont sak zot bann drwa.

Finalman, Mr Speaker, paran i bezwen pe toultan donn zot zanfan lanmour. En lakour ki napa lanmour, i pa en lakour an realite.

Ki fer mwan mazin refren en sanson "annou senm lanmour, partou dan nou zalantour, i konmans kot nou lakour, dan nou leker toulezour."

An dot mo, Mr Speaker, sa ki nou donn nou zanfan, se sanmenm ki i asimile. Tou sa ki nou donn li dan lakour, se sanmenm ki i pou anmenn kot lekol e partou kot i ale akoz pou li, se sa ki akseptab.

Mr Speaker, pou ki en letablisman skoler i kapab fonksyonn dan stabilite e lord, i neseser ki i annan en regroupman lord ek prensip par ki i opere. O konmansman zot letid, bann etidyan ansanm avek zot paran, zot ganny sans pou familyariz zot avek sa ki nou apel '*code of conduct*'.

Dan *Educations Act*, sapit 43 i sertifye ki "sak zanfan ki'n anrezistre dan en Lekol Leta ou lenstitisyon skoler i devret:-

(A) obzerv *code of conduct* e lezot lareg Minister ek sa lekol.

(B) asiste laklas regilyerman e ponktyelman.

(C) partisip avek dilizans dan programm edikasyonnel anba ki in anrezistre.

Sapit 47 (3) i dir e mon site:- “sak paran i devret sinyen e asir konformite avek *code of conduct* pou bann etidyan ki'n ganny pibliye par Minister ensi ki bann lareg ki'n ganny enplimante par sa lekol ou lenstitisyon skoler”.

Mr Speaker, vi ki mon ti en ansennyan nivo segonder, mon ti fer li mon devwar pou mwan reste azour avek *code of conduct* pour bann lekol segonder, pou mwan konnen kwa ki akseptab e osi kwa pa akseptab pou en etidyan pandan ki i dan laklas oubyen dan lakour lekol.

Lo premye paz sa *booklet*, i annan en mesaz sorti kot Minis pou Ledikasyon ki dan premye paragraph i dir “*You can achieve good results in your studies. You can be a well-behaved and responsible young person. This will depend on your own efforts and the guidance of your parents, your teachers, and the community*”.

Dan mon persepsyon Mr Speaker, mon santi ki si sak zanfan, sak paran e si sak ansennyan ti metriz sa premye paragraf e met li an pratik, bann lekol pa ti pou pe

rankontre otan problem disipliner ki zot pe rikorde ozordi. Zefor i sa mo kle ki devret pe toulstan ganny ranforsi.

Dapre *code of conduct*, i annan en lalis lofans ki pa devret ganny aksepte dan bann lekol e parmi i enkli, sov lekol, sov laklas, non-konformite avek model labiyman, lakoup seve e fason pennyen bann etidyan ki inakseptab.

Demonstrasyon lafeksyon an piblik ki inappropriye, langaz inappropriye, litilizasyon telefonn portab, lager, entimidasyon ki mye koni konman *bullying*, arselman, zwe larzan, vandalism, litilizasyon e posesyon lalkol, sigaret ek drog ilegal, bann materyo pornografik, bann akt seksyel, posesyon zarm ou eksplozif, e move kondwit dan bis.

Tou sa bann lofans ki mon'n mansyonnen Mr Speaker, i ganny rikorde dan mazorite lekol atraver pei lo en baz kotidyen.

Bann pinisyon ki kapab ganny enplimante byensir dapre *code of conduct* i tou depandan lo gravite sa lofans ou lakantite fwa ki in ganny komet. Ki kapab enkli, en *note* pou paran ki konpri en *student event sheet*, konferans paran,

en *time-out*, sispansyon, ekspilsyon ou menm ganny refer avek lapolis.

Minister Ledikasyon e lekol i ensiste ki korperasyon ant paran e lekol i esansyel pou kapab garanti sikse sak etidyan. Pou kapab akonplir en partenarya avek sikse, i annan en lalis lekspektasyon pou bann paran ki konpri;

Demonstrasyon en latitud favorab anver zot zanfan, son lekol e son ledikasyon.

Promouwvar bann bon relasyon avek bann *staff* lekol.

Montre korperasyon anver lekol pou kapab rezourd okenn problem.

Fer letan pou ekout, konpran e konsilte zot zanfan.

Reste azour avek progre zot zanfan an gardan kontak avek son bann ansennyan.

Fer provizyon en lanvironnman ki propis ensi ki bann materyo neseser pour zot zanfan etidye e fer *homework*.

Asiste bann *meetings* ek konferans letan zot ganny demande.

Asire ki zot zanfan i vin lekol prop e annord, anliny avek bann rekomandasyon ki'n ganny etablir dan *code of conduct*.

E finalman enkilke bann bon sawwar viv dan zot bann zanfan

Mr Speaker, mon konnen ki i annan dimoun pou dir ki sa i en kantite lobligasyon lo paran, me nou bezwen realize ki pou elve en zanfan i en lobligasyon pou lavi diran. Menm si demen i vin en adilt, konman son paran i reste ou responsabilite pou ou dir li ki i mal ouswa i byen.

Pandan mon enteraksyon avek serten ansennyan lo reaksyon paran letan ki zot ganny enterpele pou rapport kot lekol konsernan konportman zot zanfan, zot ti fer resorti ki sa i lo en baz melanze.

I annan ki pare pou vin devan e ed lekol akoz zot rekonnet ki zot zanfan i annan en problem e ki zot bezwen sipor adisyonnel. I annan ki dir zot fatige vin kot lekol, ki zot nepli konnen ki pou fer avek sa zanfan, oubyen zot trouve ki ansennyan pe target ou annan problem avek zot zanfan.

I annan paran ki si zot zanfan in ganny sispann, i demann avek lekol kote ki i pou met sa zanfan, akoz li i bezwen travay?

Petet ti ava byen pou Minister Ledikasyon revwar plas ou relevans ki programm sispansyon i annan dan nou konteks aktyel. E petet en lot mezir lankadreman i merit ganny konsidere avek bi pou

garanti en meyer form reabilitasyon pou bann etidyan ki annan bann problem konportman.

Vwala Mr Speaker, kwa ki nou bann ansennyan, bann *heads of years and departments*, Depite *Headteacher* pou swen pastoral ensi ki zesyon lekol i fer fas avek lo en baz kotidyen.

Zis sa de premye zour ki lekol in repran apre 3 semenn vakans, in annan en leokri par bann paran lo medya sosyal e lapres ekri konsernan en group etidyan ki'n ganny kit deor kot 2 diferan lekol respektif akoz zot pa ti an konformite avek kod kondwit lekol. Ansennyan konman Minister Ledikasyon in ganny sa ki pou li. Ki fer mwan asize e demann mon lekor en kestyon,

Akoz ki serten nou bann paran nou kapab respekte regilasyon ki'n ganny enplimante dan nou landrwa travay, me selman nou pa kapab montre nou zanfan ki li osi i bezwen fer parey kot lekol?

Mazinen ki sa zanfan demen i pou vin en adilt e i pou fer sa menm traze ki nou bann paran, nou pe fer e i enportan ki nou konman bann paran nou donn lekol otan sipor ki nou kapab. Zanfan i pas plis son letan dan lakour lekol ki dan

lakour e bann ansennyan i sa dezyenm paran pou zot.

En ansennyan i trouv li, li tousel laplipar letan avek en popilasyon ant 20 a 35 zelev dan en laklas e souvandfwa lansennyman e laprantisaz i ganny enteronpe avek bann problem disiplin ki ansennyan i bezwen zere.

Mazoriterman, i zis en minorite etidyan dan sa laklas ki annan sa bann problem, me zis enn oubyen en pti group i ase pou enteronp lesson pour en serten period letan.

Alors, parey Mosyon i dir, mon pe ensiste ki tou paran, ki enkli mwan osi, nou re afirm nou langazman vizavi nou rol anver ledikasyon nou zanfan.

Statistik in montre ki performans bann etidyan in desann konsiderableman pandan sa 2 dernyen lannen, pour legzanmen *IGCSE*, *DELF* ek Legzanmen Nasional. An 2021, poursantaz *overall pass* ti 57poursan, tandis ki an 2022 ti 44poursan.

Dan 337 etidyan ki ti anrezistre pour *IGCSE*, 194 ti anrezistre pou zis 1 legzanmen, 142 ti *pass* pour 6 size e zis 1 ki ti asiz pou zis 1 legzanmen- pou zis 8 legzanmen pardon.

Kot *DELF* i konsernen, rezulta i reste ase satisfezan kot dan 864 etidyan, zis 16 ki pa'n

pass zot legzanmen e sa i pou legzanmen B2, B1, A2 e A1. A1 e A2 i reste lo 100poursan pasasyon.

Me par kont pasasyon pour legzanmen *B1* in desann lezerman, sorti 100poursan pour arriv 99poursan. Kant a *B2*, Minister Ledikasyon in not en diminisyon dan lakantite etidyan ki anrezistre pou sa legzanmen, malgre ki in annan en amelyorasyon dan pasasyon sa legzanmen.

Lo nivo primer, in annan amelyorasyon konsiderab dan angle, matematik ek letid sosyal an konparezon avek lannen 2021. Me malgre sa, performans i touzour par anba target Minister Ledikasyon ki 50poursan dan bann grad *A star* ziska *C*. Etidyan pa'n perform osi byen dan Franse, Lasyans ek Kreol.

Mr Speaker, mon santi ki wi, i merit annan resers neseser ki ganny fer dan domenn ledikasyon e sosyal, pou analize akoz ki rezulta i kontinyen desann. Me par kont, mon reste touzour konvenki ki paran i lakle pour nou kapab obzerv sanzman e pozitivite dan fason fer bann etidyan.

Tou resaman pandan louvertir novo lekol Belonie, Prezidan Wavel Ramkalawan ti fer en demann anver bann

paran pour pran plis lentere dan ledikasyon zot zanfan, avek bi pou sekiriz en meyer lavenir pour zot.

I ti osi enplor avek zot pou fer sir ki zot konplet zot bann devwar lekol, asire ki zot zanfan i annan bann bon konportman e ki zot pa pe aprann bann move keksoz ki pou an retour afekte latmosfer ledikasyon dan lekol.

I ti osi demann avek bann etidyan pou konpran e aksepte bann defi ki zot bann ansennyan i met devan zot. Pou *challenge* zot lekor e develop zot bann konpetans ki pou rann zot pli abil pour akey lavenir.

Mon rapel letan mwan mon ti lekol, mon ti fer sir ki mon obeir Lalwa Lekol, annan respe pou mon bann kanmarad ek ansennyan par lafreyer pou mon paran.

Mon ti konsyan son bann lekspektasyon de mwan e mon pa ti anvi trouv mwan pe ganny problemm avek li akoz mon konportman. Ni menm dan semen mon pa ti oze mal konport mwan, akoz konsekans ti pou grav. Mon paran ti vin kot lekol zis pou *Open Day*, se tou.

Mr Speaker, avan mon terminen, mon anvi lans en lapel avek tou paran. Sirtou bann ki santi ki zot kwense, zot pa konnen kote zot pou ale

konsernan serten difikilte ki zot pe rankontre avek zot zanfan.

Pa pran lekol oubyen bann ansennyan konman zot lennmi me plito konman en zanmi, en partner kle ki pe ed zot zanfan anver son lepanouisman e son sikse. Donn nou bann ansennyan sa sipor ek soutyen ki zot merite, akoz se anba zot supervizyon ki nou zanfan i ete dan nou labsans.

Se zot ki obzerv en pti diferans dan konportman nou bann zanfan e menm kapab idantifye kwa ki pe koz zot pou reazir dan en tel fason. Par ler san nou konnen, zot kapab trouv solisyon ki nou menm nou pa ti pou zanmen mazinen pour trouve.

Mon osi oule profite pou felisit sak paran ki pran zot responsabilite dan tou son totalite. Ki pran son letan pou edik son zanfan lo bann etik lavi, lo lenportans etidye, lo lenportans bann valer moral e spirityel e lo lenportans zot drwa etrwatman avek zot responsabilite.

Proverb 22 verse 6 i dir “*train up a child in the way he should go, and when he is old, he will not depart from it*”.

Linyon i fer lafors. Annou travay ansanm. Sakenn fer son par pou ed nou zanfan anver

sikse e anver son lepanouisman personnel. Nou lazenes se fitir nou Nasyon e sa pei i bezwen zot. En Nasyon ki edike i en Nasyon lespwar.

Avek sa Mr Speaker, mon pe demann mon bann koleg Onorab pou siport sa Mosyon e mon swet tou bann ki pou entervenir, e bon deliberasyon. Mersi Mr Speaker.

MR DEPUTY SPEAKER

Mersi Onorab Samynadin. Onorab Hoareau ou ki ti segonde ou'n montre ou lentansyon pou koze. Mon pa pou tronpe letan mon pou dir ki sa Mosyon par lefe ki i koz lo zanfan, i koz lo paran, i koz lo lekol mazorite bann Manm ki la anndan in ganny elekte dan en distrik i annan en lekol e probableman zot pou anvi koze.

Donk, mon pe servi *Standing Orders 57(11)* pou kapab *set time limit* pou nou *dispose of this motion today*. So mon anvi bann Manm ki oule entervenir lo sa Mosyon, i endike koumsa mon a konnen konbyen, mon a balans letan.

So antretan Onorab Hoareau *proceed* mon ava pran bann non, e apre letan ou fini koze mon poudir konbyen Manm i annan e konbyen letan mon pe donne. Mersi. *Proceed* Onorab Hoareau.

HON JOHN HOAREAU

Mersi Mr Speaker. Mr Speaker mon oule profit sa loportinite pou pas en mesaz avek bann *teachers* ozordi dan nou bann lenstitisyon skoler atraver pei.

Mon oule dir zot ki pe fer en bon travay, pou edik nou bann zanfan bon kouraz e kontinyen sa bon travay e ki isi dan nou Lasanble nou valoriz e siport zot travay. Akoz i enn ki *noble* e i enportan. Ler ou konpare pou kapab dir ki i annan menm lenportans menm ki avek louvraz Prezidan akoz i en group dimoun ki pe *shape* lavenir nou bann zanfan.

Mr Speaker mon pou komanse par dir ki ledikasyon i lakle lavenir, ledikasyon i sa *passport* ki permet en sitwayen fonksyonn dan en sosoete e dan sa lemonn modern ki nou pe viv ladan. Si sa ki mon pe dir i filozofikman korek, alor nou bezwen demann nou lekor en kestyon; ki kalite bagaz e sistenm ledikasyon ki nou pe fer pou permet nou zanfan fonksyonn dan en sosoete modern?

Bokou edikasyonist i dir ki *savoir faire, savoir vivre, et savoir être* i anglobaliz sa bagaz edikasyonnel ki nou bezwen. E kalite ledikasyon fondamantalman e sa kalite

ledikasyon fondamantalman i komans dan lakour pa lot landrwa.

I komans ler nou paran i montre nou dir bonzour, dir mersi, montre nou bann etiket ler nou pe manze atab, i montre nou respe pou nou paran e sa ki pli gran ki nou e osi respe pour lotorite. Respe pour nou bann zanmi ler nou pe zwe e pli enportan respe pou nou bann Lalwa dan zwe.

I fer mwan mazin mon parkour dan ledikasyon, kot mon'n aprann la fason bann let teori ledikasyon *conformist theory* dan ledikasyon, kot i dir ou poudir lafason oubyen bann sityasyon kot zanfan i zwe e i respekte Lalwa dan zwe i ed zot demen pou respekte Lalwa dan laklas e respekte Lalwa dan sosoete an deor.

I komans ler nou paran parey mon'n dir i montre nou dir bonzour, e sa i en keksoz byen enportan. Mr Speaker a mon avi se sa ledikasyon fondamantal ki komans dan lakour ki en nou zanfan i reste zanfan i ed zot pou viv komans en zanfan e grandi an respektan bann norm ki ozordi mon krwar i kase dan nou lafanmir Seselwa.

E ler nou analiz pli o profon nou kapab vwar akoz sa dekadans in arive dan nou

sosyete sirtou pandan sa dernyen 10 a 15an ler nou retras en pe nou listwar.

An dizan sa mon pa oule dir ki nou devret reste lo lepase me nou devret servi lepase pou nou tir lesion pou lavenir. Nou vwar ki premyerman sentir lafanmir ki labaz en fabrik en sosyete in kase, lapovrete par rapor avek nou lekonomi ki vilnerab a en serten tan ti osi parsyelman responsab.

Ler nou get bann sok enternasyonal osi ki'n arive - par egzanp ler nou pe get bann keksoz ki'n arive o nivo mondyal parey lager Golf an 2003, Linyon Eropeen, ler ti fait 2009 ler zot ti pe abzorb bann det sa pei ki apel Lagres i ti'n arriv 113poursan son *GDP*, *COVID* pandemik 19 e lager *Ukraine* tou resaman.

Tousala in ede pou annan lenpak lo lafanmir Seselwa menm si arriv an deor nou pei. Nou difikilte in osi agrave avek move zerans koripsyon dan lepase ki nou pe- in fer nou vin pli mizer. E ler nou'n vin en pe pli mizer sa lenpak lo travay lo depans pei lo nivo lavi an zeneral, in osi ganny resanti.

Demann pou plis lakaz, lasistans sosyal in ogmante sirtou pou bann ki pli vilnerab pou bann fanmir ki pli vilnerab. Nou'n bezwen war plis sipor

viziter pou lafanmir. Bann manman in bezwen fer plis ki en dyob.

Alor labsans kot lakour i fer ki souvandfwa se napa gidans pou bann zanfan ki pli pti. Dan lakour se gran ser ki pe vey pti ser e napa bon gidans ki pe donneン dan sa bann ka.

Kot i annan lakour kot i annan *single parents* sityasyon alor i vin pli pir. La zanfan i souvandfwa pa fer *homework*, marse vagabonde annandler dan distrik e annan de fwa tonm dan move lenfliyans. Se sa larealite ki nou pe viv ladan ozordi.

Mr Speaker dezyenm pli gro problem ki nou pei pe fer fas avek pandan sa dernyen 10 a 15an se problem drog ek lalkol ki pe ronz nou pep. Sa sityasyon drog dan nou pei pe fer ki Sesel in ganny en repitasyon koman pei ki ganny rekonnet pou litilizasyon plis drog par tet abitan.

Malerezman lalit kont drog pa ti serye avek Gouvernman presedan. Nou tou nou konnen ki bann zanfan ki'n ne avek paran ki'n servi bokou drog, bann parey nou apel zot bann *heroin babies* i souvandfwa bann zanfan ki napa konsantrasyon dan laklas e zot detri latmosfer aprantisaz dan lekol.

Bokou fwa zot konportman i senpleman entolerab. Ozordi zour deba lo televizyon, se pou analize si nou pep in vin en pep ki pli vyolan. Toulezour lo *Facebook*, lo televizyon ou tann lager ek gran kouto, viktim ki'n ganny blese oubyen menm ganny lanmor.

Sa bann move konportman zanfan i pe preznan vin en problem konportman adilt. Ler ou pa koz ek ou zanfan e ler ou pa montre ou zanfan respe pou Lalwa, ou zanfan i grandi pou vin en adilt ki napa respe pou Lalwa.

Alor Mosyon pe demann bann paran, pou pran konsyans ki pou laprantisaz vin efektiv i pa depan zis lo *teachers*, i pa depan zis lo resours dan lekol me i osi depan lo paran koman sa lafors deryer sikse son zanfan.

Dan en lot mo, se sa relasyon triparti ki fer sa 3 mayon dan sa lasenn zwenn, se paran lo en kote zanfan ki fodre i fer son bout e osi lekol fodre i zwenn son bout.

Paran i bezwen zwe son rol pour ki i koz avek son zanfan depi ler i komanse depi ler i ptipti, kontinyen koz ek li dan lekol e siport li pou pran bann bon desizyon dan lavi. Lekol i a zwe son rol li zanfan i a donn

son komitman pou li aprann e aprann e aprann.

Laprev Mr Speaker i devan nou, dan serten lekol prive kot paran i bezwen pey ledikasyon zot zanfan, zot fer sir ki zot sivre e zot mars ek zot zanfan tou dilon zot *journey* dan lekol. Zot fer sir ki zot pe *attend bann parent, teacher consultation* pou zot kapab vwar si i annan problem ek zot zanfan, e ki fason ansanm pou redres sa zanfan pou fer li remont lo semen lavi, re konpran repran konsyans son ledikasyon.

Mr Speaker an konklizyon, mon oule dir ki sa transformasyon ki nou pe fer, mon oule dir ki sa transformasyon ki'n ganny trouve ki'n ganny ekrir dan nou manifesto, ki parti *LDS* pe koz lo la, responsabilite lo bann desizyon, fason nou pe viv, i pou permet nou zanfan epanouir e konstrir sa soyete modern pou anmenn plis limite e fraternite dan nou pei.

Mr Speaker avek sa, mon oule remersi ou e demann tou bann Manm pou siport sa Mosyon ki pe al dan en bon direksyon, pe demann nou paran annan sa pli gran dyalog avek nou zanfan, pe demann zot pou asize kantmenm zwe en pti partou ludo aswar.

Akoz se sa ki ti fer sa *bondship* e i ti fer mwan avek mon paran, pas bann bon letan ansanm ki inoubliyab, ki ozordi mon remersi li ki in fer mwan kapab konpran ki dan bann zwe ansanm, i fer nou konpran Lalwa e fer nou konpran bann sityasyon lavi e met bann fanmir ansanm.

Se sa bann valer ki nou pe koz lo la;- bann valer transformasyon ki nou Prezidan toulstan pe koz lo la ki nou devret konstrir dan nou bann fanmir Seselwa. Mersi.

MR DEPUTY SPEAKER

Mersi Onorab Hoareau. E parey mon ti'n demann bann Manm pou endike lekel ki oule koze, i annan 20 Manm ki'n endike zot oule koze.

Si nou pou donn tou dimoun zot 30 minit parey *Standing Orders* i preskrir nou pou fini Merkredi, demen nou pa pou fini koz lo sa Mosyon. I pou iresponsab pou nou fer sa, e mon pou pas koman pa serye dan sa Chair si mon permet sa. Donk mon pe donn tou dimoun 10 minit, mon krwar zot pou kapab fer lesansyel lo en pwen ki koz zanfan, paran, responsabilite.

So 10 minit sakenn nou *clock*, get zot letan, pa bezwen les mwan dir letan pe fini, i

annan en revey isi anler zot war la. Donk prosen lo lalis se Onorab Phillip Arissol. Mersi.

HON PHILLIP ARISSOL

Mersi Mr Speaker. Bonn apre midi Mr Speaker. Tou koleg Onorab e tou dimoun ki pe swiv. Mr Speaker Mosyon anmennen par Onorab Samynadin ki lir koumsa;

Lasanble i lans en lapel avek tou paran pou angaz seryezman dan en konversasyon avek zot zanfan konsernan zot konportman, avek bi pou amelyor e anrisir konteks lansennyman e ek laprantisaz dan bann lenstitisyon skoler e pou asire ki zot zanfan i benefisyé maksimonm pandan zot letan kot lekol.

Mr Speaker sa lapel i enportan e serye pou paran angaze dan konversasyon ek nou zanfan lo zot konportman kot lekol. Sa pou vreman ede pou kre sa lanvironnman aprantisaz pozitiv. I annan bokou paran ki pe fer sa, e pour sa mon dir zot felisitasyon e kontinyen pouse pou zot zanfan.

Mr Speaker en konversasyon ouver e onnet ant en paran ek son zanfan, i kapab ed sa zanfan konpran lenportans bon konportman ek

konesans konportman negativ. Sa konversasyon i osi montre sa zanfan benefis ler koman en etidyan ou en zanfan responsab e ou annan respe pou nou ansennyan, ou kanmarad etidyan e osi pou propriete lekol.

Ler koman nou bann paran nou enspir valer moral dan nou bann zanfan, sa pou anmenn sa bann lefe pozitiv dan zot, ede batir en karakter pozitiv avek karakteristik konpasyon, respe, zantiy, imilite. Montre nou zanfan distenksyon ant sa ki byen ek sa ki mal ki evantyelman ankouraz panse rasyonnel e bon zizman.

Mr Speaker, pou al en pe pli lwen, mwan mon pou demann ek bann paran pou pa zis annan konversasyon ek nou zanfan me osi pran par e asiste dan ledikasyon nou zanfan. Ler paran i partisip dan ledikasyon son zanfan, sa i kapab anmenn amelyorasyon dan son performans akademik, ogmant motivasyon e devlop pli bon adres sosyal.

Ler paran i donn gidans, konsey e sipor zon zanfan i ede pou zot kapab sirmont bokou defi. E nou zanfan i kapab *attend* zot potansyel.

Mr Speaker partisipasyon paran i vreman enportan pou

ed ansennyan pou edik nou bann zanfan pli byen. La detrwa fason ki paran i kapab asiste e sipot pou ansennyan dan ledikasyon nou zanfan;

Etablir kominikasyon ouver, kominik regilyerman avek ansennyan dan sa fason ki ou, ou reste enformen lo progre ou zanfan e konn son pwen for e osi son pwen feb e domenn kot i bezwen bokou plis sipor.

Donn sipor kot lakour, sa i ankouraz zanfan avek bon labitud etidye, rezerv letan pou fer devwar lakour, kre sa latmosfer pou lanvironnman trankil kot napa distraksyon pou aprann.

Partisip dan *open day* ki ganny fer kot lekol, sa pou permet diskisyon, diskrit progre akademik ou zanfan, son konpetans sosyal e konportman. Sa i osi loportinite pou kestyonn e adres nenport lenkyetid, ki swa paran ou ansennyan i kapab annan e pe rankontre lo size zanfan.

Kot i posib partisip dan aktivite levennman ki lekol ou zanfan i organize. Partisip dan aktivite levennman ki son laklas i organize ki sa i enkli partisipasyon paran.

Si ou kapab asiste laklas avek resours tel ki materyo laprantisaz, donasyon liv pou zot libreri. Asiste levennman

Iwazir kot lekol tel ki *sports*, teat, kiltirel e osi partisip dan *meeting* paran-ansennyen si ou kapab.

Mr Speaker ler paran e ansennyan i travay ansanm, zot kapab kre en lanvironnman laprantisaz ki promot e ankouraz sikse akademik e satisfaksyon personnel pou sa etidyan e osi sa paran.

Koman paran nou bezwen konpran sa ki bon e sa ki mal pou nou bann zanfan. Nou transpire pou donn nou zanfan le meyer e sa i merit osi enkli son ledikasyon.

Sepandan dan nou misyon pou gid nou zanfan ver sikse dan zot letid, nou souvan annan tandans pou negliz kek laspe enportan dan ledikasyon nou zanfan. Alors mon pe sipliye ki sa Mosyon anmennen par Onorab Samynadin i ganny ekoute e tandem. E ganny pran dan en fason pozitiv pou byennet nou bann zanfan e zot lavenir.

Mr Speaker atraver ou, mon ti a kontan dir avek Onorab Samynadin ki mon pou siport son Mosyon. Mersi.

MR DEPUTY SPEAKER

Mersi Onorab Arissol. Vwala en legzanz nou merit pe swiv. 5 minit in fer le pwen.

Prosennman Manm lo lalis Onorab Cosgrow.

HON WALLACE COSGROW

Bonn apre midi Mr Speaker. Mersi Mr Speaker. Mon pou sey mon mye pou mwan pran legzanz Onorab Arissol e reste dan letan ki ou'n *allocate* nou pou fer nou prezantasyon.

Mr Speaker mon pran laparol apre midi pou mwan koz lo sa Mosyon anmennen par Onorab Kelly Samynadin. En Mosyon ki si nou *être* fran i en Mosyon ki- mon krwar nou tou ozordi nou pe koz lo la, lasosyete pe koz lo la.

E mon krwar i merit serten diskisyon parmi nou menm Manm Lasanble Nasyonal e politisyen n zeneral dan pei. I en keksoz ki konsern nou tou e i en keksoz ki mon krwar nou tou nou bezwen get dan laglas e fer serten refleksyon.

Mr Speaker i enportan ozordi dan sa sosyete ki nou pe viv, pou nou kontinyelman koz avek bann paran lo lenportans zot langazman dan ledikasyon zot zanfan. I enportan Mr Speaker akoz parey in ganny dir e parey in ganny dir souvandfwa, se laprantisaz i komans dan lakour e laprantisaz i dan tou sord kalite fason.

E se premyerman paran ki enkilke ouswa i enkorpor bann bon eleman dan zot zanfan menm avan ki zanfan i komans al lekol, e se la kot vreman laprantisaz i komanse.

E si nou mank sa komansman Mr Speaker mon krwar - dan mon pwennvi pou mwan - mon krwar i riske annan serten problem parey nou dir *down the line* kot apre sa bann mank gidans, mank langazman i al manifeste pli tar dan lavi sa zanfan an mezir ki sa zanfan pe grandi. E lenportans langazman mon krwar i enn ki tre enportan.

E an dizan sa Mr Speaker mon krwar i rol lasosyete i rol Gouvernman pou osi donn sa ledikasyon donn sa si oule sa lankourazman bann paran pou zot vin pli angaze ver laprantisaz zot bann zanfan.

Mon dir sa Mr Speaker akoz pa nou tou ki parey. Pa nou tou ki annan menm lafors mantal, pa nou tou ki annan menm nivo konprenezon pa nou tou ki annan menm nivo ledikasyon e pa nou tou ki war keksoz dan menn loptik.

So petet mannyer mwan mon war en keksoz, mannyer mwan mon santi direksyon laprantisaz mon zanfan i devret ete, petet i annan paran ki li osi i war parey me solman i pa

neseserman konpran ki mannyer i bouz dan sa direksyon.

So mwan mon krwar i annan en lobligasyon osi ver nou bann lenstitisyen sosyete nou bann NGOs, nou bann Minister, Departman Gouvernman ki annan pou fer avek sa domenn, ki mon krwar i devret annan plis ledikasyon, plis langazman pour- ver bann paran pou kapab ed bann paran i, bann ki war zot en pe pli dan difikilte pou kapab enkilke sa bann zafer dan zot menn e osi dan zot bann zanfan. So mon krwar Leta osi i annan en responsabilite, en rol pou zwe ladan.

E osi Mr Speaker ler nou koz lo lenportans lasosyete mon pe koz lo sirtou ban group enfliyanse dan lasosyete *ok*. I annan larelizyon, i annan sosyete sivil, me i osi annan nou menm nou Mr Speaker politisyen.

Souvandfwa pour en bon pe letan nou'n war dan sa pei kot i annan politisyen ki'n fer politik zis pour vi zot fer politik pou ou ganny *mileage*. I annan politisyen dan sa sosyete ozordi ki'n senm laenn, ki'n senm bann move fason fer parmi nou popilasyon e ki ozordi i annan menm paran, i annan menm zanfan ki'n anmas sa bann

eleman negativ e sa pe manifeste ozordi.

(Interruptions)

HON WALLACE COSGROW

Mr Speaker mon kapab ganny trankilite pou mwan prezant mon deliberasyon silvouple Mr Speaker?

MR DEPUTY SPEAKER

Koman en Manm *Caucus LDS* mon ti ava *beg* mon bann koleg silvouple, les zot koze, *I mean* les Lopozisyon koze silvouple pa bezwen *disturb* zot. Mon pe fer sa *appeal la not as the Speaker be pour zot montre en pe respe behavior, good behavior* silvouple mon enplor zot. Mersi. *Proceed Onorab.*

HON WALLACE COSGROW

Mr Speaker e ler mon lo sa pwen se sanmenm kalite pwen ki mon pe sey fer resorti sa bann *good behavior* ki nou bezwen bann politisyen pou nou annan latolerans pou nou kapab ekout lezot koleg.

Mon pwen sa, sa i mon pwen, ou kapab pa dakord-dakor pa dakor be sa i mon pwen ou ava annan ou loportinite apre pou zot fer zot bann kontribisyon.

So mon pe dir sa Mr Speaker akoz mon rapel an

2016 mon ti lo *campaign trail* dan distrik Plaisance mon antre kot en fanmir ki mon konn tre byen. E ler mon vini detrwa manrmay o koumsa dan lakaz pe zwe sanson ‘Pil lo li’ e zanfan pe sante, manrmay pe sante!

Konmsi i zis montre ou ki kalite parol nou enkilke dan nou bann zanfan, e nou anvi demen nou bann zanfan i al lekol i a vin bann pti lanz lekol, me kan zot dan lakour zot pe ganny enkilke avek en bann kalite parol ki pa pou neseserman reflekte byen lo zot.

So nou bezwen nou osi responsab sa bann politisyen e pa bezwen senm bann parol ki demen pou reflekte move lo lasosyete lo bann paran e nou bann zanfan.

Akoz i enportan akoz demen sa i afekte ki mannyer nou delivre nou sistèm ledikasyon e i enportan si nou anvi bouz devan dan sa laliny ki sa Mosyon ozordi, ki mon krwar i vin avek bon lentansyon pe sey dir nou.

Mr Speaker, nou bezwen osi kapab edik nou bann zanfan lo lenportans ledikasyon. San ledikasyon ozordi dan sa sosyete ki nou pe viv san ledikasyon e la mon pa pe koz zis ledikasyon akademik, mon pe koz ledikasyon zeneral, san

ledikasyon nou napa gran lavenir, nou napa gran lavenir.

E lasosyete, bann norm sosyete, i egzize ki ou annan serten konportman ou annan serten nivo ki permet ou entegre e fer serten travay dan sosyete pou kapab benefis ou prop lekor ou enn e benefis lasosyete.

E mon krwar i enportan ki nou annan e la ankor i devwar leta pou enkilke sa dan lendividé, dan pei pou montre zot lenportans edik zanfan akoz i bezwen ledikasyon.

E Mr Speaker, letan nou pe koz ledikasyon ankor, programm ledikasyon, ozordi lasosyete yer avek lasosyete ozordi ek demen ki pe vini i pa neseserman parey. Petet sa stil sa model ki nou ti annan avan, i pa neseserman ozordi pe adres demann lasosyete ozordi e demann lasosyete demen.

Mon a donn en legzant Mr Speaker; i annan zanfan ki ozordi in fini ganny son *basic*, i pa neseserman anvi *or* annan sa kapabilite pou li al bokou pli lwen akademikman. Alors i annan en loportinite pou li kapab bouz dan en filyer ki li petet i santi i pli confortab si en dimoun i anvi al lapes les li al lapes, si i anvi vin en mason les li al en mason.

Me ledikasyon i bezwen *frame* son sistem ki kapab permet sa zanfan bouze al fer sa ki li i anvi tout an prenon kont kwa ki sosyete i bezwen, me donn li sa laliberte pou li al kapab fer sa ki li i anvi e develop son lekor dan en fason.

Me souvandfwa ler nou pa fer sa Mr Speaker se sa ki kre bann sityasyon sirtou dan bann lakour lekol, kot i annan bann sityasyon kot zanfan pa neseserman respekte lakour lekol, i napa gran respe pou laprantisaz e i kre problem pou lanvironnman lekol e lezot zanfan ki petet i anvi bouz dan en lot filyer.

So mon krwar poudir Minister Ledikasyon i bezwen kapab aziste son lekor pou kapab sa.

E Mr Speaker pour Gouvernman mon santi i bezwen ekoute e la letan nou pe ad sa zafer manifesto nou pe koz lo manifesto Mr Speaker. Me solman ozordi mazorite bann pwen manifesto *LDS* zot pe vire lo la, zot pa pe neseserman pe konform lezot manifesto. Bokou *u-turn* pe -ganny fer. So annou aziste *or* annou aret koz lo manifesto. Ou konpran mwan Mr Speaker?

E linefikasite Gouvernman ozordi i aparan par egzant par egzant dan sistem sosyal,

Onorab Hoareau on koz lo bann paran ki fer bann travay apre ler.

Mr Speaker bokou paran i fer bann travay apre ler akoz sistenm sosyal sa pei in *fail!* Ok i pa pe ganny sa sipor e alors i bezwen al rod en lot louvraz e i bezwen kapab siport son fanmir e dan lenstans ki sa i arive, serten *neglect* i arive kot lakour kot gran ser i bezwen vey pti zanfan.

Mon enplor Gouvernman ankor pou zot kapab revwar zot sistenm sosyal, anmas lafanmir pour ki nou ava anpes arriv sa annan problem *down the line* dan lekol dan lasosyete partou. So avek sa Mr Speaker mon war ou, ou'n montre mwan ledwa en minit mon krwar mon'n sey zwe dan 10 minit.

Be mon krwar lesansyel in ganny fer e mon krwar ki Gouvernman i bezwen ekoute, Gouvernman i bezwen kapab ekout tou bann group dan lasosyete e pou nou kapab bouz devan nou bezwen annan la tolerans e nou bezwen kapab les bann lezot dimoun osi ki kapab donn en koudmen, donn en koudmen Mr Speaker. Mersi bokou.

MR DEPUTY SPEAKER

Mersi Onorab Cosgrow. Pou kapab kit *order* dan Lasanble

akoz mirmirasyon ki'n annan, mon a zis rapel bann Manm pou nou reste lo relevans Mosyon, i en lapel avek tou paran. So if we focus lo ki Mosyon pe demann nou, krwar mwan nou pou kapab depay bann mirmirasyon ki nou pe tande letan en Manm pe koz lo en keksoz avek en lot.

So mon enplor zot ankor pou mentenir- akoz mon krwar la i en moman pour Lasanble Nasyonal vin ansanm koman en lenstitisyen, e pour nou koz lo en size ki trakas nou tou dan lasosyete koman bann adilt.

Prosen Manm lo mon lalis e sa mon pou apel Onorab Doyace Porice.

HON DOYACE PORICE

Mersi Mr Speaker. Bonn apre midi Mr Speaker. Bonn apre midi tou mon bann koleg MNAs.

Mr Speaker avans mon komans lo mon entervansyon, mon pou dir mersi Bondye papa pou donn mwan lafors ek kouraz pou arriv la ozordi. Mon pou siport sa Mosyon anmennen par Onorab Kelly akoz mon osi mon santi ki i annan bokou sa bann paran e osi zanfan pa pe pran ka ek zot ledikasyon. Nou annan bokou dan distrik e Praslin pa pe ganny eparnye.

Lankourazman etidyan i bezwen vin ver paran premye, san paran personn pa pou fer naryen akoz zanfan pa pou fatig zot. Zot mazin zis lanmizman, zwe e antre dan lezot keksoz ki pa konsern zot. Bann ansennyan i fer zot mye pou nenport ki zanfan ki vin dan zot laklas, e zot toulstan pe ankouraz nou zanfan e pour sa mon felisit zot sa bann ansennyan. Sirtou ansennyan lo Praslin.

Mr Speaker, laprantisaz i tre enportan pou nou zanfan sa se pour nou kapab ganny en lanplwa a lavenir pou zot prop byen personnel pou zot fanmir e osi lasosyete. Mon rapel pandan mon lanfans, nou paran ti vreman serye avek nou dan nou letid, paran ti toulstan vin kot lekol letan i neseser. Sirtou vvar nou prezans ek rapor apre nou legzanmen.

Oubyen ki nou pe fer anver nou letid dan nou lekol. E sa ti ed nou bokou pou annan plis konsantrasyon dan sa lenstiti. E nou ti benefisyé maksimonm dan nou letid, ki'n anmenn nou kot nou ete ozordi, kot nou pe deservi dan nou pei pou fer travay marse dan nou sosyete.

Mr Speaker, i annan paran ki vreman pe donn sipor zot zanfan e sa zanfan i sorti

byen dan zot legzanmen e pou sa nou felisit sa bann paran e zot zanfan ki pe fer byen. Me par kont i osi annan paran ki menm si i fer tou pou sa zanfan me frekantasyon i pli for.

Paran kontinyen swiv zot zanfan pour ki zot a kontinyen konsantre dan zot letid pou kapab donn sa bon vizaz dan nou lenstiti skoler. Me nou enplor avek lezot paran ki pa pe vreman donn sipor zot zanfan, oubyen bann zanfan ki zot osi pa pe pran zot letid o serye pou silvouple mazin byen ki zot lavenir i ver letid, san letid ver ledikasyon pa pou anmenn zot okenn par.

Paran swiv byen letid zot zanfan pou nou prop benefis akoz mazinen nou depans bokou lo nou zanfan. Alor annou met letid nou zanfan dan nou lanmen. Siport zot, pour ki zot a kapab siport nou paran e lasosyete. Akoz mazinen se nou paran ki bezwen edik nou zanfan premye avan ki i la lekol.

Mr Speaker lasosyete ti a kontan vvar nou zanfan pe travay dir pou zot kapab pran nou plas demen, dan plizyer sekter dan Gouvernman osi dan sekter prive pou kontinyen fer travay marse dan nou pei. E anmenn sa diferans dan plizyer landrwa travay e osi sa legzanp

anver lezot etidyan ki pe monte demen.

Minister konsernen pe fer zot mye pou anmenn letid avanse pou nou zanfan. Menm si parfwa i annan lekol ki napa ase ansennyen me sa pa anpes travay kontinyen. E Minister avek son transformasyon dan ledikasyon pou ed deplis keksoz aranze dan ki i pou fer ki nou etidyan pou kapab ganny plis e arriv pli lwen anver zot letid.

Alor nou bann etidyan bezwen pran letid amen e profit sa sans pou zot avanse e osi profit sa sans pou arriv kot zot ti a kontan arive dan lasosyete.

Avek sipor paran ki nou pou toulstan repete pou zot zanfan, e osi sipor Minister Ledikasyon pou anmenn bokou profesyonnel dan nou pei. Mr Speaker avek sa 2 mo mon pou siport sa Mosyon. Mersi.

MR DEPUTY SPEAKER

Mersi Onorab Porice. Prosen entervenan nou ava kriy Onorab Rocky Uranie.

HON ROCKY URANIE

Mersi Mr Speaker. Bonn apre midi tou koleg Onorab. Mr Speaker mon pou komans mon lentervansyon koumsa;-

Nenport ki Gouvernman ki vin o pouvwar, i bezwen ankouraz paran pou angaz zot

dan laprantisaz zot zanfan. So pou mwan ler nou koz manifesto *LDS* pou mwan sa i zis *common sense* ou pa war naryen an plis ki zot pe fer.

Mr Speaker mwan mon'n en ansennyen pou 23an, mon'n fer 4an primer, *teach* dan primer, nivo P5, P6 e 17an, nivo segonder S1 ziska S5, *IGCSE*, matematik. Pandan tou sa lannen ki mon *teach* mon'n zwenn plizyer zanfan e plizyer paran sorti dan diferan *background*.

Mon'n *teach* Plaisance primer, mon'n *teach* Mont Fleuri Segonder e mon'n *teach* La Digue. So ou kapab mazinen ki kantite diferans diverzans lanvironnman ki zanfan in sorti ladan e paran ki mon'n zwenn.

Mr Speaker koman en ansennyen e osi mon en paran, mon'n bezwen zwe 2 rol. Zwe rol paran akoz koman en ansennyen mon konnen kwa ki mon ekspekte de mon zanfan e kwa ki lekol i ekspekte de mon zanfan e osi koman en paran zwe mon rol paran pou disiplin mon zanfan pour ki pa zis pou li al fer bon zanfan lekol, me pa partou kot i ete pou li kapab anmenn bann bon savwar viv avek li ki parey mon paran pou mwan ti montre mwan.

Mr Speaker i pa en keksoz fasil akoz ou zanfan ler i kot ou

dan salon i en fason be koman i sot deor lo *bus stop* i zwenn lezot i kapab vin en lot fason. So akoz lenfliyans *peer pressure* i bokou la ater e deswit si sa labaz disiplin ki ou pa'n donn li pa ti for i fasil pou li detournen.

Mr Speaker lekol nou ti annan plizyer striktir mon rapel, e mwan mon ti enn bann *HOY* ki ti ganny sans vwar bann zanfan ti annan bann sistenm ki nou ti byen garde fer *counselling* bann zanfan, swiv zot, fer sir ki zanfan i reste an konformite avek sa ki nivo disiplin ki Minister Ledikasyon i donne.

Me nou konnen pa tou zanfan ki ganny *brought up* parey, e alors i annan ler i ariv lekol i vin *challenge* sistenm ki an plas. Enn rezon pou sa se ki parfwa zanfan i annan bann fristrasyon ki zot sorti avek kot lakour e ler zot ariv kot lekol zot- la i sa landrwa ki zot pas plis letan e la i sa landrwa kot zot vin manifeste tou zot fristrasyon.

E koman en ansennyan mon konpran ki bann ansennyan i pas ladan e la ou pou bezwen rod fason ki mannyer ou pou *deal* avek sa bann sityasyon.

Me parfwa ou vwar ki sityasyon i depas ou. kantmenm ou annan *code of*

conduct ou a swiv *step 1* ziske *step 6* kan mon en ansennyan koman en para konmsi mon pa'n zanmen swete konmsi vwar en zanfan ganny *expel* dan lekol pour move konportman.

E mwan tou kou mon'n dir ek bann zanfan, zanfan ou bezwen reste zanfan swiv prosesis zanfan ziske ler ou a vin en adilt. Pa depese pou ou sey vin adilt avan ler.

Nou'n vwar sa dan bokou zanfan ki zot oule depese pou zot vin adilt byen boner. Mr Speaker paran ozordi parey Mosyon pe demande zot bezwen reste zot angaze dan laprantisaz zot zanfan sa mon toutafe dakor avek.

E koman en Manm Lasanble koman en paran i normal pou nou osi angaz nou ladan fer sir ki nou form par sa diskisyon ki pour enplor Gouvernman pou vin avek bann mekanizm met striktir an plas pou ede pouse ki nivo disiplin dan lekol i retom an plas.

Akoz nou'n vwar plizyer *video* kot zanfan pe lager, tousort kalite ansennyan pe konplent eksetera. Paran ki mel dan problem zanfan e tousala i vilenn pou nou vwar. E sirtou si i lo rezo sosyal i vilenn pou nou vwar akoz serten keksoz ennler i demann peze, me selman ler in ariv dan domenn

medya i al partou e sa i kapab menm bann touris ki vini i kapab vwar sa bann keksoz.

Mr Speaker, me selman en keksoz ki nou bezwen resevwar e nou bezwen revwar fason kantmenm nou demann paran pou elve zot zanfan nou bezwen war lekol osi sistenm ki an plas. Akoz pou mwan mon krwar petet nou ankor pe servi en kalite sistenm dan lekol malgre mon'n tann bokou koze lo la poudir nou pe aranze, nou pe aranze. Me mon pa krwar zot pe aranz gran keksoz.

Ou konnen, ozordi zanfan fason aprann petet nou bezwen fer plis resers fason aprann in sanze. Mon dir sa akoz pou detrwa lannen mon ti pe servi teknolozi ler mon ti pe ansennyy matematik, e mon ti war sa i mars tre byen. E zanfan ti kontan e zot performans ti monte.

So alors petet nou bezwen revwar en pe nou *curriculum*, fer sir ki i pa tro sarze e fer sir ki nou annan bann nouvo fason ou fer zanfan aprann. Ki zanfan pa santi poudir sa menm sistenm ki ti pe marse 30an pase nou pe sey fors li sey fer li marse la konmela. Petet nou bezwen revwar ki fason keksoz i deroule.

Nou bezwen annan aktivite pou kit zanfan angaze

pour ki zot pa revert dan bann problemm disiplin parey ban aktivite ekstraskoler. E aktivite ekstraskoler ki anmenn bann valer ki zanfan i kapab pran kot lekol sa bon valer ki i gannyen kot lekol i anmenn kot lakour pou li partaze ek lafanmir e dan kominate.

Mr Speaker, paran an premye lye son zanfan i pour li, li ki premye dimoun avek son zanfan e byensir fondamantalman li ki premye dimoun ki bezwen enstrir son zanfan. E la i annan en keksoz ki nou dir sa ki ou donn ou zanfan, sa ki ou donn ou zanfan sanmem sa ki i al rann laba.

Alors ou bezwen fer sir konnen ki fason ou koz ek ou zanfan, konnen ki fason ou konport ou, akoz ou zanfan i pou annan premye lye avek ou menm alor sou ki bezwen an premye sa *role model* pou ou zanfan pour ki li osi kot i ale i vin sa bon zanfan disiplinen pour ki i montre sa ki in aprann avek son partan.

Akoz si ou pe esper zis ansennyen sa pti moman letan kot lekol, kantmenm nou dir zanfan i pas plis letan kot lekol, zanfan i pas plis letan avek en sel ansennyan li, i kapab war li pe fer 3, 4 size par zour e war diferan nasyonalite ansennyan pe i ansenny li.

Bomaten i kapab vini i ganny li 80minit matematik e sa in fer avek en Seselwa, apre i ganny li *geography* la i pe fer avek en *Kenyan*, apre taler i ganny li 2 lezot ankor i pe fer avek en lot. E sak sa bann dimoun osi kot zot sorti zot, zot annan zot fason disiplin zanfan e petet la osi keksoz i ganny fer diferan fason.

Mwan mon'n vwar personnelman leksperyans kot zanfan i fini vwar ler i vin lekol lekel ansennyan ki i pou konport li avek e lekel ansennyan ki ler i arriv lekol, i pou sey vin tant son sans pou li fer serten aksyon disipliner.

E sa i baze lo fason ki bann ansennyan zot menm ennler zot fer kot lekol vizavi bann zanfan. Ou konnen mon'n tann Onorab dir ki zanfan i bezwen per paran.

Zanfan pa sipoze per son paran ki mannyer, zanfan i bezwen konpran son paran e paran i bezwen konpran son zanfan, akoz si ou zanfan i per ou ki nou'n realize se ki zanfan i annan en serten keksoz ki pa dir paran li i gard anndan. I pa dir paran e la kot plizyer keksoz i pase.

Sityasyon lavi li menm lekonomi nou'n vwar ki mannyer pei keksoz pe deteryore, alors parey Onorab

in dir keksoz in vin pli difisil pou bann paran e la paran i bezwen war li pe fer 2 travay. Me ler ou fer 2 travay byensir ou pou napa letan pou ou ek ou zanfan kot lakour.

E la kekfwa ou'n arriv tar e ler ou arive ou osi paran ou annan ou fristrasyon. Ou pa ganny sans pou asiz avek ou zanfan pou menm vvar, pou menm demann li be ki ou'n fer lazournen ozordi lekol, dir mwan en pti keksoz ki ou'n aprann ozordi lekol pa ganny sans fer sa.

Akoz paran li osi i annan son lafatig lo li ki alor son fristrasyon i fer li pa ganny letan vreman pou kapab asiz avek son zanfan.

MR DEPUTY SPEAKER

Gard ou letan Onorab.

HON ROCKY URANIE

Menm get *homework*.

MR DEPUTY SPEAKER

Onorab ou letan in arive.

HON ROCKY URANIE

Alors Mr Speaker nou bezwen siport sa bann paran ki dan sa bann sityasyon e Gouvernman i bezwen angaz li ek met ban striktir an plas, pou siport sa bann paran ki annan sa bann

problemm pou angaz zot avek zot zanfan.

I vre pa tou paran i annan paran ki vreman fer en zefor pou angaz li avek son zanfan e avek lekol pou vwar ki pe deroule, pou fer ki son zanfan i disiplinen e aprann byen. I annan zanfan ki disiplinen, me selman *still* i ganny problem laprantisaz sa i en lot fason.

Me mon gran paran ti dir mwan ki ou kapab annan ledikasyon, ou kapab entelizan, me si ou napa sa savwar viv, sa bon disiplin ou pa pou al lwen dan lavi e sa i vre.

E nou bezwen boner edik nou zanfan pou zot kapab vin bann sitwayer responsab demen dan lasosyete. Mesaz pou bann ansennyan pa dekoraze, nou isi dan Lasanble nou reste *committed* pou angaz Gouvernman pou rod bann fason meyer fason pou fer ki lekol i vin en landrwa kot i annan sa disiplin ki laprantisaz i kapab deroul byen.

Pou bann zanfan zot menm, pou bann zanfan zot menm, mesaz ki zanfan pa neseserman ki ou paran i la dan ou lipye i annan legzant otour ou, ou kapab swiv. Pa neseserman ki ou paran i la dan ou lipye toulezour pou ou konport ou.

Mon krwar i annan ase legzant kot ou kapab servi pou ed ou e si ou annan problem mon krwar lekol i bezwen annan striktir ki sa zanfan i kapab servi pou li al rod led.

Mr Speaker ou'n dir mwan *wrap up* mon ankor annan plizer pwen la, me selman mon a fer li. So alors en lot keksoz pou nou menm nou ankor isi parey Onorab Cosgrow in dir, nou politisyen nou bezwen zwe en rol serye e nou'n vwar zanfan sirtou i swiv nou byen nou'n vwar ki fason nou *run* nou kanpanny ennler, i fer ki zanfan i tenir, i anmas bann keksoz ki pa vreman dezirab e sa i difisil apre pou tire dan zot lespri.

So alor nou ti a kontan petet dan le fitir, nou pa vwar ankor sa bann kalite kanpanny deroule ki afekte nou zanfan e afekte nou popilasyon dan le fitir. Mersi Mr Speaker.

MR DEPUTY SPEAKER

Mersi Onorab. In al 3 minit *overtime* ki mon'n donne silvouple pa fer sa ankor akoz mon ti'n dir zot i annan evey la anler, tou dimoun get son 10minit, *let's be fair* mon pa anvi tou lazournen *wrap up* i reste ou 1 minit sepa mwan krwar.

Nou tou nou adilt ler nou tonm dakor lo en keksoz nou

tonm dakor. E Mrs Deputy Clerk kekfwa enn bann keksoz ki fodre nou met dan Bidze en *countdown clock* ti ava byen pou Lasanble zot ava vwar letan ki zot annan pou zot *operate ladan*.

Prosen entervenan Onorab Romain. Mersi.

HON GEORGES ROMAIN

Mersi Mr Speaker. Bonn apre midi tou Manm koleg e tou dimoun a lekout.

Mr Speaker sa Mosyon i enn ki tre pertinan pou nou bann paran ozordi. Nou'n vwar bokou lenstans kot move konportman dan bann lekol e an zeneral dan lasosyete i lakoz bokou bann lensidan lager e bagar ki ganny raporte.

Sa ki enportan pou note avek sa Mosyon, se kote ki nou komanse? Mr Speaker e la mon krwar ki nou tou nou a dakor ki se paran ki zwe en rol pli enportan pou fer elve en zanfan. Disiplin li e montre li savwar viv, sa i pou ed li ganny sa bon lankadreman an grandi.

Sa Mr Speaker i en keksoz k komans kot lakour e i devwar tou paran san leksepsyon. En paran i ganny konsidere koman sa premye ansennyan pou son zanfan. E se zot ki sa ansennyan pli enportan dan lavi en zanfan.

Bokou resers in montre lenportans e rol paran ler zot angaz zot aktivman avek zot zanfan e i kler Mr Speaker ki pli i annan langazman paran ek zanfan, pli nou vwar lefe pozitiv lo sa zanfan. E sa nou vwar li lo nivo sosyal, akademik e lo zot devlopman an zeneral.

Sa bann resers ki'n fer lo nivo mondyal, i montre nou klerman ki en zanfan ki annan en bon lantant avek son paran, e ki paran i swiv zot de pre lo kote zot zefor dan lekol e ki zot annan en rapor pros ek bann lansennyman ki pe edik zot zanfan, Mr Speaker se bann menm zanfan ki fer byen dan zot size lekol. Zot konfidans in monte, zot pli byen disiplinen, zot enterakte byen avek lezot dan zot zalantour.

Me Mr Speaker i osi enportan ki nou koman paran nou donn legzanp lo bon fason viv pour ki nou zanfan i vwar ki savedir viv byen e i annan bon konportman. Pa vo lapenn ekspekte nou zanfan konport zot byen si nou koman paran nou pa kapab fer li.

Nou pa kapab ekspekte nou zanfan konpran pou zot pa lager si nou koman paran nou desann pou al lager avek ansennyan dan lekol.

I enportan ki paran i donn legzanp lo ki fason pou kapab

rod solisyon pou en problem san bezwen lager. Ler nou donn bon legzanzp nou zanfan i vwar i aprann e i reflesir. E ler nou donn move legzanzp zot osi fer menm keksoz aprann pou fer parey.

Alor i enportan Mr Speaker pour ki paran i ankouraz en fason kler, pou komunik ek son zanfan lo kote son letid, i enportan ki paran i monte lentere dan performans lakademi en zanfan, akoz se sa ki ankouraz li pis le i ganny sa sipor kot lakour.

Paran i devret pa mank loportinite pou *attend meeting* ek ansennyan akoz se la ki nou kapab vwar bann febles en zanfan ki paran i kapab donn plis latansyon pou ed sa zanfan.

Mr Speaker me i annan bokou lezot fason ki en paran i kapab donn sipor son zanfan kot lekol. Nou konnen ki konmela i annan bokou aktivite ki ganny organize pou zanfan an deor lekol e ki sa bann aktivite i donn sipor edikasyonnel pour en zanfan.

I annan bann aktivite parey aprann fer en sport tel ki naze, zwe tenis, zwe chess, zwe badminton. Ladan eski paran i kapab ankouraz zot zanfan pou zwenn sa bann laklas, dan vakans konmela i annan bokou ban programm pou zanfan,

annou pa mank sa bann loportinite.

Mr Speaker i annan bokou dimoun ki ofer *extra class* pou bann zanfan ki bezwen led avek zot *homework*, dan Anse Etoile nou annan bann *ex ansennyan* ki pe donn sa servis bann etidyan.

Paran i menm kapab donn son zanfan si i anvi ou ed lekol atraver bann proze vin *attending* miting ki lasosyasyon paran e ansennyan i organize la zot a kapab donn zot nide, konpran ki pe pase kot lekol e osi sa i ava en loportinite pou ede mobiliz resours pou lekol ki pou osi benefisyen prop zanfan.

I annan paran par egzanp ki annan serten konesans ki zot kapab partaz avek lekol e ki mon asire ki bann ansennyan a byen kontan pou aprann.

Mr Speaker, en zanfan i bezwen ganny byen siorte dan en kominate pou li grandi. Tou dimoun dan en kominate i zwe en rol pou donn legzanzp pou nou viv byen ansanm dan lasosyete.

Me pli enportan sa bon savwar viv i devret komans kot lakour, se la ki en zanfan i komans aprann. Me annou koman paran donn sa sipor ler zanfan i komans al lekol. La nou vwar da *meeting* piblik kot en zenn in soulev en pwen kot i

ti pe demann trankilite dan en kominote pour ki bann roten t apli kapab reviz pou zot legzanmen, sa i tre ankourazan Mr Speaker.

Akoz i montre ki zanfan i osi anvi aprann, mon oule dir sa zenn kontinyen ek sa bon lapros. I annan ki krwar ki ler zanfan i komans lekol se ansennyan ki devret pran en pli gran rol, wi sa ansenyan i la pou montre sa zanfan bokou keksoz. Me i enportan pou fer resorti ki paran i zwe en gran rol osi.

E la mon lans en lapel avek bann papa pou osi zwe en gran rol dan lavi zot zanfan e pou ed zot ek laprantisaz. Akoz nou vvar plis bann manman ki zwe sa rol.

Pou konklir Mr Speaker, wi en zanfan an grandisan i ganny sipor adisyonnal atraver son ansennyan. Me son paran i reste touzour son premye ansennyan se sa akoz ki paran i devret reste touzour angaze pou asire ki en zanfan i ganny son lankadreman pou li aprann byen e servi tou son loportinite a son dispozisyon.

Mr Speaker mon ti a kontan felisit tou bann ansennyan ek tou travayer lekol ki ede dan ledikasyon nou zanfan e osi tou paran ki pe ed zot zanfan. Mr Speaker mon

pou donn mon sipor pou sa Mosyon anmennen ar Onorab Samynadin. Mersi Mr Speaker.

MR DEPUTY SPEAKER

Mersi Onorab. Nou ava pran en dernyen entervenan avan nou pran *break*. Mon a donn laparol onorab Zialor.

HON NADDY ZIALOR

Mersi Mr Speaker. Bonn apre midi tou dimoun. Mr Speaker, mon pou sey mon msye pou mon kouver ou mon pwen pandan 10 minit.

Me letan mon'n regard Mosyon Onorab Kelly, in fer mwan fer bokou refleksyon. An premye lye zis bomaten nou'n annan en group zenn etidyan ki isi dan nou Galeri e letan mon vvar ki nou Lasanble pe ganny demande pou fer konversasyon - en konversasyon koman bann Manm e osi koman bann paran, parske i annan bokou nou dan sa Lasanble ki en paran.

So mon krwar se pour sa rezon ki sa konversasyon i en konversasyon ideal kot nou pa merit pe met politik ladan, me plito profit sa lokazyon pou nou angaz nou sosyete - wi nou sosyete pou vreman pran nou ledikasyon aker.

Pou vreman elev sa standar ledikasyon ki souvandfwa dayer nou menm

nou, nou koz lo la. E wi i komans dan lakour, i komans ek sa manman, ek sa papa avek sa zelev li menm.

E la mon retour bann-mon reviv bann memwar, bann memwar ki letan mon ti dan lekol tou le bomaten dan *assembly* i annan en slogan oubyen en lapriyer i dir avek ou- *I must study, study and study.*

Mes amis letan nou pe koz konversasyon avek paran, mon realize ki nou annan diferan group paran. Ozordi nou annan bann paran tousel, bann manman tousel, bann papa tousel, bann manman oubyen bann zanfan in viv avel zot gran manman oubyen bann zanfan in viv avek bann manman adoptif.

Tousala nou bezwen pran en moman pou nou fer en konversasyon, en konversasyon ki nou merit pe koz lo la, se non pa pour donn bann mesaz divizyon oubyen konfizyon, me en mesaz ini koman en Lasanble pou fer konpran ki nou bi se pour nou fer Sesel reisir, nou bi se pour vvar en nivo ledikasyon eleve, disiplinen.

E wi pe enport *background* sa paran responsabilite i reste i en zanfan i en zanfan e sakenn i merit pe pran son

responsabilite. Alors sa Mosyon i ideal pandan ki Minister Ledikasyon osi pe fer ser ten travay, pou revwar diferan striktir pe kontinyelman angaz avek bann *teachers* pou revwar modalite.

E mon'n tann en Onorab ki'n koze avan mwan, bann modalite ransennyman pou met li azour avek realite ozordi, i ideal osi ki malgre ki nou pou vin avek diferan modalite fodre ki nou koman en sisyete, koman en komite nou pe koz en sel lavwa en sel langaz Mr Speaker.

I tous mwan letan mon vvar en zenn ki annan 4an e ozordi i avek en *tablet* i pe aprann laprantisaz lesion konesans atraver tekno lozi.

Ozordi letan ou vvar en zanfan ki dan P5 i pe reve pou li travay lo en *tanker* oubyen menn ki dan segonder i pe al pli lwen ki Sesel li i dir ou mwan mon anvi vin en astronot. Sa pa kapab arive si paran i pran tou responsabilite e i met lo sa *teacher* oubyen lo sa lekol.

E wi fodre nou dir fodre ki nou rekonnent ki dan lekol ozordi nou annan en kantite ansennyen ki paran lezot zanfan. Savedir dan bomaten letan zot vini, zot pran sa zanfan zot bers sa zanfan

konmsi sa ti zot prop zanfan Mr Speaker.

E la mon tir sa pou avek zot pariske zot pa mon selman pe get dan lansennyman me zot osi pe regar dan byennet sa zanfan.

Wi, wi nou annan bokou keksoz ki'n ganny fer oparavan e ozordi pou asire ki laprantisaz en zanfan i deroule dan en fason *noble*, dan en fason byen ki malgre parfwa i annan ki'n pran en konasyon politik ozordi fer sir ki en zanfan i annan en gadyak lo son lestoman, nou pe fer sir ki sa zanfan i fer aprantisaz ki byen ki i pa tonm feb, ki kapab aprann Mr Speaker e sa nou bezwen rekonnet.

Alors atraver sa Mosyon petet ozordi dan sa 10minit pa nou tou ki pou kapab kouver tou pwen me i enportan, i *trés* enportan ki nou mesaz ki nou pase i pa en mesaz konfizyon, i pa en mesaz pou ganny *mileage* me i en mesaz ki nou pe demann avek tou paran, tou pran komansman par nou isi dan sa Lasanble pou angaz dan en konversasyon pou nou koz avek nou zanfan, pou nou pa bezwen pas blanm lo personn.

Me letan ki nou antre dan lakour, malgre tou nou bann preokipasyon nou pran en pti

letan e demann avek nou zanfan, ou zanfan;

Bonswar, koman ou sava? Ki mannyer lekol in pase ozordi? Eski ou annan *homework*? Eski ou'n ganny okenn difikilte? Eski i annan okenn lezot ou kanmarad ki'n *bully* ou? Eski ou konpran ki mis in dir ou lekol? Permet mwan pas en pti kou dan ou kaye, annou redir mwan en pti keksoz oubyen resant en pti sanson ki ou'n aprann bomaten avek ou mis.

Sa i bann pti keksoz ki nou kapab fer koman en paran pou nou vreman angaz nou dan lansennyman nou zanfan Mr Speaker. Wi mon'n tann koz lo *end of year* kot nou vin get nou *report*, kot nou vin get lesон nou zanfan.

Prezidan i annan rezon dir ki i annan ki pa vin anmas *report*, zis semenn pase en pti leksperyans en paran i vin kot mwan i dir mon;-

“Wi, mon enn parmi mwan ki pa'n al anmas *report* mon zanfan, me letan Prezidan in dir pa'n anmase mon realize poudir i ti mon responsabilite alors mon'n desann mon'n al serse”.

Annou kontinyen koman bann dirizan angaz nou dan sa konversasyon, transform nou pei elev nivo ledikasyon nou zanfan. Me pli enportan re-

reenkarnen disiplin dan nou bann zanfan Mr Speaker.

Avek sa 2 pti mo mon pe aport mon sipor pou sa Mosyon. E mon swete ki Minister Ledikasyon pe ekout nou konversasyon apre midi e ki zot osi zot zwenn avek nou ki swa atraver diferan aktivite, pou angaz nou koman bann *community leaders* ansanm avek bann paran ansanm avek lekol pou nou fer sa konversasyon e anmenn sa transformasyon. Mersi Mr Speaker.

(APPLAUSE)

MR DEPUTY SPEAKER

Mersi Onorab Zialor. Nou pou pran *break* la. Solman mon pou koup zot letan nou pou retournen 4er.

E pou bann dimoun ki pe ekoute sirtou anonser SBC zis pou donn zot en *warning*, nou pou al en pti pe pli tar ozordi 5er edmi nou pou fini pou radyo SBC organiz son programmasyon e pou zot bann Manm *call* zot madam ek msye dir zot pe ariv en pti pe pli tar enkli bann travayer Sekretarya. Donk nou a zwenn 4er.

(BREAK)

MR DEPUTY SPEAKER

Welcome back tou dimoun e nou pour kontinyen avek deba lo Mosyon table par Manm Elekte pour distrik Au Cap pour Onorab Kelly Samynadin e zis pour rapel bann dimoun ki pe swiv travay Lasanble pour sa Mardi. Mon a zis repas lo Mosyon. Mosyon i lir koumsa;:-

Lasanble pe lans en lapel avek tou paran pour angaz seryezman dan en konversasyon avek zot zanfan konsernan zot konportman, avek bi pour amelyor e anrisi konteks lansennyman ek laprantisaz dan bann lenstitisyon skoler e pou asire ki zot zanfan i benefisyé maksimonm pandan zot letan kot lekol.

Prosen entervenan lo lalis e nou reste avek 10 minit pour tou dimoun ki nou kapab fer maksimonm, mon ava apel Onorab Johan Loze.

HON JOHAN LOZE

Mersi Mr Speaker. Mr Speaker dan katriyenn Lasanble mon pa rapel egzakteman si an 2008 ouswa 2009, Onorab Jennifer Vel ti anmenn en Mosyon ki ti pe demann pour kreasyon Liniversite Sesel e mon krwar ti annan en bout dan son Mosyon kot i ti remersi Prezidan Michel.

Caucus SNP at the time, zot ti refize vote. E mon rapel Onorab Georges ti fer kler avek nou ki ti en bon Mosyon be ki nou ti'n gat Mosyon avek sa zafer mansyon e remersiman pour Prezidan Michel.

Onorab li ozordi, i napa okenn mansyon, okenn politik dan lafason ki son Mosyon i *worded*. Selman mon vwar li enteresan, in al lo manifesto son parti, dan son prezantasyon. E Onorab Georges, ti la boner me la mon pa pe vwar li, mon pe *wonder* si i pa'n donn gidans baze lo bann *best practices* Parti SNP zot menm, ki zot ti *adhere to* dan lepase.

Mr Speaker mon konman en paran mon pa kapab vwar nanryen ki *objectionable* avek sa Mosyon. Mon en paran, mon annan mwan 4 zanfan, trwa ki mon ankor pe fer grandi, enn in fini, in gran. E mon konnen mwan ki ou bezwen angaz ou a 100 poursan dan devlopman ou zanfan. Ofet mon annan enn la an se moman, kot nou pe annan en *tug of war* nou de.

Toulezour mon dir li mon ti a kontan ganny en *minimum 18minit par zour*, toulezour ki ou *set aside* pou fer enn pti pe *reading*. E mon'n eksplik li byen mwan akoz 18minit, mon'n eksplik li poudir 18minit par

zour pandan 365 zour, i pour donn ou environ 109 erdtan dan en lannen, ki ou'n dedye pour ou lir. E 18 minit i pa bokou li, i pa bokou 18 minit zis pour ou fer ou *reading* ki a permet ou devlop sa *skill* e sa i enn pti pe son febles.

Demann mwan si mon gannyen 18 minit? Yer swar ler mon dir li pran liv i vini i asize o bor mwan, dan sofa. Ek son liv in ouver liv. Demann mwan keler sa piti in ale mon pa kapab dir ou mwan.

At some point lo tar son manman i vini, pe vin met son pti frer dormi dan sofa i dir mwan, “Joe ki sa ki dan sa kwen kousen?” Mon anvoy lanmen mon gete son liv. Non! Dir ou en serye *veux pas – Non!* Zis 18minit mon demann li, toulezour prezan sa en. Pa dir mon'n dir li komansman le mwan, apre mon les pase poudir ou bezwen lir 18. Non toulezour mon dir li “*minimum 18minutes a day*”. Ou pa le komans ek 18, komans ek 5, al lo 10, *not!*

Mon konpran douler paran. Si mon 18 minit mon pa kapab ganny en boug pour lir. Mon konpran douler paran an zeneral. So wi, *it is incumbent upon us* koman paran, pour nou angaz nou an plen dan devlopman nou zanfan.

E pa nou tou ki annan menm lafors, pa nou tou ki annan bann menm atou. Mwan mon en dimoun mon pouz mon zanfan for lo ledikasyon finansyel. Mon anvi zot vin *financially independent*.

Mon anvi zot konpran ki sa larzan. Mon anvi zot konpran ki mannyer finans i marse e lekonomi i marse. So sa i enn bann keksoz mon pran li personnelman lo mwan, pour mwan montre zot, pour enstrir zot. Akoz mon konnen lekol, pa montre ziske zot pour arriv en pli for laz. So depi dan 10an mon komanse, mon asiz ek zot, mon fer zot fer.

Be en paran menm si ou pa kapab enstrir ou kapab *être* prezanz, ou kapab al lekol, ou kapab angaz avek lekol, ou kapab siport lansennyman e siport sa ansennyan ki pe ansenny ou zanfan. Ou kapab montre, e aport ou soutyen dan diferan fason.

Mon pa pour al antre dan bann detay, parske okenn leksplikasyon ki mwan mon pour donnen la, pou enn pti pe kler, kler e vreman deleye konpare avek sa prezantasyon ki loter Mosyon li menm in fer pli boner. So nou bezwen respe son resers e son travay ki in fer, lo son Mosyon ki in aport devan.

Mr Speaker, *however having said that* nou bezwen get enn pti pe nou bann pwen febles osi. Resaman lo televizyon mon ti vvar kot letan ti annons rezulta IGCSE kot ti pe dir nou, nou annan en pe rekil. E deswit sa ki ti sorti, ti blanm paran, ti resevwar blanm sorti kot latet menm laba anler nimo 2, e deswit premye kalkilasyon ki nou fer, nou pa ni dir i annan en analiz pour nou fer lo sa sityasyon, nou bezwen gete, nou bezwen en *empirical approach* gete - non, nou blanm paran.

Be paran li menm li, li i pa egziste an izolasyon, wi i annan i annan ki pa kapab e i annan ki pa anvi. *You have the unable and the unwilling. Fine* zot la zot osi. Be an mazer parti mon pa krwar paran pa anvi angaz zot dan ledikasyon zot zanfan.

So petet letan zanfan i fel, nou analiz kwa ki pe vreman mars mal. Nou gete kot i annan blanm, nou aporsyonn li egalman. E si direksyon Ledikasyon, i bezwen analiz son lekor e gete kot li i pe fel. Akoz i bezwen annan sereten nonm responsabilite ki i pran. Zot pa kapab zis eksternaliz zot responsabilite atraver eksternaliz blanm.

Mr Speaker be letan nou pe koz lo paran, nou pa kapab

divors sa size ki nou pe diskite ozordi avek lefe ki a en serten pwen dan nou pei ti annan zis 15 dimoun ki ti lo *welfare*. Nou bezwen aksepte poudir i annan fot ki'n ganny komet, i annan keksoz ki'n mars mal dan nou pei.

Mon konnen zot dir zot ti pe *deal* ek koripsyon, ek labi be seryezman. 15 dimoun? Apard sa 15 dimoun ti napa personn ankor ki ti bezwen led ek lasistans? Ti napa paran ki ti bezwen sa led ek lasistans pour ed li pli byen angaz li avek son zanfan?

Mon krwar i annan en keksoz ki'n mars mal la. Ki'n kapab kontribye presyon lo bann paran, ki'n kapab fer paran al rod bann lezot fason pour zot okip zot fanmir, okip sa menm sa zanfan ki nou pe dir. E ki'n *lead to* serten defayans dan fason ki i antretyen ledikasyon son zanfan. Akoz in bezwen antretyen ledikasyon son zanfan. Akoz in bezwen antretyen vant son zanfan. Sa i enn.

Mr Speaker i annan sa fenomenn "pil lo li", la ki kontan pa kontan i en keksoz ki nou pa kapab get li an izolasyon avek sa ki'n arive ek nou bann zanfan. Nou pa'n kapab ouver latet nou zanfan fer en keksoz

koumsa antre ladan, apre pa ekspekte li annan reperkisyon lo nou zanfan.

I pa ti en bon keksoz, i pa en bon mesaz, i pa ti en keksoz pozitiv e nou'n enkilke sa dan nou zanfan. Nou'n fors antre dan zot latet. Nou pour bezwen les en peryod letan kot sa keksoz i kalmi, i sorti e nou arete avek sa bann zafer. E annou pa blyie sa fenomenn ki pil lo li ti *culminate* avek en laprosesyon, serkey dan Victoria ziska kot Lorloz.

E ti annan zanfan la *around* pe danse, pe sante, pe fer sa nespes ladorasyon serkey ek portre Prezidan Faure lo la, kot Lorloz. *These are things that*, nou'n fer sa. Lensilt pour Ziz Mathilda Twomey lo ledo en *pick up*. Nou'n fer sa, e zanfan in ekspoz ek sa bann fenomenn.

Pa paran ki'n fer, wi zot paran sa bann dimoun, wi! Me i pa sa bann paran ki pe ganny blanmen ki'n fer sa bann keksoz. So letan nou gete annou get li byen, annou get li dan en fason byen arondi, si i annan blanm pour aporsyonnen annou aporsyonn blanm partou kot i devret ale. E nou annan serten sityasyon, pour nou pran an *main*.

Mon personnelman mon krwar nou devret donn zot en koudmen, i nou sosyete, i nou

zanfan i nou pei, nou tou nou devret soud zepol ansanm e bouz sa dan en bon direksyon.

Me a la menm enstan nou, nou get li byen. Nivo kriminalite pe ogmante dan pei zot menm zot, zot in port en kestyon bomaten. Ki vedir zot menm zot, zot rekonné, zot in realize ki sa problem i pa zis dan lekol, i parmi nou bann *juveniles*, i parmi nou bann zenn adilt e i parmi bann adilt osi.

So i annan en *issue* avek krim dan nou pei, ki sa osi si nou pa vey li, i pour met plis stres e presyon lo paran, plis stres e presyon lo nou sistèm skoler, lo nou bann ansennyan ki nou bezwen rod fason pour nou adres tou bann sityasyon ki pe leve dan nou pei.

Enn bann dernyen pwen mon ti a kontan tous lo la Mr Speaker, nou bann, *teachers* ki'n ariv laz retret, ki ti'n fini planifye zot retret. Zot pour bezwen reste la pour ankor 2an, lansennyman i travay difisil. I en travay ki demann bokou, e i annan bokou zot ki parey enn in dir mwan resaman - Onorab mon pa konnen, zis mon la.

Nou bezwen rod en fason pour motiv zot, si nou pour annan sa bann ansennyan mon pa konnen mwan, sa ki dan la gouvernans sey gete silvouple. Sa ki al direksyon sa Minister,

sey gete silvouple. Nou bezwen sey rod enn pti fason spesyal, pour nou sey motiv sa bann ansennyan ki annan sa larout ekstra ki ti'n fini *plan, cycle out* ki la i pa pe kapab *cycle out* dan lansennyman. Akoz i en stres.

Mr Speaker, e finalman blanm lo zanfan. I annan en dimoun fek *remind* mwan enn pti pe pli boner poudir zanfan i aprann son konportman avek adilt, avek paran wi, kot lakour wi, be pa zis ek paran, i aprann son konportman avek adilt.

E apre ki'n aprann son konportman ek adilt i *act out* landrwa kot i pa plis letan ki dan lekol. I al *act out* sa bann *learned behaviors* laba dan lekol, avek son bann koleg, avek son bann *teachers*, avek *management* lekol.

E ki dekoul dan sa problem, ki nou annan an se moman. So tousala i bann konsiderasyon ki nou bezwen met devan nou. Nou bezwen gete, e i pa zis paran e wi mon pour siorte mwan ki sa lapel ki paran i angaz nou plis, nou vin pli konsernen, nou pran plis nou responsabilite be i pa zis paran ki annan responsabilite anver zanfan, i pa zis paran ki bezwen *être responsab* anver son zanfan.

Sesel koman en sosyete mon ti anvi lans en lapel ki

sosyete antye nou angaz nou, pour kree sa latmosfer pour kree sa bon kondisyon, sa bon sityasyon ki nou zanfan i bezwen, pour li ganny sa *learning* ki i pe serse. Mersi Mr Speaker.

MR DEPUTY SPEAKER

Mersi Onorab. Prosen entervenan mon apele Onorab Michel Roucou.

HON MICHEL ROUCOU

Mersi Mr Speaker. Mon a dir bonn apre midi ou bonswar a tous. E Mr Speaker mon osi mon pour pas enn pti pe bann lenformasyon an term lo kote Mosyon anmennen par Onorab Samynadin.

Annefe Mont Fleuri nou annan nou apepre 5 lekol. E nou annan nou 2 lekol prive, Lekol *Francais* ek *Independent*. Apre nou annan lekol, ki zot dir Lekol Sourd, e apre osi nou annan nou 2 lekol Leta sa i Mont Fleuri Primer e osi Segonder.

E zis ler mon pour komans mon Mosyon Mr Speaker, mon le dir labyenveni nou de *headteacher* sa i Mis Shirley ki nouvo *Headteacher* Primer e Mis Nadia ki pour Segonder.

Mr Speaker mon'n ganny sans pour mwan zwenn avek nou de *headteacher*, zis pour

enn pti pe preparasyon pour sa Mosyon. E bann pwen ki nou'n kapab asize diskite se ki Mont Fleuri Primer, i ti annan li apepre 800 zanfan e avek - parey zot konnen poudir avek Lekol La Rosière ki'n tonm ansanm, in fer li annan apepre 1020 zanfan, ki ou kapab mazinen i annan nou apepre 60 *teacher*, an tou bann travayer an plis tou. E ladan *headteacher* in fer mwan ganny en konpran poudir se ki i mank zot apepre 5 *teacher*.

E ler ou pe asize ou pe ekout enn pti pe, *teacher* espesyalman lo kote primer, mis in fer mwan ganny en konpran ki apepre 10poursan paran ki angaz zot pour vin vizit kot lekol, get enn pti pe ki mannyer konportman zanfan i ete, vwar enn pti pe ki mannyer zanfan pe fer dan lekol.

E osi enn pti pe pour angaz zot ek *teacher* ki sa ou kapab dir se ki sa ki mon'n ganny en konpran se ki sirtou lo nivo primer, i demann plis enn pti pe sa langazman paran pour vini pour vin vvar.

E osi sa ki mon'n ganny en konpran Mr Speaker, se ki ziskan ozordi la, depi ler larantre in komanse, *teacher* i ankor pe *still* anvoy mesaz pour paran vin anmas *report* zot zanfan.

E la prezan la, i pour annan ankor en *round*, kot bann paran pour kapab ganny sa loportinite pour vin tyek enn pti pe, ki mannyer performans zot zanfan i ete? Ki mannyer keksoz pe marse dan lekol e kwa ki lekol li menm i ekspekte de zot?

E an term lo kote bann problemm ki bann *teacher* i gannyen ek bann zanfan, espesyalman lo kote primer, sa i problemm *bullying* li menm li, zanfan i lager. Parey ou konnen sa bann zanfan sa laz la, zot enn pti pe dan sa bann staz devlopman e zot ankor *still* dan sa bann staz zwe.

E souvandfwa bann *teachers* i santi zot kot bann paran, zot vini zot met zot zanfan la. Be selman napa bokou zot ki vini pour vin vwar, ekout enn pti pe bann konsern.

E ler ou pe ekout lo kote segonder, nou annan nou apepre 630 bann zanfan ki lekol dan Lekol Segonder Mont Fleuri, 64 *staff*, 54 *teacher* e ladan 50poursan bann paran i angaze. Savedir lo kote segonder bann paran i montre plis lentere, pour gete ki mannyer zot zanfan pe fer li menm li, lo kote laprantisaz e angaz zot enn pti pe plis ek lekol.

Me selman *still*, zot *still* annan sa problemm kot pa bokou paran ki vini pour zot - pour vin anmas *report* e bann problemm annefe ki zot pe rankontre se ki i annan bann problemm konportman, drog *uniform*. Parey ou konnen poudir tou lekol i annan son *code of conduct, hairstyle*, e osi bann lezot problemm, bann problemm kot lakour ki vin *end up* kot lekol.

E ler mon pe ekout sa Mosyon Mr Speaker, anmennen par Onorab Samynadin, mon panse poudir se ki, i enportan pour paran mazinen poudir se ki nou bann zenn i zot menm zot nou bann *future Leader*. Zot ki pour pran larelev, bann pozisyon ki bokou nou, nou pe okipe ozordi.

E ozordi Sesel ler ou pe gete, se ki i annan bokou pozisyon la, ki ti devret pe ganny okipe par Seselwa me selman nou vwar poudir i annan bokou etranze. E si nou pa komans li la, definitivman nou pour perdi en lot zenerasyon ankor.

Akoz nou'n deza pe perdi en zenerasyon, ki annan pour fer ek drog ek lalkol e si nou, la nou pa komans pas bann mesaz for e menm paran zwe zot rol pour antre dan bann lekol, ankouraz bann *teacher* -

akoz parey in ganny dir par bann ki'n koz avan mwan i annan bokou *teacher* ki pe mazin zot pe pran zot *retirement* e lekel ankor nou pou vwar demen? Nou pour vwar bokou plis etranze, ki pour bezwen pe pran bann pozisyon.

E kommela bokou fwa dan lekol, se ki i annan bann *teacher* ki petet i annan bann problem - ou kapab dir enn pti pe lo kote langaz pour zanfan kapab ganny plis en konpran, kwa ki zot pe ganny montre.

E Mr Speaker mwan, annefe mon fer li mon devwar tanzantan ler lekol i bezwen mwan espesyalman lo kote segonder, pour mwan petet zwenn ek bann etidyan espesyalman bann zanfan ki petet zot annan serten problem sosyal, kot mon vini donn zot enn pti *talk*, koz avek zot, e esey donn zot sa lankourazman.

Mon ti ganny sans pa bokou letan pase zwenn avek en group garson, ki apre ki lekol ti dir mwan zot ti pe demann en dimoun pour vini *have a talk* ek zot. Kot la sa bann zanfan in montre ou poudir malgre ki petet i pour annan serten problem akademik, e la zot annan en vizyon zot osi demen.

Mazorite zot dan sa laklas, bokou zot ti anvi, zot mazin

pour zot *join fire service*, e i annan ki ti a voudre vin en *mechanic* travay dan en garaz li menm li, e osi ti annan ki ti anvi vin en artis.

E la nou'n kapab fer bann laranzman e koz avek bann landrwa konsernen, kot la zot in dakor pour zot *welcome* sa bann zenn, ki demen zot osi ler zot a fini zot lekol, zot a kapab *join* en lemonn travay pour zot kapab kontribye.

E dezyenmman Mr Speaker, se ki nou osi nou vwar poudir se ki lakour lekol, kot i ete petet i annan bann fleo sosyal otour, oture. Ler mon pe mazin parey lo kote segonder i pa pe ganny eparnye avek problem drog, kot nou annan bann dimoun ki zot pa fodre zot dan lekol. Be selman otour bann *fencing* la zot vini, i annan bann aktivite ki petet zot kapab sey vin bat latet bann zenn avek e nou paran nou bezwen pran sa responsabilite.

Mwan osi parey bann Manm ki'n dir avan mwan mon annan mwan 3 zanfan, ki souvandfwa ler mon kot mwan, mon asize mon ganny en dyalog avek zot pour mwan konn enn pti pe mannyer zot lazournen in pase, si zot annan *homework*, enn de bann keksoz koumsa. Kot la nou, ou kapab dir nou kapab partisipe e souvandfwa

ou koman en paran ler ou fer sa ou vwar poudir i vreman enteresan pour ekout ou zanfan ki mannyer in pas son lazournen lekol.

Akoz laba i sa landrwa kot li, li menm li i pas laplipar son letan ek son bann zanmi e i enportan pour ou konnen lekel bann zanmi ki ou zanfan pe frekante e osi si petet ou kapab annan sa annan - pour konn enn pti pe bann dimoun ki zot pe frekante.

E Mr Speaker, ler mon pe koz lo kote paran li menm li, i annan en - ou kapab dir en pe letan, ou kapab dir en novo fason fer keksoz ki'n arive. Bokou paran ozordi pe les zot zanfan al dormi kot en lot zanmi, e sa bann paran i bezwen vey sitan byen sa. Akoz souvandfwa ki ou tande? Ou tann lo televizyon pe dir ou en tel in perdi, pa konnen kot i ete. E sa paran, i bezwen vey byen. Akoz ou pa konnen kot ou zanfan pe ale.

E osi petet angaz ou plis dan lekol pour ou konnen lekel ou zanfan? E ou *teacher* i kapab donn ou en pti pe *brief*. Mwan *teacher* mon zanfan espesyalman mon gran fiy, i vini i kapab dir mwan mon vwar ou zanfan pe frekant tel en tel laba, zis fer poudir keksoz pe mars byen. Tel keksoz i

koumsa, konmsi i annan sa pti *brief*, sa pti *meeting* kot ou kapab ou menm demen koz ek ou zanfan.

E mwan mon pour donn mon sipor Mr Speaker, sa Mosyon anmennen par Onorab Samynadin. Mon konnen poudir i annan paran la deor ki pe seye. Malgre i annan bokou paran tousel, zot pe seye. Espesyalman nou vwar bokou paran kot bann manman in bezwen pran latet fanmir, akoz papa swa i dan serten, dan serten kek problem lalkol ouswa drog.

E nou, nou anvi ankouraz bann paran, pour vini annan en dyalog ek lekol, koz ek *teacher* e mon kontan sa lapros ki *headteacher* in pran poudir souvandfwa nou vwar zot pe menm apres Lotorite Distrik pour zot kapab konnen kote en zanfan pe reste, pour li konn sa lanvironnman li menm.

E mwan mon kapab dir avek Onorab Samynadin kont lo mwan koman en paran, mwan mon pour donn mon sipor akoz mon santi poudir i annan nesesite la deor pour nou bann ki enn pti pe pli for, pour ed bann ki petet zot santi ki zot bezwen sa koudmen. Mersi Mr Speaker.

MR DEPUTY SPEAKER

Mersi Onorab. Mon ava apel Onorab Conrad Gabriel.

HON CONRAD GABRIEL

Mersi Mr Speaker. Bonn apre midi tou Manm. Mosyon pe lans en lapel avek tou paran pour angaz seryezman dan konversasyon avek zot zanfan. I en Mosyon ki demann bokou, e i en gro *challenge* serye espesyalman pour bann *single mothers*.

Loter Mosyon pe koz avek bagaz en ansennyan e osi koman en paran. Mr Speaker, i annan paran ki annan plizyer zanfan e sa la kot i vin pli difisil e konplike. E se la kot bann lenstitisyon skoler i devret osi ekipe avek plizyer resours, pou ed bann zanfan benefisyé maksimonm kot lekol.

Lavironnman kot lekol i devret konvenab, sa sityasyon *bullying* fodre ganny adrese dan son totalite. E la mon a profite pour fer resorti ki mankman ansennyan i en fakter kle. Paran i kapab fer son mye pour gid son zanfan fer pli byen. Me lefe i reste ki lemoman ki i arriv kot lekol, keksoz i sanze. Koman en paran mon santi ki mon'n zwe mon rol, e mon ankor pe angaz mwan seryezman dan konversasyon avek mon zanfan, konsernan son konportman e laprantisaz.

Mr Speaker mon'n menm al enn pti pe pli lwen, kot mon'n fer li mon devwar pour ouver enn pti tim *basketball* pour bann zenn. Nou tou nou konnen ki sport, i ede pour en zanfan vin pli disiplinen e annan respe pour lezot.

I annan plizyer lezot aktivite ki lo mon azanda e ansanm avek Direkter Lekol Pointe Larue Segonder koman Primer, ansanm ek led bann *teachers*, nou a met nide ansanm pour ki bann zanfan i benefisyé *to the maximum*.

Lo sa *note* mon enplor Gouvernman kontinyelman ed sa bann paran ki pli vilnerab. Mr Speaker lekol Pointe Larue Segonder, i konpri zanfan sorti dan 3 lezot distrik; partikilyerman Cascade, Anse aux Pins e Au Cap. Ler problem, oubyen lager i arrive en zanfan sorti Au Cap e en lot sorti Cascade, lo medya sosyal i dir ki lager ariv kot lekol Pointe Larue e la mon distrik i pas atraver move limaz. Nou bann paran Pointe Larue, pe fer nou mye pour koz ek nou bann zanfan lo zot konportman.

Mon asire ki tou paran ti a voudre zot zanfan i fer byen, i vin bann legzanp pour bann lezot zanfan, dan lasosyete. Napa enn nou la anndan ki ti a kontan ki zot zanfan i fel. Mon

panse ki nou tou nou pe swete ki nou zanfan i a fer byen, e tou larestan zanfan ki annan dan Sesel.

Mr Speaker, mon pour terminen, mon ti a kontan lans en lapel avek tou paran pou fer en zefor spesyal, pour ed zot zanfan e enspir zot, pour fer pli byen. Zis parey Mosyon pe demande ozordi apre midi. Plizyer entervenan in met bokou pwen devan i pa vo lapenn mon gaspiy bokou letan. Bann ki deza pe fer li mon remersi zot, e mon swet zot bon kouraz. Mersi.

MR DEPUTY SPEAKER

Mersi Onorab Gabriel. Mon pour aprezan apel Onorab Deshiela Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi tou koleg Onorab e bon apre midi tou dimoun a lekout. Mr Speaker ler mon'n lir Mosyon anmennen par Onorab Samynadin, mon santi ki dan mon deliberasyon mon pour bezwen tous partisipasyon nou bann ansennyan osi dan konteks lansennyman ek laprantisaz nou bann zanfan.

Mr Speaker, Mosyon i vin dan sa letan kot nou pe tann propozisyon pour entrodwir en

sant vokasyonnel, pour ankadre kantite zanfan posib dan ledikasyon. E pour met devan diferan fason ankouraz zanfan reste dan lekol e konplet zot letan laprantisaz ki pour ed zot met pare pour antre dan lemonn travay avek en lespri pozitiv e determinen.

Mr Speaker a sak fwa ki Minis Ledikasyon i fer en diskour ki annan pou fer avek ledikasyon, i toulstan fer sir ki i fer resorti ki ansennyan, ansennyan i bezwen travay ansanm avek paran. Ki bann paran zot bezwen travay pros avek lekol e fer zot prezans konte dan lakour lekol, otan posib pour ki zot zanfan a vin pli konsyan ki zot pe ganny swiv de pre e ki zot paran pe devlop sa lentere dan zot ledikasyon pour zot fitir.

Mr Speaker sa Mosyon i donn nou osi sa platform pour apresye travay ki tou dimoun ki pe ganny anploye avek tou bann lekol dan Sesel. Ozordi i evidan ki laprantisaz i komans depi kot lakour, reaksyon paran ek zanfan, lafason komans avek ou zanfan depi pti, montre li dir mersi, demann en keksoz ki ou anvi ou pa zis pran, respe pour sa ki pli gran ki ou.

Dezyenmman se sa konfyans ki sa paran i met dan sa *childminding* kot i kit son

zanfan e osi dan bann *daycare*. Bokou paran - Mr Speaker bokou paran i *look forward* pour al sers zot zanfan, kot en *childminding*, ouswa kot *daycare*, tou le apre midi pour li konnen kwa ki son zanfan in aprann.

Mr Speaker pou en manman letan son zanfan pe komans konte ziska 10, pe lir *a,b,c,d* avek li an montan kot lakour, ouswa pe sant enn pti sanson swa an Kreol, ou an Angle. Pour li i en gran lazwa e i pran li koman son premye pa dan laprantisaz.

Tou sa bann laprantisaz de baz, i vin atraver lanmour ek servis pasyonnen sa bann ansennyan dan nenport nivo lekol. Pour sa, nou dir mersi a tou bann ansennyan.

Mr Speaker sa ki pli tousan, se letan paran i menm li menm i korpere avek lekol son zanfan. I reponn lapel bann ansennyan, i swiv rekomandasyon ki ganny met a zot latansyon lo konportman ek devlopman zot zanfan e osi pare pour pran bann ansennyan, direktris ou direkter bann lekol tre serye.

Mr Speaker letan en paran i annan respe pour son zanfan, byensir i pou devlop sa respe anver lekol osi. Dan sa sosyete ozordi, bokou manman i vwar

zot pe debout tousel avek de a 3, ou menm 4 zanfan. Papa in disparet, dan son prop lemonn.

Mr Speaker bokou manman tousel pe trimouse, annan pe fer de travay pour kapab antretenir son zanfan ek son lakour akoz zot napa sipor papa. Me malgre tou sa bann defi, manman ki vreman determinen i pa servi son travay pour afekte laprantisaz son zanfan. I fer letan pour li al kot lekol, i partisip dan *open day*. I menm fer enn pti letan pour regard bann travay lakour son zanfan.

Mr Speaker sa bann paran - se sa bann paran ki merit en gran laplodisman e bokou lankourazman. Sa sityasyon i osi al pour nou bann ansennyan, ki trouv zot dan menm soulye. Annan bokou nou bann ansennyan ki ozordi zot osi vwar zot koman en manman tousel avek zot zanfan, mont kot lakour vin okip manze, prepar liniform enkli son lenz travay pour li menm, e pas lo travay lakour e fer letan pour pas travay lakour son zanfan, apre i asize pour prepar travay lo son *time table* pour ki pour lot zour ki pe vini.

Mr Speaker travay en ansennyan i pa fasil, i demann bokou lanmour pasyans lendirans ek determinasyon. Se

pour se la, ki mon pour toulstan siport tou ansennyan ki malgre zanfan parfwa i perdi respe pour zot, i *bully* zot, parfwa zot menm zot sa bann ansennyan zot sorti dan en lanvironnman kot zot pa *happy*, i pa konfortab, me zot pa zanmen bes lebra. Zot antre dan lakour lekol, latet anler avek en sourir.

Me mon pour felisit bann ansennyan ki malgre zot pas dan serten difikilte, avek serten paran, zot pa tir zot lakoler lo zanfan, zot pa gard rankin, zot kontinyen fer zot travay byen e donn zot latansyon san okenn rezerv.

Mr Speaker, mon pour osi ankouraz bann paran pour reflesir byen avan reazir letan zot zanfan i raport en ansenyan, rod laverite, koz avek zot zanfan, e apros sa ansennyan dan en fason kalm pour ki sa zanfan i ava osi servi menm legzanp.

Mon pour terminen par dir avek tou paran ki kontinyelman angaz zot anver laprantisaz zot zanfan, pour kontinyen lo sa bon semen, e mon pour ankouraz bann paran ki vwar zot prezans, ki krwar zot prezans dan lakour lekol pa enportan, mon pour demann zot pour fer li zot priyorite pour partisip dan laprantisaz zot zanfan. Donn zot sa

lankourazman e osi anmenn zot sipor pour bann ansennyan ki pe ansenny zot zanfan, tou dilon lasemenn.

Mersi pour tou bann paran ki pran ledikasyon zot zanfan a ker. Mersi pour tou bann ansennyan ki travay e donn tou pour relev ledikasyon zanfan Seselwa. Mersi tou bann direktris ek direkter ki siport zot bann travayer, enkli tou *auxiliary helper workers*, tou *school wardens* ki desarz zot travay byen pour sekirite bann zanfan lo semen piblik.

Mersi pour tou bann travayer dan tou bann *childminding* ek *daycare* kot ledikasyon de baz i komanse. E mersi a tou bann lezot travayer ki travay dan lakour lekol e ki zot servis i anmenn en lenportans dan zot prop fason.

Mr Speaker mon pour siport sa Mosyon. E mon pour demann bann paran pour kontinyen montre lanmour dan ledikasyon zot zanfan, siport zot e kontinyen donn zot tou sipor posib, pour zot arive *attend* zot bi. Mersi Mr Speaker.

MR DEPUTY SPEAKER

Mersi Onorab Bastienne. Prosennman lo lalis, mon ava don laparol Onorab Herminie.

HON WILBERT HERMINIE

Mersi Mr Speaker. Bonn apre midi Mr Speaker e tou Manm koleg Onorab e tou dimoun ki a lekout. Mr Speaker sa lide par deryer sa Mosyon, i vreman bon. I en bon Mosyon anmennen par Onorab Samynadin, ki'n byen ganny reserse e byen ganny prezante.

So mon pa pour fer politik ek sa Mosyon pour gat li, parey Onorab Hoareau in fer. Me mon pour al dan lesansyel sa Mosyon. Nou konnen i enportan ki paran i angaze avek laprantisaz zot zanfan. E ki dan bokou ka, bokou ka, paran i angaz li tre *deeply* avek zot bann laprantisaz zot bann zanfan.

Me i malere par ler ki i annan serten paran, pa kekfwa pa lo zot lafot, me zot napa sa devlopman koman en paran pour konnen ki mannyer pour elve zot bann zanfan. La kot i tre enportan kot bann lasosyasyon sivil i antre ladan pour ede, akoz i annan bokou zot ki fer bann *parenting class* e sa mon krwar i en bon linisyativ pour ankouraze, pour kapab donn en pe plis ledikasyon nou bann paran, pour ed zot pour zot kapab vin pli angaze dan laprantisaz zot bann zanfan.

Mr Speaker fabrik nou sosyete in sanze, nou'n nepli annan bann *extended family*.

Fanmir i vin pli pti, tou lede paran i travay, so i fer li en pe difisil pour serten paran kapab aktivman partisip dan laprantisaz zot zanfan.

Me de lot kote i annan en pwen ki ase enportan osi. Nou konnen nou pas dan *COVID*, me dan sa letan *COVID*, in annan en dekoneksyon total ant sirtou lekol avek paran. Mon pa pe dir tou lekol in fer sa *or* tou paran in fer sa, me dan mazorite le ka laprantisaz ti pe ganny fer atraver bann *social media* prensipalman *network*, *WhatsApp* kot ou ti ganny bann dokiman, pour kapab montre ou zanfan e fer la aprann.

Me apre sa prosesis ki nou'n pas ladan e ki *COVID* in diminyen, sa dekoneksyon i ankor *still* la. Akoz mwan mon konnen koman en paran e bokou paran osi in koz ek mwan, ki i annan serten lekol wi ki zot in re-konekte avek paran, pour anmenn zot *onboard*, pour zot konnen kwa, kwa ki pe pase kot lekol? Kwa ki annan pour zanfan? Ki mannyer zot zanfan pe devlope dan lekol.

Me malerezman pou dir i annan serten lekol ki pa'n refer sa rekonneksyon. I annan serten lekol ki paran pe ganny difikilte pour li ganny akse avek mis ki montre zot zanfan lekol.

Dan serten ka, i annan paran ki sey telefonnen, i sey anvoy mesaz, me zot pa ganny okenn larepons. So mon krwar i devret annan, lo tou le de kote i bezwen annan sa rekonneksyon ant lekol e paran.

I annan bann bon legzanp, parey ler mon get Lekol La Rosière, La Rosière Primer e osi La Rosière, Lekol Lakres La Rosière. Sa koneksyon mon vvar li pe mars byen, kot mis lekol, *headteacher* i konekte avek paran, ou ganny en *preview* kwa ki pe pase dan lekol e kot zot bezwen led zot konekte.

Be i annan serten lekol ki sa pa pe ariv ditou e i malere ki sa i afekte nou zanfan, i afekte progresyon nou zanfan. E mon pe lans en lapel la pour Minister Ledikasyon annou refer sa koneksyon ant bann lekol ki sa pa pe arive. Akoz sa i enportan pour nou kapab kit en lizye lo devlopman nou bann pti trezor.

Mr Speaker loter Mosyon in tous en pwen enportan dan son deliberasyon, kot in adres sa problem, *disturbance* dan bis.

Mr Speaker sa mon vvar ki i en *issue* ki i pe vin lo en nivo Nasyonal, kot konportman pour bann zanfan ki pran bis pour al lekol, pe deteryore e mon krwar ki Minister - e par angaz paran

nou bezwen rod en solisyon pour nou kapab rezourd sa problem. Akoz lanmenm la dan sa bis ki annan bokou *bullying* ki arive. E sa i afekte bokou zanfan ki zot pa anvi al lekol.

E i malere ki sa problem kantmenm in ganny rapporte par plizyer paran, i kontinyen arive e i kontinyen repete. Mon pe lans en lapel la dan sa Mosyon, pour donn sipor, plis sipor lekol, *warden*, mon pa konnen bann *best practice* ki kapab annan deor ki nou kapab pran, pour nou kapab *once and for all deal* avek sa *issue* konportman zelev dan bis.

Mr Speaker en lot keksoz ki loter Mosyon in koz lo la, se nou fabrik sosyal. I enportan note ki bokou paran i sey fer zot mye, sey fer zot mye pour ede avans zot bann zanfan dan zot laprantisaz, ki serten i kapab fer li me malerezman serten i ganny bokou difikilte.

I annan paran e ki *call* ou dir ou koumsa mon pe seye, i pe seye me i napa sa sipor ki Gouvernman in mete pour kapab anmenn li. Pa donn li tou, me ed li pour ed son zanfan, pour ki demen li osi i ava vvar li dan en sityasyon pli eze pour li kapab aprann kot lekol e fer pli byen dan son lesson.

Osi Mr Speaker nou bezwen osi tou get en pe plis dan bann *best practice* ki bann lezot pei ki ledikasyon zot nivo i enn pti pe pli o, ki pour nou kapab adopte dan nou kondisyon Sesel, nou pa met li direkteman parey zot, zot pe fer. Me pour nou kapab fer sa koneksyon vin en pe pli fasil ant paran, zanfan e lekol.

Akoz sa i en sityasyon ki pe vreman koz en gro problem pour *learning* nou bann zanfan akoz nou menm nou vwar pwen pe desann, nivo pe desann, pa dan tou ka me serten, nou bezwen gete serten lekol kwa ki pe fer sa? Kwa ki pe fer ki serten lekol i kapab fer byen, e serten pa kapab fer li menm parey?

Mr Speaker mon lo mon kote mon pour donn mon sipor sa Mosyon. Akoz sa Mosyon i en Mosyon ki tre pre avek mon leker. E ki mon vwar son lenportans ladan e mon pe demann tou dimoun pour siport sa Mosyon. Mersi Mr Speaker.

MR DEPUTY SPEAKER

Mersi Onorab Herminie. Mon pour aprezan apel Onorab William.

HON WAVEN WILLIAM

Mersi Mr Speaker. Bonn apre midi tou dimoun ki a lekout. Mr

Speaker sa Mosyon, bokou in ganny dir lo la e mon anvi zis azoute poudir i annan son relevans. E Mr Speaker nou dir ki i pran en kominate pour elev en zanfan, ouswa i pran en sosyete pour elev en zanfan.

Mr Speaker, pandan recess mon'n fer li mon devwar pour pas kot Lekol Primer Grand Anse Mahé akoz mon reste an kontak avek sa de lekol Grand Anse Mahé avek La Misère. E mon'n aprann ki rezulta Nasional Grand Anse Mahé i dernyen lo lalis, pour mwan sa i en gro konsern.

Mr Speaker. Mr Speaker pour tou sa letan ki mon pe travay dan distrik, dan pozisyon ki mon ete, mon'n vwar en kantite keksoz ki'n arive, ki'n anmenn sa degradasyon e fransman dir ou mon pa tro satisfe avek serten bann lapros ki pe ganny pran.

Mon santi poudir solisyon i avek nou dan kominate e i neseser ki bann lazans zot ekout enn pti pe, esey konpran letan bann serten sizesyon lokal i ganny met devan pour adres problem.

Definitivman i annan sa nesesite pou revwar osi serten bann Lalwa, ouswa bann reglementasyon ki ganny gouvernen par bann diferan lazans Gouvernman.

Definitivman i annan sa nesesite osi, pour bann sisyete sivil antre akote Gouvernman lo serten programm pour ede avek sa sityasyon. Me wi mon dakor ki paran i annan sa rol primordyal.

Mr Speaker, me an menm tan letan nou pe koz lo sa size, nou bezwen osi pa oubliye ki lenfliyans, lentegrasyon avek globalizasyon i anmennen osi pour lenfliyans devlopman Nasyonal, devlopman nou zanfan osi tou.

Mr Speaker ou demande ozordi devlopman dan teknolozi lenformasyon ki fason osi in enpakte lo lafanmir? Kot ozordi i annan bann dan fanmir kot, sa konversasyon, sa komunikasyon, parey ti annan lontan pa pe arive akoz sakenn i dan enn pti kwen avek son telefon, pe kominike ouswa pe regard bann keksoz ki enteres zot.

Mr Speaker alor i annan sa nesesite o nivo kominote, mon panse pour annan serten *task force*. Me dan sa *task force* i bezwen ganny *empowered* Mr Speaker pour kapab ede. Ed paran kot i annan sa nesesite. Mon santi osi poudir nou bezwen sipor osi bann anplwayer. Akoz letan ou pe koz bann paran tousel, wi Gouvernman i pour annan

serten programm pour annan serten bann lankadreman, me si anplwayer ki pe anploy sa bann endividé, bann paran tousel, kot letan i annan sa nesesite pour zot raport kot lekol me zot pa pe ganny sa loportinite, ouswa anplwayer pa pe konpran.

Mr Speaker priorite sa paran i reste touzour travay pour met manze lo latab. So mwan vwar poudir i annan sa nesesite pour en langazman konpreansiv pour nou kapab reisi dan sa demars.

Mr Speaker osi i annan sa laspe spirityel. Ki priorite nou donn li, dan lavi devlopman nou bann zanfan? Mr Speaker mon mazinen ki ou ava realize poudir lontan letan bann lesé, bann per ti pas kot bann lakour kot lafanmir ti annan, ti annan en lenpak; ti annan en lenpak.

E letan ou regard o nivo kominoter ou vwar poudir be politisyen, nenport ki bann reprezantan pe tous direkteman menm dimoun. Me akoz nou pa kapab annan en Lakor komen pour nou kapab tous lo serten size, koz lo serten size ki pour anmenn mon kapab dir en sanzman lespri dan serten bann dimoun?

So mon santi poudir sa travay, i pa en travay ki difisil, solisyon i avek nou menm. Me

se ki fason nou pare pour nou konpran e ekspekte kanmarad o nivo lokal pour adres bann problemm.

So Mr Speaker mon pa pour dir bokou, mon vwar poudir Onorab Samynadin koman en ansennyen oparavan e mon konnen poudir i pe swivre de pre, sa devlopman dan ledikasyon e laprantisaz. E sa Mosyon ki'n anmennen i en Mosyon ki bon e ki nou politisyen nou pa devret pe les sa sans sap nou pour nou kapab deliber direkteman lo size sa Mosyon.

E Mr Speaker mon pour konklir par dir ki wi, mon pou donn mon sipor sa Mosyon. Mersi.

MR DEPUTY SPEAKER

Mersi Onorab William. Prosen entervenan lo lalis mon ava apel Manm Elekte distrik Anse Royale Onorab Lemiel.

HON SYLVANNE LEMIEL

Mersi Mr Speaker. Bonn apre midi tou dimoun ki a lekout. Mr Speaker Mosyon Onorab Samynadin, pe demann - li menm li letan ou senplifye li nou vwar i pe demann avek bann paran, par egzant pour zot vin en pe pli responsab anver letid zot zanfan. I pe adres konportman nou bann

zanfan an zeneral, sirtou anver zot letid. E ler nou regarde i pe osi anmenn sa size lansennyman li menm, lapros paran anver lansennyman zot zanfan.

Mr Speaker, nou konstate nou tou e nou konnen poudir nou koman paran nou premye ansennyen nou zanfan. Akoz depi ler nou zanfan i ne, dan lakour, zanfan i komans koze, nou koman paran nou merit montre li sa savwar viv, savwar fer, savwar *être*, i komans kot nou.

Alors, responsabilite en paran letan nou gete an term sa Mosyon, responsabilite en paran i *vast* li. Parmi detrwa sa bann responsabilite ki nou gete, premyerman enn mon poudir se edike, ankouraze, dirize, e an menm tan i annan lezot ankor.

Me parkont ler ou gete osi, responsabilite nou paran se fer provizyon, ou bezwen de baz nou bann zanfan;- bann bezwen nesesser ki nou bann zanfan i bezwen. Par egzant nou zanfan i annan en lakour pour li viv ladan.

E nou bezwen fer sir ki dan sa lakour nou zanfan pe viv byen. Fer sir ki i annan manze pour li manze, i annan bon lizyenn ki i pe pratike, eksetera, lalis i long.

Paran i bezwen garanti sekirite son zanfan, asire ki lespri nou zanfan i reste touzour anpe, ki zanfan napa traka, e i pe viv san lafreyer. Akoz sa, si nou pe vwar zanfan i napa en lakour, i pa pe manz byen, son lespri pa anpe, i pa an sekirite, sa i fer ki laprantisaz pa pour pran plas dan lekol. E i pou al donn problemm ansennyen, e paran li menm letan i vwar zanfan i vin enn pti pe revolte akoz sa bann keksoz ki mon nonmen de baz la, napa an plas. Paran lanmenm ler li osi i vir lo sa zanfan, i komans pratik, ou kapab dir bann akt en pe vyolan lo zanfan.

E ki sa i pa bon ditou e sa pa pe anmenn li dibyen dan son laprantisaz ki parey nou, nou le dir ki nou le paran *involve* dan laprantisaz nou zanfan, pour nou zanfan aprann byen lekol.

Kan se en ler nou koman sa paran, nou vin koman en abizer sa zanfan e ki mannyer nou pour ekspekte li pour al aprann byen lekol? Paran li menm i sa premye dimoun pour ankouraz son zanfan. I merit donn li sa motivasyon, e paran osi i merit kapab annan lenfliyans lo son zanfan pour li travay dir lekol.

Alors i vreman enportan ki paran i gard sa bon komunikasyon mon kapab dir

avek zanfan. Bann pti *tête-à-tête* toulezour, avek nou zanfan. I vreman enportan sa Mr Speaker. I anmenn paran pli pros avek sa zanfan, zot vin pli pros ek kanmarad, zot kapab annan sa *bonding*. Sa zanfan pour santi li konfortab pour li vin diskit nenport ki size avek son paran.

Swa en problemm ki i pe rankontre dan lekol, swa en problemm son laprantisaz i pa pe konpran en keksoz, komunikasyon i lakle. Se la kot paran i kapab donn sa zanfan konsey e ed li rezourd son bann pti difikilte ki i annan. Pas enn pti letan avek li ansanm, fer *homework*. Mon'n tann mon bann lezot koleg pe dir taler kekfwa i annan de nou ki travay, nou pa ganny sa ase letan.

Me mon krwar koman paran, toultan nou merit pe fer en zefor an plis, pour nou kapab. Si nou anvi nou zanfan i reisi dan lavi nou bezwen toultan nou koman paran, pe fer sa zefor an plis pour nou kapab fer sir nou pe vwar letan pour nou kapab *spend* avek li. 5 minit *quality time* avek nou zanfan i ase Mr Speaker, 5 minit en! Pa ni bokou,

Onorab taler in dir li i dir son garson, son fiy li 18minit, 5 minit *quality time*, nou pe dir

nou napa letan? Anmenn nou zanfan, koz ek li, tyek enn pti kou dan sa kaye, pas vitman ladan. I enportan pour li sa.

E mon krwar paran la deor, nou merit - ki pa pe pratik sa petet - nou merit rod fason pour nou kapab sey anmenn sa bann keksoz parey si nou anvi ki nou zanfan, i reisi li menm dan lavi.

I enportan pour nou donn nou bann zanfan lankourazman ler i fer byen. Nou felisit li, in perform byen lekol in vin ek enn pti *star*. Sirtou bann ki ptipti, in vin ek enn pti *star* lo son lanmen, nou kontinyen felisit li, nou kontinyen ankouraz li. Nou pa dir *spoil* pour nou donn bann pti sa - be enn ler nou koman paran nou *spoil* zot enn pti kou, nou donn zot enn pti keksoz.

Akoz nou le dir ou, "kontinyen fer pli byen, manmi a kontinyen gete, *daddy* a kontinyen regarde ki i kapab fer pour ou, kontinyen fer byen". Sa i vreman, vreman, vreman enportan pour nou zanfan e i tous zot en kantite. E nou vwar sanmenm sa bann zanfan ki nou fer sa ek zot la, zot menm zot ki pouss plis lekol pour zot kapab fer pli byen.

Mr Speaker ler nou lo sa size, parey mon'n dir loter Mosyon in tous diferan pwen

dan son Mosyon li en? Annou get sa size ledikasyon li menm. Ler nou get ledikasyon anver nou zanfan, mwan le pran sa bout ler mon pe koz lo la, lo ansennyen, Mr Speaker.

Akoz fransman tou dernyerman i annan detrwa case ki'n ariv a mon latansyon, kot paran i montre sa devosyon, i ale lekol pour li al regard *report* son zanfan. Legzanp *report*. I ale, manman ek papa, i ale pou al regard *report* son zanfan. Me ler i regarde i dir, "mon ti a kontan vvar papye legzanmen ki mon zanfan in fer?" Teacher i refize.

Eski sa i normal? Mon pa krwar. En *teacher* pa merite refiz en paran ki pe montre devosyon anver letid son zanfan, e la nou pe dir, i pe montre sa langazman! Anver letid son zanfan.

Mon pa krwar ki okenn *teacher* i merit pe kasyet papye legzanmen, pa montre sa paran, fodre *headteacher* ki mele, ki vin dir poudir ou pour bezwen montre papye legzanmen ou zanfan.

Dezyenmman, i annan a ansennyen - nou pa pe kritike en? Mwan mon felisit tou bann ansennyen ki pe travay dir, me parkont Mr Speaker nou annan serten nou ansennyen ki nou bezwen re-regard zot enn pti pe,

fodre zot *retune* zot ankor enn pti pe. I annan ansennyan ki enn pti pe pares, nou kapab dir, serten en!

Legzanmen i vini, koman paran ou'n *engage* avek ou zanfan, ou'n donn li, ou'n donn li enn pti pe *practice*, ou'n pas dan son kaye *homework*, ou'n fer laranzman, ou'n rod bann *past papers*, ou'n donn li, ou'n travay ek li. Legzanmen i vini e ansennyan i pa asize pour li prepar en papye legzanmen, i ris en papye depi sepa ki lepok i donn sa zanfan. Sa zanfan lo sa papye i annan serten lesson ki i pa ankor fer, sa *teacher* pa ankor montre li. Ki mannyer ou ekspekte son pwen i monte letan i ariv ou pour donn li son *end result*, son mark?

E letan i diskite, ou pe diskite ek paran, ou konstate ou koman sa *teacher* ou dir vre, i wi, me lekel ki'n perdi? Mon zanfan, ou zanfan ki'n perdi, akoz i pa ankor fer sa lesson. San dan sa laliny nou bezwen re-revwar en? Bann *teachers* mon krwar zot bezwen serten zot re-revwar re-balanse, prepar zot lesson byen, get byen zot bann *curriculum* ki zot annan ki nou pe donn zanfan. E asire ki sa bann lesson ki nou pe donn nou bann zanfan, i bann lesson ki *match* avek laz nou bann zanfan.

Me nou pa donn zot bann keksoz ki zot pa ankor fer e apre nou zanfan i pey lepokase. Mr Speaker bokou keksoz in ganny dir, loter Mosyon in byen resers son Mosyon, bokou keksoz tou mon bann koleg la in kapab koz lo la, in dir.

Mwan mon ti a kontan profit sa lokazyon, letan nou lo sa Mosyon langazman paran, langazman zanfan anver zot letid. Paran anver letid zot zanfan, mon santi ki i annan mazorite paran en? Mazorite paran i annan sa lanvi, i annan sa komitman, e i annan sa lanvi pour li fer keksoz arive pour son zanfan.

Akoz napa enn nou paran, ki mon krwar nou ti a kontan nou zanfan i ganny *left behind*. Nou tou nou anvi nou zanfan i ganny pou devan, nou tou nou anvi nou zanfan i *shine*, nou tou nou anvi nou zanfan i fer byen. Me parkont i domaz, se lavi osi, ki i annan paran, i tonbe. I annan paran, ki pa pe byen mentenir sa zanfan, ou vwar granmanman, granpapa ki pe rente, pe eskente avek sa zanfan.

So dan bann ka koumsa i enportan ki lo kote Gouvernman, lo kote distrik, kominate, nou tou nou angaze pour nou fer sir ki sa bann dimoun koumsa i kapab ganny

serten pti led, lasistans pour nou *push*. Ki sa zanfan i kapab bouze li osi, ki sa gran manman i kapab elve byen sa zanfan, i kapab, nou diriz li dan bann laliny kot petet i pa konnen, ki i annan tel landrwa ki ou kapab ganny tel lasistans, tel fason fer.

Nou lo kote kominate nou bezwen diriz sa bann dimoun, sa granmanman, sa granpapa pour li kapab gete ki lasistans ki i kapab gannyen pour li kapab elev sa zanfan, an menm tan elve sa zanfan, *provide* li son nouritir e tou zafer ki ler i ariv lekol i son lespri i anpe, i kapab *perform* byen.

Mwan mon annan en distrik ki annan 2 lekol e 2 gran lekol. Anse Royale i sa distrik ki annan en - mon krwar dan bann segonder i enn parmi bann pli gro segonder. E primer osi nou annan nou en bon pe zanfan dan Lekol Anse Royale.

Mon ti pour kontan pran sa lokazyon letan nou lo sa Mosyon, pour mwan felisit premyerman enn, nou bann ansennyen ki pe fer byen pour lavansman laprantisaz nou zanfan, an term dan lansennyman e lezot keksoz ki nou bann *teachers* i fer pour akonpanny nou bann zanfan, pour zot kapab reisir.

Mon ti a kontan felisit bann zanfan, bann zanfan la ki pe travay dir, ki pe montre devosyon dan zot letid, ki pe demonstre bann bon konportman. Nou annan - mwan mon poudir Mr Speaker mazorite nou zanfan i pe demonstre bon konportman, zot tre disiplinen, zot pe montre sa bon savwar viv, savwar fer ki zot aprann dan lakour.

E sa respe osi, mon pour felisit zot pour sa respe ki zot annan pour zot paran premyerman enn, e osi anver zot ansennyen ki tre, tre enportan. E dernyerman mon pour felisit bann paran, bann paran ki reste akote zot zanfan, ki pe akonpanny zot dan tou sa ki zot pe fer, pour reisir dan zot letid, ki pe donn zot sa siper kontinyel e ki pe fer sir ki zot zanfan, i vreman reisir dan lavi.

So mon poudir *keep it up* bann paran, ki pe fer sir zot akonpanny zot zanfan pour reisir anver zot letid. *Keep it up* bann etidyan ki pe travay dir, ki annan sa bon respe pour zot paran, pour zot *teachers* ki tre disiplinen e ki anvi ariv pli o ki zot kapab arive dan zot letid. E felisitasyon ankor enn fwa, nou bann ansennyen ki pe fer tre byen, ki pe devoue dan zot travay.

So avek sa Mr Speaker mon krwar i enportan nou fini lo en note pozitiv, mon a dir mersi pour sa pti lenthervansyon ki mon'n fer. E mon espere ki loter Mosyon i ava kapab ganny de pti pwen pour li *wrap up* avek. Mersi.

(APPLAUSE)

MR DEPUTY SPEAKER

Mersi Onorab Lemiel. Swa mwan ki pa pe swiv. Konmsi premye fwa mon vvar sa kote pe bat lanmen pour en entervansyon lot kote. *But that should have been the spirit a long time ago.* Akoz mon'n vreman apresye enn de bann pwen ki pe sorti lo kote Lopozisyon partikilyerman Onorab Gabriel, Onorab Loze Onorab Herminie konmsi zot in fer bann bon pwen.

Keep it up! That's the spirit nou merit pe travay avek akoz sa Mosyon mon krwar i merit en Mosyon ki lontan Lasanble ti'n merit pe koz lo la.

Prosen entervenan Onorab Labonte. Mon *MNA*.

HON ANDY LABONTE

Mersi Mr Speaker. Permet mwan pour toultan remersi Bondye Papa, ki'n kree nou koman en imen e mon pour toultan *louer* li akoz se lafason

ki mon gard mon komunikasyon avek li, atraver lapriyer.

E sa i en fason ki mon konversasyon avek mon gran met, vi ki sa Mosyon ki'n ganny table par Onorab Samynadin i en Mosyon ki pe koz lo komunikasyon ant en paran ek en zanfan e ki enkli son ledikasyon. E i enportan ki parey Onorab William in fer resorti, ki nou toulstan reste konekte avek nou Gran Met, akoz se Bondye ki nou papa e li ki gid nou.

E dan menm *spirit* ki sa konversasyon ant ansennyan, zanfan e paran i reste toulstan primordyal. I reste primordyal e permet mwan Mr Speaker pour mwan sit osi sa proverb ki mon'n apresye ler Onorab Samynadin in prezant son Mosyon. Proverb 22-6 i dir ou, "donn en zanfan bann bon latitud depi son zenn az, depi son zenn az e i ava ankor pe met zot an pratik dan son vye zour".

Me mon pour osi vir zot latansyon ver Proverb19-18 i dir ou, "koriz en zanfan tan ki annan lespwar, me pa ale ziska swet son lanmor". Alor i bann parol vreman saz sorti dan liv lavi. Mr Speaker rezon ki mon dir sa ou konnen, komunikasyon i en keksoz ki vreman esansyel e enportan.

E mwan ler mon'n lir sa Mosyon li menm li Mr Speaker mon vwar li i vreman, i vreman enportan e esansyel akoz sa Mosyon pe koz avek paran li menm li.

Annefe mon pa vwar nanryen politize dan sa Mosyon e mon ekspekte ki tou le de kote latab nou pour donn nou sipor kontinyel, akoz mon tann bokou koze lo sa Mosyon. I zis parey mon'n tann Onorab Herminie in felisit Lekol La Rosière wi, mon osi mon pour zwenn ansamm avek li pour mwan felisit Mis Ethel Diana Bacco ki pe fer en travay ekstraordiner dan Lekol La Rosière.

Me mon pour osi *extend* mon swe e felisitasyon a Sir Steve English River akoz Sir Steve osi avek son lekip Sir Ted Arissol, Marie-Anne Payet pe fer en travay ekstraordiner e zot reste konekte, avek paran. E mon pour osi felisit mon bann paran La Rivière Anglaise. Akoz nou kapab dir poudir La Rivière Anglaise i annan en gran amelyorasyon dan komunikasyon, depi ler ki Sir Steve li menm li in pran sa lekol.

E nou paran, nou zanfan, e ansennyan i annan en dyalog vreman ki pe avans nou lekol pli devan. E parey dan mon

diskour, pour Leta Lanasyon ki mon ti felisit serten zanfan, mon pa pour re-nomz zot non akoz i sitan annan en kantite zot. Me zot konn zot sa bann etidyan akoz zot konnen poudir mwan menm mwan, mon reste touzour konekte avek mon lekol, ki tonm dan mon distrik e la aktyel *Council Lekol* i pe zwenn.

Malerezman mwan mon dan Lasamble, me selman mon leker, mon lespri i avek zot e nou toulstan konekte e avek nou ansennyan osi, e paran.

So Mr Speaker sa i anmenn mwan osi, mazin Sanmdi pase, Sanmdi pase Departman Lafanmir ti fer *Family Fun Day* kot Paradis des Enfant, kot ti annan tenm se, "Mon fanmir mon leker, Mon leker mon fanmir" *vice versa* i vedir menm keksoz. Akoz parey nou'n dir, se ki i pran en kominate pour elve en zanfan.

E si nou koman paran, nou annan sa konversasyon avek nou zanfan. E nou kontinyen diriz li lo bon semen, akoz ler en zanfan i ne li menm li, en zanfan i napa bann move, vilen manni si oule. Tou sa ki i aprann, i aprann dan son kominate.

So i esansyel e enportan ki koman paran, nou toulstan gid nou zanfan. Nou gid nou zanfan

lo bon semen e montre li bann bon valer parey respe, pli enportan se lanmour. Akoz lanmour i gid tou, si nou annan lanmour dan nou leker, mon krwar nou sirpas tou an zeneral.

So Mr Speaker avek sa lespri ki mon siport sa tel Mosyon. Me osi enportan pour nou met lanfaz lo serten bann bon keksoz ki pe deroule dan kominote. Me annou pa oubliye poudir i annan bokou defayans, e la i enportan pour nou note ki - e anvoy en lanons ki parey i annan bann paran ki pa pe pran responsabilite, ki vvar zot in tonbe dan en fason ou en lot swa dan drog, swa dan lalkol. Ankor enn fwa mon poudir i annan, i annan la komela bann fasilité, bann lorganizasyon ki la pare pour ede.

Mon pa pour kapab aksepte poudir ki i napa. I annan, i annan bokou bann lorganizasyon la, swa spirityel, swa bann lorganizasyon *non-gouvernemental*, gouvernemental parey NCC i la pour ede lo kote *parenting*. So i annan sa bann lorganizasyon ki la pour ed zot, pour siport zot, pour diriz zot, akoz nou konnen poudir i annan en gran kous nou popilasyon ki zot menm zot, zot ankor zenn, zot in fer, zot in fer

zanfan, e si oule nou kapab dir zot ankor zanfan zot menm zot, so zot bezwen gidans e nou pa kapab kit zot deryer.

Alor ler mon pe get sa Mosyon li menm li, i enportan pour nou fer paran konpran poudir nou la, nou koman bann *Leaders* nou la pour siport zot. E la mon pour mazin en parol ki toulstan reste dan mon lespri, ki enn mon *constituents* i fer sorti dan *meeting* piblik. Ki nou menm nou koman Parlman, nou bezwen kit nou bann deliberasyon lo en o nivo pour nou kapab kontinyen donn bann bon legzant lasosyete, zanfan, paran e menm lekol.

So Mr Speaker bokou in ganny dir, lo sa Mosyon. Mon pa pour long me solman mon pour termin, mon le termin la e mon poudir ki sa Mosyon i en Mosyon ki vreman enportan. So avek sa de mo mon pour donn mon sipor avek Onorab Samynadin pour sa Mosyon. Mersi Mr Speaker.

MR DEPUTY SPEAKER

Mersi Onorab Labonte. Donk an sotan English River, nou ava al Baie Ste Anne Praslin. Onorab Gill.

HON CHURCHILL GILL

Mersi Mr Speaker. Mr Speaker depi ler Mosyon in ganny

entrodwir, bokou keksoz in ganny dir sirtou lo kote paran siport zanfan. E - me selman parey nou tou nou konnen si ozordi nou get nivo entelektyel. Sesel nou pour vwar poudir bann paran in fer en bon travay, akoz si nou tou nou la, nou pe kapab fer sa bann deba e dan bann Minister nou annan bann dimoun partou, dan pei pe tenir bann pozisyon. I montre nou poudir nou paran in toulstan pe travay zot.

Me selman dan milye semen parey nou konnen i annan ki tonbe. E parey en legzanp tipik in ganny fer kot ozordi i domaz dan nou sosyete nou annan bann zenn manman, ki fer zanfan e zot menm sa bann manman, zot pa ekipe avek sa matirite neseser pour zot kapab gid sa zanfan.

E mon santi poudir la, sa dan li menm i deza en sityasyon ki nou devret pran an *main*. Akoz si nou pour get rezulta, rezulta legzanmen parey in ganny dir, nou vwar i annan en *decline*. E eski nou'n fer en resers pour nou gete be tou sa bann ki'n ganny, ki pwen in redwir ki bann *parent's background*?

E sa ti ava ed nou pour nou vwar, ki bor ki nou pe - nou pa pe kapab fer sa delivre alaoter, akoz si sa bann

manrmay donnен sityasyon sosyal otour zot, menm la mon pe koz lo sa group zenn manman ki zot, zot menm zot napa leksperyans.

Sa group zanfan koman sosyete nou devret pe donn en latansyon tre spesyal lo zot, pour nou kapab vreman ariv lo en konklizyon kwa ki kapab ganny fer pour zot. Ki mannyer sosyete i kapab ede. E atraver bann lezot NGOs ki zot, zot fer sa bann travay.

E an menm tan, ler nivo legzanmen i *decline* i pa vedir zis sa premye bout ki mon'n dir, ki koz sa. Nou bezwen osi gete be fason ki letid pe ganny fer, eski i napa en baryer, in pa'n ler petet pour nou evolye? Akoz ledikasyon i en keksoz ki evolye, ou bezwen tanzantan pe gete ki mannyer ou kapab *revamp*, ki mannyer ou kapab amelyore.

E nou, eski sa i en keksoz ki nou pe fer? Vi ki nou vwar rezulta, pa pe neseserman donn nou sa rezulta alaoter ki nou, nou ti a kontan gannyen.

An menm tan nou annan osi, vi ki nou, nou konstitye avek zil. Nou annan osi Praslin, La Digue, ki bann zanfan i bezwen vin lekol Mahé. E la osi sa i montre nou osi ki mannyer ki sosyete i bezwen osi zwe serten rol, akoz sa bann etidyan ki sorti Praslin La Digue, zot,

zot nesesit serten sipor ki ozordi pe donnen. Me selman nou santi petet ti a bon amelyor en pe lo la, *given* sityasyon ekonomik ozordi ki mannyer i ete.

Akoz parey nou konnen bann paran pa pe neseserman ganny bann serten sipor ki a zot dispozisyon. E alors nou bezwen get sa bann etidyan ki vin isi Mahé, ki fason ki zot sityasyon i kapab ganny amelyore. Parey nou kapab mazinen, dan Bidze nou ti vwar ti annan sipor adisyonnel pour bann manrmay ki lo *scholarship overseas*.

E sa bann etidyan sorti Praslin, zot osi zot pe fer fas ek sityasyon Nasional parey nou tou nou konnen. E sa bann nivo, i pa nivo paran ki pour kapab adres sa akoz i annan sa sipor dan Bidze pour zot. Me zis selman i devret ganny aziste.

So dan son lansanm i montre ou poudir, wi i annan sa bout paran ki nou tou nou tonm dakor lo la. E i annan sa bout bann *teachers*, e nou konnen poudir bokou *teachers* pe fer byen. E taler domaz mon'n tann en Onorab dir kot son distrik lekol i dernyen lo lalis. Me nou kote Baie Ste Anne, nou bezwen remersi nou bann *teachers* Mis Monique ek

son tim, akoz manrmay pe fer vreman byen.

E sa i montre nou poudir i annan abilite dan bann plizyer lekol dan Sesel kot *teachers* pe donn zot *best*. E nou bezwen toulstan gete ki mannyer zot devret ganny siporte. E paran osi bokou zot, pe travay ek *teachers* pour asire i annan bon rezulta e se sa ki nou vwar serten distrik i annan rezulta e sa i prouve ki sa travay paran etidyan avek *teachers* i la, i pe ganny fer.

Me selman mon dakor ek loter Mosyon, i bezwen ganny pran pli serye, kot nou kapab ganny plis rezulta posib, ki sa an rezulta i a fer nou annan en popilasyon ki byen edike e sa pour devlopman pei, i en keksoz ki tre enportan pour nou kapab bouz devan. Mersi Mr Speaker.

MR DEPUTY SPEAKER

Mersi Onorab Gill. E alor i mon lentansyon gard mon parol avek *SBC* pour zot bann transmisyon ki nou pour fini a ler. So dernyen entervenan, Onorab Sathya Naidu e nou pour kontinyen lo sa deba demen. Onorab Naidu.

HON SATHYA NAIDU

Mersi Mr Speaker. Bonn apre midi tou koleg Onorab ek tou dimoun ki a lekout e ki pe swiv

sa sesyon. Mon le remersye mon koleg Onorab Samynadin pour sa Mosyon ki'n anmennen, pour sa linisyativ ki'n pran pour nou koman en Lasanble koz lo en size ki en bon pe dimoun dan mon distrik in eksprim zot lopinyon lo la, e zot santi ki in plis ki ler pour nou kapab adres sa problem, ki pe prezant son lekor dan nou sosyete ozordi.

Ledikasyon, Leta pe fer son bout. Dan Bidze Anyel nou ti'n vwar R1.34bilyon in ganny met akote sa i reprezant aepre 13poursan nou Bidze Nasional. E i annan programm goute, lo kote ledikasyon, Departman Ledikasyon zot pe sey promouvwar en Polisi vizavi *inclusive education*, nou annan osi en proze kot lekol pour vin en pe pli otonom, kot *management* pour kapab pran desizyon dan plas relye lo *headquarters*.

E i annan osi plan pour etablir en *technical school*. E i annan bokou plis ankor an term zefor ki Minis Valentin ek son lekip pe fer. E i enportan pour rekonnnet sa. An menm tan ler mon pe koz rekognisyon i enportan pour nou rekonnnet tou bann ansennyan ki pe *go above and beyond* pour fer zot louvraz.

E ler mon regard zot *job description* i annan en kantite keksoz ki zot fer, ki al pli lwen ki sa. E pour sa mon dir mersi. An menm tan, i osi annan paran ki pe fer sa ki zot merit pe fer e pour sa mon felisit zot.

Me lo lot kote i anmenn en kantite konsern pour mwan, ler mon vvar tou bann roulman, espesyalman ler mon lo teren vizavi lafason ki bann zanfan pe viv dan nou sosyete.

E parfwa ler mon vvar serten keksoz pe arive dan mon kominote. Mon poz kestyon lo ki pe arive ek sa zanfan dan lekol? Ki mannyer eski son laprantisaz i ete? E ki pe vreman arive dan nou pei ozordi kot sosyete li menm li pe bouze? Sa i bann kestyon ki mwan, mon poze souvan.

Espesyalman par legzanp kot mon vvar en zanfan 5an papa i en *drug dealer*, manman i en alkolik, prezan mon demann mon lekor en kestyon ki pe al arive ek sa zanfan? Sa zanfan byensir i al lekol, be kwa ki vreman anmenn lekol? Kwa ki vreman sa bann paran ki byensir zot in perdi direksyon dan zot lavi pe ede dan sa demars? Eski i annan okenn form led ki pe ganny donnez pour sa bann paran zot menm?

Me se la kot lapel ki Onorab William in lanse, i vin

an zwe. Kot i annan diferans *stakeholders* ki pour bezwen vin devan pour fer zot par, e se la kot menm Lotorite Distrik pour kapab donn en koudmen.

Souvandfwa ler en zanfan i ganny sispann kwa ki arive ek sa zanfan? Eski i annan en swivi ki lekol i fer? Eski i annan en swivi ki nou koman bann dirizan osi nou pe fer? Sa i en kestyon ki mon poze. E par koensidans zis avan ki sa Mosyon ti pe vini, mon ti'n zwenn en garson ki ti'n ganny sispann. E i ti kot ladministrasyon distrik pour fer apepre 10zour.

Alors lo kote lekol Belonie i annan en programm ki pe ganny met anmars, pour fer sir ki ler en manrmay i ganny sispann, en zanfan i ganny sispann, i annan kek lankadreman. E mon ti'n demann sa garson akoz in ganny sispann? I dir i pa vreman konnen.

Me selman dan sa 10 minit ki nou ti'n ganny en konversasyon, i ti'n santi li soulaze e i ti'n dir mwan mersi e mon'n dir li nenport ler i kapab donn mwan en *call*.

Alors lobligasyon i pa zis lo paran, pour pran responsabilite ver en zanfan. Lobligasyon i ver sosyete an zeneral pour kapab fer le lesansyel. Ou konnen

ozordi ledikasyon i enportan pour nou kapab fer resorti avek nou bann zelev dan tou bann lekol, depans ki Leta pe fer, e lekspektasyon ki nou annan ver zot. Ledikasyon se sa lakle ki kapab ouver plizyer laport pour kapab kree loportinite.

Me ler ou pa pran ou letid o serye, i annan konsekans negativ ki asosye avek. Bon pe fwa nou'n vwar differan MDAs ki vin devan nou poudir i annan mankman mendev. E i pour reste parey si nou sistenm ledikasyon pa pe prodwi bann rezulta favorab, pour kapab anmenn nou pei de lavan, kot nou annan en zenn zenerasyon Seselwa ki pe antre dan tou bann differan pozisyon, ki laporte.

Sesel a mon avi is a land of opportunities. Me malerezman i annan en bon pe dimoun, i annan bon pe endividé ki byensir i pa pe pran responsabilite ki zot merit pe pran, ki arive ki zot perdi sa loportinite e se la kot etranze i antre.

E mwan mon'n tann plizyer Onorab pe dir zot annan zanfan. Mwan mon napa zanfan, annefe avek mon *partner* mon pe ganny en diskisyon. Me selman mon kapab dir ki mon annan en lafreyer! Mon annan en lafreyer,

akoz mon vwar bann keksoz lo teren ki parfwa fer mon poz serten kestyon.

Akoz sa responsabilite ki vin avek en paran, ler ou pe vin en paran i en responsabilite ki enorm, e i pa en zwe. Alors nou ganny en konversasyon. E se la kot nou montre matirite koman en koup, pour nou kapab ganny en konversasyon, pour nou kapab planifye en fanmir. Avan ki ou planifye en fanmir ou bezwen fer sir ki ou annan en lakaz, ou annan en *job* ki stab, ou annan en rannman ki pe antre.

Akoz finalman ler ou'n anmenn sa zanfan *au monde* la, ou annan responsabilite ver li e ler ou anmenn en zanfan, i annan en depans osi ki vin avek. E wi Leta lo son kote pe fer son bout, me osi i annan en bout kot sa paran i bezwen fer lesansyel.

Me konbyen fwa nou vwar bann paran ki napa fondasyon de baz dan lavi i vin - zanfan i vin paran ou kapab dir dan sa bann lenstans. E alors ki direksyon eski nou, nou pe ale? Dan lekol par egzant ler mon ti lekol, mon ti'n al ziskan *A Levels*, me selman ziska sa moman ti napa okenn konversasyon dan lekol vizavi sa letap ki ou pour pran dan lavi, ler ou pou vin en paran? E

ki responsabilite ki vin avek sa letap?

Nou pa'n ganny en konversasyon lo la. E i enportan ki lo kote *curriculum* si fodre azout sa bout, pour kapab fer resorti sa pwen, i ekstrememan enportan.

En lot pwen ki mon'n tann plizyer mon bann koleg fer resorti se sa zafer kot paran pa pe vin pran *school report*. Mon krwar in plis ki ler pour nou kapab fer sir ki i annan aksyon, ouswa konsekans sever, ki kapab ganny pran kont sa bann paran.

Dan lepase ladministrasyon presedan ti pe pran en bon linisyativ, vizavi *social contract*. Apre mon pa konnen ki kantite lekol in vreman met sa anmars. Kot paran, lekol ek zelev pour byensir annan ki Kontra, ki pour *bind* zot vizavi serten nivo responsabilite e sa ti pour kapab garanti ki lekol pa pour santi li tousel, ouswa bann ansennyen pa pour santi zot tousel dan sa demars ki zot, zot pe fer pour kapab fer sir ki zanfan sa bann paran ki pa pe pran zot responsabilite pour kapab avans devan dan lavi.

E an menm tan ti annan en lot ki ti'n dir konmkwa nou bezwen pran bann *best practices*. Mon krwar *best*

practices se *International School* avek *Independent School* pour nou kapab fer referans avek koman bann model. Akoz bon pe fwa ler nou pe get rezulta sa bann zelev, i alaoter e zot konsistan.

Be akoz eski zot konsistan? Eski i kapab akoz bann paran pe tir larzan dan zot pos e zot pe fer en lenvestisman zot fer sir ki i annan en swivi lo sa kote. Eski *that's the reason why?* Ouswa lo kote *International School* zot pe fer sir ki lo kote *staffing*, lo kote *staff welfare* zot a pe get ladan?

Bon pe koze in ganny fer lo *Scheme of Service* pour bann ansennyan. Sa osi nou bezwen kapab revwar akoz ler mon'n tann enn mon koleg pe dir ki i annan serten ansennyan ki pa pe performen. Kekfwa i santi ki i a pe ganny sepa tan i pa bezwen fer plis. Alors fodre ki nou get en kou ladan osi.

Me ler nou pe koz lo bann best *practices* aletranzé, nou annan Zapon, kot bann manrmay, bann zanfan a en tre zenn az zot enkilke en valer lo kote lapropte. Menm dan *World Cup* nou'n vvar mannyer bann Zaponnen i konport zot ler i annan bann tel levennman. E zot ganny rekonné lo en baz mondyal, pour sa valer ki zot annan dan zot dimoun.

E an menm tan, ler nou pe regard lo en bann performans lo en baz Nasyonal, tanzantan ou tann en sinyatir ou kapab dir, i pa neseserman Naidu me selman en lot. Me selman dan sa lenstans kot kominote Endyen. Mwan mon kapab partaz mon leksperyans poudir ki i annan en serten nivo disiplin, ki ganny met dan sa zanfan pour fer sir ki li i performen.

So *cultural appropriation* i bezwen ganny get ladan. Kot en keksoz pe ganny fer byen dan en kiltir, kwa ki mal pour nou kapab pran ladan, pour nou kapab met dan pour nou, pour fer sir ki i marse. Menm zafer apre aplik pour bann Sinwan osi. Ou konpran mwan?

So lo sa lenstans nou bezwen kapab fer en analiz pour regarde *what is happening right in those families?* Akoz sa bann zelev zot akse menm fasilité, ouswa oportinite ki lekol Leta pe donnen. So sa osi i en keksoz ki nou bezwen get ladan.

Lo size bann *dropouts*, i annan apepre baze lo statistik apepre 160 zelev par pour en lannen tousel ki'n *drop out*. Be preznan i annan en bon pe ki'n lo baz *long absenteeism*, preznan ki pe arive? Mon personnelman mon konn en ka ki mwan mon

pe sey adrese kot sa zelev, depi a laz 11an in aret al lekol.

E *it has not been tracked by* Departman Sosyal ouswa tou bann lezot departman. Mwan ki'n vwar e nou pe sey fer bann demars pour nou kapab regarde *how we can help him?* Me selman ou kapab dir, i anmenn gran tristes pour mwan la ler sa garson i annan apepre 16an, 17an. Ki direksyon nou pe ale? E se la kot mon met plis lanfaz lo sa ki Onorab William in dir, pour nou kapab anmenn tou bann diferan *stakeholders* ansanm pour nou kapab regard sa problem.

Ozordi malerezman avek sa limitasyon letan, mon krwar pa si mon pour kapab soumet tou bann pwen. Me selman i enportan ki pa zis Departman Ledikasyon ki pe regard sa problem. I enportan ki Departman Lafanmir, i Sosyal i vin ansanm, ansanm avek bann diferan *stakeholders*. E nou koman bann dirizan osi nou fer nou bout dan plas dir Leta pa pe fer ase. Nou tou nou annan en rol pour nou zwe.

Alors i enportan ki nou pran sa responsabilite, pour kapab fer lesansyel lo sa kote akoz ler en paran i angaz dan letid son zanfan, son personnalite i amelyore kot i

kapab vin en endividé ki responsab, konportman sa zanfan dan lekol osi i pour amelyore, i pour kapab ogmant partisipasyon lo en baz pli aktiv dan lekol. Moral bann ansennyen pour ogmante.

Kalite ledikasyon osi ki Leta pe donnez pour kapab amelyore e i pour kree en latmosfer pli pozitiv dan lekol e i kapab adres bann konsern ki nou, nou pe soumet.

Alors se sa bann parol ki mwan mon annan poudir versipor Mosyon ki'n ganny anmennen par Onorab Samynadin. Mersi.

MR DEPUTY SPEAKER

Mersi Onorab. sa ki mon ti a kontan dir ou se swet ou bonn sans dan planifikasyon ou fanmir. Sanson Patrick Victor i dir '*plan, plan* ou fanmir, en fanmir ki ou *plan* se en fanmir ere'. E sa sanson dayer ti ganny fer pour ankouraz Seselwa planifye, i ede.

Nou pour termin la. I reste nou 6 Manm pour koze lo sa Mosyon ki nou ava kontinyen demen bomaten. 3 lo kote Lopozisyon, 3 lo kote LDS napa non ki pour ganny azoute. E alor mon ava dir zot mersi pour zot travay ozordi. Demen nou ava kontiny dan menm lespri ki nou'n kontinyen.

Alor bonn rantre e demen.

(ADJOURNMENT)

Verbatim Report

NAS Sitting

Tuesday 30th May 2023

